





1874

42495



1624
HENRICI AB
HEER TVNGRI

SERmi. PRINC. FERDINANDI
ELECT. COLON. PRINC. LEODII

Medici cubicularij, SPADANAE
secundis curis auctor:

HOC EST

Fons Spadanus accuratius descriptus, et bibendi
modus, medicamina bibentibus necessaria.

*Ipse mihi plaudam, nam stuit à è fœce popelli,
Hic scripsisse feret, me benè, & illo male.*



LEODII,
Apud Arnoldum à Corfvvaremia,
Typog. jur. Anno.

1622.

A D M O D V M R E V E R E N D O
D. D. C A R O L O A M E T T E R N I C H
Metropolitanae Treuirensis, Cathedra-
lium Augustaenae & Leodiensis
Canonico.

*Electori Treuirensi patruo suo inter sanctioris consilij
mystas Sanctissimo.*

H E N R. A B H E E R. T V N G R.



O T V M hominem ab ortu
morbum esse, in epistola ad
Damagetum diuinus dixit
Hippocrates. Totam aquam,
totum esse morbum hominis
ab ortu medicamentum, si dixero, nihilo
longius a vero abiisse videbor: Quæ enim
humani corporis pars est; quæ ab aquis non
iuuetur; aut cedo mihi vllum morborum
genus, quod in medicatis lymphis suum
remedium suamque medicinam non in-
ueniat. Cætera artis præsidia, vno modo
adhibita prosunt, aquam medicatam qua-
cumquæ ratione admoueris, salutarem ex-
perieris: nec enim interiora tantum potione
per sanat sed & balneis lauando leuat; cuta-
neisque turpitudinibus liberat. Imo in his
fontibus, non solum morborum sine vlllo

dolore medicina inuenta est, verum etiam
sanis laborum leuamen lassitudinumque
iucundissime præstatur. Norunt hoc vena-
tioni aucupioque addicti viri, principes que
fœminæ, qua Dianæ exemplo.

*Margine gramineo, venatu corpora fessa
Lassatosque artus liquido perfundere rore.*
Actæonis væcordes oculos, nihil veritæ
cum solent ad hos fontes, mirè ab aquis
recreatæ recedunt. Alia insigniora remedia
cuius non conueniunt, hos fontes omni
sexui, cuiusuis temperaturæ hominibus,
sine noxa eruditus medicus concefferit.
Cætera medicamenta validiora, veri Au-
tumnoque ita familiaria sunt vt alias anni
tempestates refugere videantur. Exoriente
Cane, aut ante canis ortum, etiam nostro in
hæmispherio vix decimo quoque anno id-
que ad paucos dies caninos æstus sentienti
(nam proximis annis, medijs Syrii diebus
alsimus) ea omnibus horrore sunt: at vero
his aquis nullum tempus Caniculari op-
portunius, quam uis toto anno tuto poten-
tur. Nec est quod iam veterum aqua-
rum miracula, vel Siloes piscinæ, vel Ior-
dani Naamum sanantis stupeamus: cum
hic

hic & attonito morbo & conuulsione paralyſique laborantes, leproſosque curari videamus, ſubinde etiam ſæminarum aborturientium conceptum retineri: atque è ſterilibus fæcundas effici; nam iccoris lienisque infarctum, ad miraculum expendi: Ictero, & quæ huic conſequa eſt aqua intercutem laborâtes, ſanari quotidianum eſt. Catharros è capite lapſuros, iamque in ſtomachum lapſos conſumit, vertiginorum rotationem ſuſſaminat: Herculeo morbo laborantibus pro alexicaco aut Au-erunco eſt. Coli tormento torminibusque vexati nullum, ex Epidauro, aut alio AEsculapij ſacrario medicamen his aquis præſentius inueniunt. Renes liquido deobſtruit, veſicæ ſaburrâ deplet, vrinas mouet, arenulas, pituitamque in ſabulum concreturam eiicit: tiliarum aliarumque corporis partium tumores diſcutit ſeu pota ſeu balnei modo applicita. Matricis fœdam colluiem eluit; menſes lunæ imperio repugnâtes officiij commune facit, albos mulierum fluores compeſcit. Ventriculo debili nauſcantique optatiſſimum pharmacum: orexin tantum non caninam mouet,

digestionemque ingestorum promouet. Hæc & alia aquę potæ bibentibus dant com-
moda. Cæterum & qui bibere nesciunt;
cur acidis fontibus bene precentur, inueni-
unt: Nulla scabrities est, quam lotionē non
siccet persanetque. Vidi multos qui in ther-
mis Aquensibus nihil profecerant, vsu bal-
nei huius aquæ omnem scabitudinem ab-
sterfisse. Vlcera phagædênica nec alijs, si
mercurium excipias remedijs cedentia, hic
medelam inueniunt, breuique temporis
spatio carne implentur, & quod omnia mi-
racula superat hi fontes nobis herbæ Bri-
tannicæ, seu cochleariæ desiderium minu-
unt, scorbuticorum enim ora, seu scelo-
tyrbe laborantium, opinione citius putri
carne liberant, certæque sanitati restituunt.
Quid multa? si dixerò nullum esse in arte
medica tam vrile, tam securum, tam facili
pretio parabile præsidium, verè quidem, sed
nimis parum pro laude harum aquarum di-
xero. Hispanam virginem diu solâ aquâ vi-
tales traxisse auras scribit Rhodiginus l. 13.
cap. 23. Melancholicum hominem vidit Al-
bertus, qui septem hebdomadas ab omni
pabulo abstinuit, solo aquæ haustu alternis
diebus

diebus contentus. Medicatæ ne acidæque fuerint hæ altrices aquæ non addunt, ego castales fuisse suspicor: aut certè si fuissent iucundius hos piscium victum imitantes, victuros fuisse affirmo. Quæ causa est cur cum libelli ante septem annos de Spadanis aquis a me scripti, omnes in varias Europe partes distributi sint, Spadacrenem secundis curis, multo auctiorem, limatioremque sub nominis tui auspicio prælo reddam, certus te qui me meaque pleraque ex quo febrifugum me ex Imperij comitijs rediens sensisti, fecisti plurimi, etiam hanc opellam ridenti mollique vultu excepturū. Ita omnis boni autor deus te patrumque tuum Treuirensis Archiepiscopum cui à sanctissimis es consilijs diu valentes vegetosque conseruet, tandemque huius vitæ saturos, cælo transcribat, vbi fontem vitæ Christum Dominum plena amystide in omnem æternitatem, visione & amore Dei saturari, obducatis. Ita voueo precorque, cum virtutum tuarum omnium, tum solidæ prudentiæ admirator.

Henricus ab Heer Tungrius
Leodici Idibus Ianuarijs. 1621.

AVTORIS, AD
LIBRVM SVVM
ELEGIDION.



*Arue liber, sed mote. Liber per-
magne, sed usu;
1, propera, Aeripedes calce pra-
ito; vola.*

*Claudum etiam volitare, illud quando aquor
arandum,*

Quod vel dimidio sol rapit ipse die.

Vltima te Thule, te Thrax, te Sarmata poscit:

Te iam pacatus per mare anhelat Iber.

Te Bataui, te Celta ferox, Tungrique meorum

Patria, te Europæ, qua patet ora, sitit.

Tu citius Baldo, Cressisque iocundius herbis,

Tutius & patrijs quemque reponis agris.

O si qua nostrum Phæbi vis influit orbem,

Omnia Spadanus lambat arata liquor!

Quâ Mortæ vis fracta foret, quâ viuida vita?

Quâ gemeret vacuâ nauita lentre Charon!

In Spa dedidicit sua stamina scindere parca.

Propter

Propter Spaviduo, Cerberus ore famet.
Si cui, nam cælū tonere in capita ista putavit.
Cous, ab Herculea compede membra silent.
Aut si sydereo stupuit quis fulmine tactus;
Hinc bibat, à Cælo atq; Hercule tutus erit.
Quem vertigo rotat stantē, cui tintinat auris,
Brachia cum gemino cui resoluta pede:
Cui stomachus dormit, vacuum cui sanguinis
hepar,
Cui nigro fellis turget ichore lien,
Huc veniāt & quos dirus tumefecerit Hydrops,
Nam formidatis Spada medetur aquis.
Tormina cui ventrem, substillum aut sangui-
nis vrit,
Hic sibi confestim, quo medeatur habet.
Si fluor alvinus lacera intestina fatigat,
Vlcera si medium ventris, & ima tenent:
Gallica si stillat carioso ex inguine tabes,
Vulnera si medio cypria pene sedent,
Quamquam hac & castum subeant incommo-
moda corpus,
Cum micat è paruo grandior ore lapis;
Aut penis lotio silanus roditur acri:
Et nequam & castos, Spada simulte leuat.
Virgo cui pigro stagnant catamina motu,
Aut cui guttatim menstrua & alba fluunt:
Cui

*Cui crocus aut plūbum, frotēq; genasq; colorat,
Te potā, lunæ cornua certa notat.
Et fronti candor, redit & sua purpura malis
Et labris redeunt, protinus anterosæ.
Fæmina cui prolem, Lucina nouerca negarat,
Sapius hinc grauido visa redire sinu.
Si pateris quam non tollit medicina podagram,
Hic pota, his potis sanior ibis aquis.
Dicere plura libet; medici sed dicere pauca est,
Et facere, hac quæ vel momus & ipse amet.
Quid mihi cū momo? vel si millesimus horum
Qui leget hac: papè! dicat & Euge! sat est.
Qui multis placuit, vix uni perplacet: at qui.
Displicuit multis, hunc sophus omnis amat
Quisque suo simili capitur, vefania pleros
Quando tenet, paucis si quis amare, sapis.*

S C R I P.





SCRIPTIIONIS OCCASIO.
DE FONTIVM
ORIGINE.

C A P. I.



CIDORVM qui passim in Germania Arduennaque scaturiunt fontium tanta est diuersitas, vt iam paulo minus a seipsis, quam ab alijs vulgatis aquis discrepent. Color, odor, sapor, multa quæ eos commendant subterranea, alibi auariore, alias magis muni manu a naturâ polydædalam varietatem vbique affectante communicata, ipsos discriminant, vt singuli pæne scriptorem sibi aliquem admouere possint, qui ipsos meritis laudibus orbi commēdet natiasque dotes victuro calamo prosequatur. Magno enim mortalium incommodo optimi fontes ita in obliuionem veniunt, vt & locus in quo floruerunt controueratur. Hinc doctissimus Mercurialis libri primi variarum lectionum caput tertium implet dubitatione vbi fuerint aquæ ferratæ a Scribonio Largo, & Marcello Burdigalensi descriptæ, quæ quia vesicæ

vesicæ vitia emendabant; vesicariæ vulgo audiebant. Iam Tungrorum meorum Plinio celebratissimum ferrugineum fontem, quidam apud antiquæ vrbis pomæriorum rudera; alij in ipso spadano vico, totis decem horis inde dissito collocant. Nec mihi hanc litem, alijs occupato, componere promptum est. Hoc sæculo idiotæ quæ eorum væcordia est parum pensi habent, ex quo fonte aquam hauriant, dum acore optato linguam feriat, digni sane qui lutum quo eos Epimetheus finxit, si non omnino è robore excisi sunt, ætatem potent totam, aut tandem quantum fons fonti præstet condiscant, virisque eos discernendi peritis fidem habeant. Atque utinam in singularibus aliquot fontibus errores hi starent: Verum in vniuersis, totoque eorum genere multum hallucinationum committi iam olim docuit Galenus cum 7. methodi erroris arguit quosdam Empiricos qui multis remedijs etiam pugnantibus nullo successu tentatis, ægros ad balnea ablegabant, ignari & naturæ aquarum, & parum solliciti num ægris conuenirent. Mihi iam sedecim annis, quot æstatibus in familiam fere magnatis alicuius adscito, Spadanas aquas adeunti, idem videre contigit. Missi Spadam ex varijs Europæ partibus ægri, ab ijs qui has aquas nec oculis, nec lingua vsurpauerant, quique paucissima forte de ijs legerant, vel fando acceperant, qui & hoc vnum quæsisse viderentur, uti ægros, aut morosiores, aut incurabiles à se amolirentur, eorum,

qu

que vel citam mortem, vel moram in morbo, suis vicinorumque oculis subtraherent. Datæ bibendi quibusdam regulæ, vel rusticis nostratibus deridendæ. Vidi cui vnâ tantum vnciam, vidi cui decem ad summum, vel viginti præscripserant, vt expedierit hominibus illis, senis alicuius, aut anus spadane, aut cuiusuis aduenæ (Bobelinum spadani vocant) qui solo quatrinduo ibi vixerit, quam talium medicorum consilio vti. Empiria enim, vt has aquas inuexit & excoluit, ita eius accolæ multa docuit, quæ Machaones cæteroqui doctissimi, multum à medicatis aquis semoti, nullo modo scire possunt: quæque nostrates medici, ab illis discere non erubescunt. Quæ causâ fuit cur & iuniorum Asclepiadarum, & ægrorum bono, vt spero, de aquis soli mei natalis obiter ea chartis credere voluerim, quæ annorum aliquot experientia notauî, quæque cum alijs medicis contuli, obseruauique, vel legendo eos qui ante me scripserunt, nec enim ex aliorum ad ore fertum peto; collegi. De spadanis ergo post Philippum Gheringum affinem & Thomam Rytium Socerum meum scripturus aquis, visum est paulo altius fontium originem scrutari. Si Senecæ, Plinio, alijsque credimus in subterraneis specubus magnam latere aquæ vim, adeoque totos riuos, stagna, lacus; quotidianis experimentis tam clarum est, quam quod clarissimum vt iam non sit opus, quod Philippum Macedonem fecisse, ex Asclepiadoro refert Seneca, conductos
in

in imas terræ cauernas mittere homines, qui facibus laternisque multos dies progressi, magnos se amnes vastaque inuenisse flumina renunciunt. Hoc enim puteorum metallorumque fossiores, hoc in latomias damnati, nostrique carbonibus eruendis occupati Leodienses; dietim experiuntur, qui in tantam sæpe aquarum incidunt affluentiam (affloghemens ipsi corruptio parum nomine vocant,) vt neque ad latera, neque in profundum progredi queant; sæpeque vndis insano impetu per terebri nimium se exerentis hiatum erumpentibus, morte pœnas nimix vel curiositatis, vel avaritiæ luant. Vt iam Asclepiodoro alijsque credere possimus, qui subito ex terra ingentia profuuisse flumina scripserunt minusque fabulosos iudicare, vel Platonem qui in imis terræ Oceanum tartareum: vel alios poëtas qui Stygem, Coccythum, Phlegethonta confinxere. Nec dubium est quin Deus cū tertia creationis mundi die vnum in locum aquas secreuit, terræque cauernis eas inclusit, simul in diuersas terræ partes per occultos meatus & cuniculos magnam aquæ copiam è mari corruatam dispertijt, cuius adiutrice opera lapides, Metalla, & si quæ huius sunt generis, decursu temporis in terra simul coalescerent: ex earum dico aquarum copijs per terræ latebras diffusis, illo ipso tertio creationis die multos fontes, imo amnes diuersis locis scaturiuisse; siue hoc gratiæ ornatuique terræ debebatur, quæ multis hinc inde natis fontibus ad cœlestium

stium corporum pulchritudinem stellis distin-
ctorum adsurgebat, siue summa tanti opificis li-
beralitas, Adamum recens natum fontium com-
moditate carere noluit. Aristoteles tamen in suo
de sublimibus libro, ex aere in terra concluso at-
que in aquam resoluta, nasci omnes fontes flu-
minaque voluit. Non legerat credo, etsi Platonis
discipulus in Phædone quatuor illa paradisi flu-
mina iussu Dei profuuisse, nec aëris ullam concre-
tionem expectasse. Nisi forte ante Goropium
Becanum (in Indoschyticis pag. 81.) delirauit,
quatuor illa flumina, nil aliud fuisse, quam Ocea-
num in quatuor orbis plagas fluuios emittentem:
quo sensu etiam Siracides Ecclesiastes ait, omnes
aquas venire è mari, rursusque emenso suo cur-
su, mari se reddere. Facile Aristoteli concesserim,
omnes vel certè plerosque, (nam quosdam quasi
per impluuium distillantibus scilicet per saxo-
rum commissuras, tellurisque rimas imbribus,
surgere constat, etsi Seneca nullos fontes ex plu-
uijs auctiores fieri credat) qui suo vel nostro æuo
prodierunt fontes, ex aëre terram subeunte, ter-
ræque frigore condensato, ac in aquam resoluta
nasci. Ut enim ad mediam delati aëris regionem,
vapores, natiuo eius frigore in aquam densantur
pluiam: ita qui ab imis terræ visceribus ad con-
uexa montium antrorumque impingunt, a lapi-
dum tophorumque algore in aquam coeunt, lon-
gæque die sensim auctæ fontem orbi proferunt;
hoc tantum discrimine quod vapores in conuexa
altorum

altorum delati montium, quia lentorem nativam-
que crassitiem magis exuunt, limpidiores : qui
vero in pinguium camporum superficiem im-
pingunt, turbidiores fontes excitent. Atque ut
pluvia non semper ex aere vaporoso frigidocogi-
tur : sed & interdum ex spiritu calido & fumoso,
atque adeo animam reptilium recipere apto, ut
cum ranas pluit vel vermes : Ita & in subterra-
neis specubus, hic frigida ibi calida aqua coales-
cunt, inque fontes hae feruentes, illae algidos se
furrigunt. Vnde facilem explicatum habet, quae
multos haecenus torset quaestio ; cur hic subito
nascantur fontes, alibi vero celerrime inarescant.
Huius enim prima causa adferri potest ruina, seu
defluxus terrae intercidens viam aquis quae pro-
inde aliorsum commeant aliosque quaerunt exi-
tus : quod in terrae motibus, susque deque terram
ferentibus, crebro accidit, ut pulchre docet Se-
neca naturalium lib. 3. c. 11. Ita observatum Theo-
phrasto in monte Coryco post quandam terrae
quassationem multos novos exiisse fontes: altera
causa est sylvae arborumque nova procreatio aut
euulsio, cum enim arbores, vicinae terrae vligi-
nem, aquasque sibi in alimentum aduocent, fit in-
terdum, ut ijs denuo enascentibus, hausta & pota
ab ijs aqua, in fontes manare desinat : Et vice
versa, ut euulsis arboribus quae ab earum, radici-
bus fugebatur aqua fluere incipiat, novumque
fontem excitet. Id patrum saeculo accidisse, hoc
est anno Domini 1555. in Baia saluatoris, scripsit
Ambro;

Ambrosius perez, cuius verba subiungam. AEdificabatur inquit Iesuitis domus, eradicandaque erat ingens arbor, illa excisâ, & prolabente, cum radices sequerentur, euulsione tantum in ima humo motum agere, vt mox scaturire visus sit fons, valde potabilis, ac salubres aquas mittens. Omisso fontes quos vel Moyses, vel alij sancti quorum ingentem numerum ex vitis patrum colligere est, precibus suis repente orbi ostenderunt, vt & illos qui ethnicis aliquando velut miraculo scaturierunt, cum & liuius lib. 4. dec. 3. pro prodigio habeat, quod in vico Istrico repente emerferit fons, torrentis modo. Latentis indicia aquæ si quis scire vult, legat Plinium lib. 31. cap. 3. vitruuium lib. 8. cap. 1. palladium, & alios.

De varietate Fontium.

C A P. II.

Non alibi natura plura. quam in aquis fontium præsertim & fluminum miracula ostendit: ego nec omnia persequar quia infinitum esset, nec ea silebo quæ cum Spadanis alijsque Germaniæ quos bibi acidis, vel consentiunt, vel ab ijs non longe abeunt. Quidam fontes inquit Plinius lib. 2. cap. 103. tanta vi exiliunt, vt saxa extrudant, veluti Marisyæ fons in Phrygia ad Cælenarum Oppidum. Ego vero crediderim hunc fontem saxa non extrusisse, sed res vel casu, vel
B industria

industria in eum iniectas, obduruisse, saxeamque induisse naturam. Quod & videtur sentire Seneca lib. 3. nat. cap. 2. sunt inquit aquæ quæ in lapidem vertunt. Talem ego fontem in Euganeis vidi & ante mecum obseruauerat vnde quaque doctissimus, Ioannes heurnius, lib. 1. methodi suæ mendendi, tractatu de luto thermarum, vbi ait se vidisse muliebrem mammam in saxum euasisse, quod cum mortua iaceret, hoc fonte mersa fuisset. Alium hoc valentio rem vidi tertio à Moguntia lapide, prope Svvalbach; qui pagus aquas, ipadanis nihilo cedentes exhibet, quod meo experimento ante viginti tres annos didici; in quem pilæ palmariæ, chirothecæ, aliaque porosiora iniecta vna nocte lapidescebant: nec hoc tantum, sed & ligna vicina, sepium vicem obeuntia, diurna irrigata pluvia, ceu visa Gorgone in saxum mutabantur, in quibus videre erat partem pluuiæ imbre, vaporibus ex hoc fonte collectis madidam, lapiduisse: reliquam vero, nihil à ligni natura abiisse. Ita vt in eodem trunco: erant autem querni (continuone, an cõtiguo, alibi disceptauimus) manifestissime, lignum lapidemque, quicuis etiam Corydon iudicaret. Talem etiam vidi in Arduenna, non longe à Malmundario, cuius meminit Gilbertus Lymborch, qui primus hos fontes delineauit. Tales etiam depingit Plinius: & Leander, Plinio intactos in Italia plures memorat, vt apud Volaterras & Foroliuienses, in quos si immittantur ligna, frondes, herbæ, lapideo cortice

tice obducuntur. Ortelius etiam in Hibernia: Saxo Grammaticus in sua Dania, & Petrus Hisp. in peruaco inueniri tales tradunt. Nec hoc Paracelso, Chimistarum, vt ipsi insaniunt trismegisto, nouum videtur, qui omnes aquas sale gemmæ imbutas, vel vt ipse solæcisat impregnatas, eam virtutem in omnia ligna obtinere asserit. Additque ex vitriolo aquas, in æs mutare ferrum. Alij fontes, etsi tangenti frigidi, more efferuescentis ad ignem aquæ ebulliunt, nec tamen aquas extra vasis labra euomunt, sed eas momento resorbent: quod videre est in Sualbach in horto pago contiguo, in fonte ligneo vasi incluso. Idem facit in Elbogano acidula, quam insanam vocat Agricola. Addit Andernacus, quarto inde lapide versus Aegram, alium, tanto ebullire strepitu, vt furiosam aquam omnes nuncupent. Idem accidit fonti Thyana in Capadocia, Hoc ipsum superioribus annis in Anteniatis fontibus obseruaui, vbi duo Tyllerano vicini fontes, maximum edunt strepitum; cuius causam rogantibus hanc reddidi, Habent hi fontes capacem & vastum intus alueum, exiguum autem per quod exeunt foramen, idque ad montis durissimi imam radicem situm; cuius labra dum feriunt, duorum corporum allisu, murmur edi necesse est, affine illi quod marinis in scopulis, ab agitatæ vndis cieri videmus. Alij æstum marino similem pati videntur, nam modo intumescunt, modo resident, vt apud Larium lacum in agro Comensi, fons Italiæ pluuiana di-

Ætus, cui hoc in horas fere, aut certe sæpius in dies
euenisse ipse vidi. Huius meminit Benedictus
Iouius hoc disticho,

*Inscie cur fontem docti de nomine Plini
Ducis, ab indigenis quæ pluniana vocor.*

Hunc Plinius Iunior lib. 4. epistola ad Licinium
Surrum, quæ libri est vltima fusè describit, eius-
que varietatis causas multas, quæ tamen omnes
in regurgitationem recidunt recenset: quam si in-
tellexisset Seneca lib. 3. naturalium cap. 16. non
scripsisset fontes esse qui senis horis pleni, senis-
que sicci sint, idque occultum esse naturæ mira-
culum. Hanc regurgitationem Saxo Gramma-
ticus, in præfatione Daniæ suæ, numeratis Nor-
uegiæ similibus fontibus, quadantenus adum-
brat, esse in terra frequentissimas dicens latebras,
& sinus, in quibus aquæ non perennes, sed sparsæ
sint, ibique plurimum esse spiritum, cum quo
eruptionem quærente, manant illæ aquæ; sed cum
modicæ sint; velut regurgitatione retractæ, vi-
dentur deficere. Fieri id autem vel singulis, vel
statis horis, non aliunde putandum est, quam
quodam perpetuo fluxu & refluxu erumpentis,
& quiescentis, ac rursus excipientis spiritus; Huic
simillimum habent Turingi, quem Craterem no-
minant. Vitruuius qui Augusti æuo scripsit lib. 8.
cap. 3. Sunt inquit fontes vti vino mixti, quemad-
modum est vnus paplagoniæ, ex quo etiam sine
vino

vino potantes fiunt temulenti. Plinius quoque lib.31. cap.3. autor est ab Eudoxo & Theopompo antiquissimis scriptoribus, quosdam fontes memorie esse proditos qui bibentes inebriarent. Sorio etiam vetustus scriptor qui & huic rei vetustissimos laudat autores in Arabia ait fuisse fontem Isodum, qui hemina vini affusa, cum vino ita miscetur, totus ut in vinum dilutum, & ad potandum bene temperatum abeat. Hanc aquae temperiem, & Spadani, & plerique Germaniae fontes acidi servant optimè, imo affusi vino, fumum calidum quasi bullientis aquae quidam excitant, odoreque gratissimo nasum, bullis atque salientibus, oculos mirè recreant. Arcadiae amnem Lyncestium vini more inebriare, ultimo suae metamorphoseos, scripsit ingeniorum omnium compendium Ovidius. Hoc omnes Spadani in suetis faciunt, & ante alios Geronster, quod ego bibentibus millies accidisse, in me & aliis observavi. Verum hæc ebrietas, ne quis hinc curarum levamen, aliaque Horatiani Lyæi expectet munera, minor quadrantaria est, raroque horæ quadrantem, vel æquat, vel excedit. In alpibus Engstlijs in ditione Bernensium è scopulo fons tribus tantum mensibus Iunio Julio Augusto profluit, & quidem bis tantum in die, mane & vespere nec diutius quam pecora sint adaquata. Quod si quis fordes in alveum injiciat, indignatum flumen tam diu definit fluere, donec homines facti poenitentes fordes extrahant. Expurgato enim &

mundissimè cōpto alueo delectata nympha, rursum fluit. Huic rei testem esse Heluetiam vniuersam scripsit Stumpfius. Nostri fontes stas ignorant horas, cæterum sordes omnes, adeoque ipsum saccharum, vel casu vel curiositatis ergo iniectum, minimo temporis reiiciunt. Quod etiam in Anteniaco fonte Tyllerano, dum principi meo aquas bibenti adessem: sæpe obseruari annis superioribus. Omitto alios, ne iusto sim longior, aut ne Pliniana videar scrinia compilasse. Sitamen plura, quæ etiam curiosissimo satis sint de fontibus scire quis cupit, legat colloquium 13. Simonis Maioli Episcopi Vultuariensis, in eo tomo cui titulum fecit (Dies Caniculares) ibi illum sane vt vbique, sæculi nostri Plinium agnoscer. Transeo ad fontium vim medicam.

Medicorum fontium differentia.

C A P. III.

Quamuis medicati fontes, & iisdem, & diuersis in regionibus sapore plurimum inter se discrepent, alijque falsi, alij vinosi, alij ferrei, vel sulfurei, a gustantibus iudicentur, omnes tamen communi nomine Acidi audiunt. Medicate enim aquæ multos sinus, terræque plusquam dædaleos emensæ anfractus, varijs imbuuntur virtutibus subterraneorum, quorum aut vires, aut substantiam, aut vtrumque, secum trahunt. Itaque vt
puritas

puritas & simplicitas, fontes commendat vulgares & puteos; ita multiformis & varia rerum etiam pugnantium commixtio, medicatis fontibus laudem conciliat: qui ideo minerales vocantur, quia mineram secum trahunt. Est autem minera subterranea matrix ex qua fossilium aliquid oriri potest, seu metallum hoc sit, seu lapis, seu succus, seu gleba, terræ mineralis. Verùm quod in terræ superficie, fieri videmus, vt quædam vires suas aquæ non nisi multa coctione impertiant, alia etiam vino affuso: aut eius spiritu indigeant, quædam vel maceratione, vel agitatione horariâ se communicent: ita in terræ latibulis, quædam non nisi multo calore miscètur, idque multo post tempore: quædam nullo negotio liquantur, aquisque penitus miscentur. quæ omnia pro caloris, moræ, materierum facili vel difficili solutione, leuitate, grauitate, tenacitate, variari necesse est. Horum fontium alij quicquid habent, terræ debent quam abradunt, vt, bolo, ochræ, rubricæ, terræ lemnix, cretæ. Alij liquoribus, seu congelatis succis, vt alumini, bitumini, sulphuri, nitro, vitriolo, cuius quatuor species recenset Dioscor. (Zory misy, calchitim, melanteriam) hydrargiro. Alij metallis, vt auro, argento, æri, plumbo, stanno, antimonio, Alij lapidibus, vt crystallo, marmori, pumici, marchasitæ, hæmatiti, magneti. Alij radicibus plantarum qui rariores sunt, vel quia non tam altè radices demittunt, vel quia fontes medicati, vt plurimum viciniam habent

sterilem, soloque non frugifero scaturiunt, vti
è contrario, vbi pabula læta Cererique accom-
moda tellus, medicatarum aquarum summa in-
opia. Hoc qui hasbaniam nostram cum arduen-
na contulerit nullus inficias iuerit, etsi nunc Ar-
duenna multis maris rutabulisque rusticorum
domita, frugibus, sed Hasbanicis multo deterio-
ribus se accommodauerit hoc decennio. Ex his
omnibus, subterraneis, etsi fontes medicinam
trahant, atque horum pleraque si non contra-
riam, parum sane affinem vim sæpe habeant, hinc
fit vt aquę medicatę eędem numero, multos ad-
modumque inter se pugnantes, expugnent mor-
bos, vt infra patēbit. Proinde vt accurate fon-
tium discrimen ineamus, videndum quænam
fosilium, amicam seu congenerem, vim habeant,
quæ vero contrariam. Calent Bitumen, sal, sul-
phur, æs, calx, ideoque siccandi, incidendi, ab-
stergendi dissipandi virtute pollent. Qui calido-
rum numero nitrum adscripsit magnus Albertus
lib. de metallicis quinto sub finem, & ex eo An-
dernacus, & alij, si de veterum nitro cuius memi-
nit hippocrates libro de aëre locis & aquis, Dios-
corides lib. 5. Cap. 89. Plinius lib. 31 c. Cap. 10. Gale-
lib. 9. simplicium medicamentori. ita sensit, mi-
nus errauit. Cæterum nec illum vidisse puto; cum
iam veterum quos citavi post Hip. æuo deficeret.
Mathiolus tamen se Constantinopoli accepisse
à quacelibet Flandro, & cōmentario in Dios-
coridem, & in epistolis scribit, & ego Venetijs in-
ter

ter cappares Alexandrinas eo conditas, annis ab hinc viginti mihi ostensum memini, ab excellentissimo Santorio Santorij, tum Venetijs, iam Patavij medicinam faciente, & proficiente. Ceterum nostras sal nitrum, quod hodie nitri vocabulo vbique audit, tantum ab illo distat,

Quantum Hispanis Veneto dissitus Eridano.

Salis enim nitri frigus, si Pyrius pulvis in quo cum sulphuris calore, è diametro certat, non satis argueret, sane chymistarum sal prunellæ, quod nihil est aliud, quam sal nitrum à fecibus per flores sulphuris depuratum, frigidissimum euinceret. Huius enim minima pars vino mista, ipsum ita aliosum reddit, ut dentes stupeant, hocque vno remedio scabritiem linguæ, summumque febrium, non dico cum vulgo calorem, sed cum hipocrate ignem, oppugnent, expugnentque: si quis hic autorum testimonijs locus est, nitrum vino mixtum, ipsum refrigerare, scribit Langius lib. 10. epistola 31. ad finem. Item Ioubertus Decadis primæ paradoxo quinto, verbis extremis. Baccius lib. 5. cap. 8. alumen dicit esse terre salsuginem similem admodum naturali nitro. Doctissimus tamen Richardus Androes medicus anglus, qui annis superioribus salutis suæ causa hos fontes adiit, me cum in itinere ad fontem, hæc de re, ut fit disputans, etiam nostras nitrum calidum esse voluit: rogatusque quomodo ergo linguæ scabræ & tantum non exustæ, tam multum humorem induceret, respondebat hoc calore eius, poros

poros linguæ aperiēte, atque inde euocante humorem latentem fieri, quod qui fiat, non satis capio. Si enim febrilis calor humiditate absumpta hanc scabritiem, siccitatem, fissuras induxit; quomodo nouus calor superueniens non augebit scabritiem, rimasque? vt taceam superstite adhuc in lingua humore tam copioso, impossibile esse tantam induci scabritiem, quæ etiam loquendi vsum auferat, qui tamen nostrate nitro ad minimi ipsi magnitudinem sumpto, aut linguæ imposito, redit: totumque os madescit, nec facile nisi multo post tempore siccatur. Et sane, vt infra dicam, Tonneletius fons Spadæ alijs nitrosior, tantum ori, ventriculoque frigus communicat, quantum pauci ferre possunt. Nam actuali eius frigore adeo læduntur, vt commodi ab eo parum, vel nihil sperent, exceptis paucis, quibus hepar æstuosius, ventriculo non omnino debilitato ipsum commendat: cum ventrem valide satis, humoresque varios, seminigros, semiuirides, incertoque colore tinctos deturbet, cui rei vt & frigori nitri multum confirmando, plurimum facit illud Vitruuij lib. 8. Cap. 3. *est autem aqua frigida genus nitrosum, quod potionibus depurgat, atque per aluum transeundo, etiam strumarum abigit tumores.* Frigidorum censui plerique adscribunt aurum, argentum, ferrum item & plumbum, gypsumque, quæ cum manifesto adstringant reprimantque, ideo secundum vt minimum frigoris gradum occupant. Cæterum ferri naturam accuratius

accuratius scrutari libet quando illam multis veterum neglectam, aut male intellectam video. Ferream aquam negat in Italia reperiri fallopius tract. de thermis Cap. 8. atque utinam inquit reperirentur quia melius ageretur cum ijs qui laborant affectibus renum & vesicæ. Nobiscum benignius egere cœlites quam ut votis illis egeamus. Ferratis enim fontibus circumfluimus, ut vel hoc solo nomine ferri proprietates quantum possum ex scriptoribus rimari, meamque de eorum dubijs opinionem adstruere cogar. Gal. 9. simpl. dicit squamam ferri, siccare paullo imberillius squama æris, validius tamen adstringere. Eadem mens Dioscoridi qui addit ipsam etiam ventrem solvere, unde colligere est, cum squama æris caleat, tertioque gradu sicca sit, ferrum ab eodem caloris, siccitatisq; gradu parum distare. Sane in obstructionibus & maxime lienum aperiendis, ferrum, & chalybs, quod sola puritate a ferro distat, primas tenent. Cæterum ferrum calidisne an frigidorum censui adscribendum, necdum conuenit inter autores. Et sunt qui in hanc partem abeant, quibus fauere videtur Aristoteles 4. sublimium Cap. 6. ubi ait ferrum crescere a frigore, per euaporationem omnimodam caloris: Si inquit omnis calor euauit quid restibile est, non potest non esse algidum. Videtur eadem mens Galeni 9. methi Cap. 17. ubi ait ferrum & reliqua metalla habere consistentiam a frigore. Colligunt idem ex adstriptione ferri

ferri quam manifestariā dicunt insistendo fluore muliebri, sputo sanguinis, ipsaque dysenteria. At Galeno in 4. de simp. med. fac, omnia quę adstringunt frigida sunt. Demum vnū cymbium Aquę chaly-beatę, plus cōtra sitim valere dicunt quam sex aquę purę. Sitim autem leuantia frigida sunt. Qui pro calore stant, Hippocratem suarum partium faciunt, dicentem in lib. de aëre locis & aquis, aquas scatentes in quibus est ferrum vel aurum, vel æs ex violēto feruore erumpere ideoque in corporibus estum excitare noxamque adferre. Paullus sane AĒgineta lib. 1. cap. 52. cum calidarum aquarum seriem recēset, etiam ferreas ijs adnumerat Rhasis etiam vltimo libro continentis ait ferrum esse calidum & siccum in gradu tertio nititurque autoritate mesues; Quin & Halyabbas in quinto theoricę cap. 4. dicit aquā ferri siccare multumq; calfacere idque non aquę sed ferri ratione. Tota denique post dioscoridem AĒtium, paullum, ipsosque Arabes medicorū schola ferro hepatis lienisque obstructions aperit: at aperiō caloris est soboles. Montagnana vir longē doctissimus dicit ad pręfocationē vteri ex flegmate viscido nil pręstantius esse aqua chalybeatā itemque in ventriculi intemperie frigida, quod sane post ipsum multi in secretis numerant. Fallopius priorum argumentis victus in angustias redactum se clamat, tandem dicit pro vna caloris parte viginti esse frigidas ideoq; actu semper refrigerare. Mihi posteriorum rationes firmiores videntur

videntur minimumque ponderis priorum argumentis inesse ; vt mirer doctissimum fallopium tam imbellibus armis debellatum. Nam autoritates Aristotelis & Galeni ipsę se collidunt, cum dicunt omnia metalla a frigore coalēscere, & tamen multa eorum calida ēsse cuius notius est , quam vt disputationē mereatur Argumentum a sistendis fluxibus dubium est. Mihi constat quendam in gonorrhoea per totum mensem croco martis elaboratissimo vtentem, nec hilum profecisse, qui tamen alijs remedijs facile conualuit. Si cui in fluore muliebri, aut dysenteria profuit, non id fecit humores condensando quod frigida facere amant sed calore suo aperiendo , & causam morbosam fluxus præcipitando, per accidens siue secundario fluxus vel vterinos, vel aluinos stitit: nam & in vulneribus vidi sanguinem puluere ferri a pertissimis chymistis preparatissimo plena manu affuso, nulla ratione sisti potuisse, hominemque ad orci fauces duxisse, qui tamen colcotare cum fungis minimis (crepitus luporum vocant) parato adhibito, momento cessauit hominemque biduo & binoctio cum morte luctatum vitæ reddidit, præter spem sedecim chirurgorum, qui nec ferro candēti per horam solidam me presente admoto , quicquā profecerant. Quod de siti extinguēda afferunt: incertissimum est, & constat aqua actu frigida etiamsi potentiā calfaceret, non minus quam vino, sitim optimē extinguī. Maneat ergo ferrum esse calidum.

Hinc

Hinc ergo fontes ferruginei, sulphurei, nitrosi, aluminosi audiunt, prout huius illiusue interra-
nei dotes, supra alias sibi induerunt. Quin videre
est quosdam in quibus eminens subterraneum
ægerime dignoscas. Ita de Empsenfibus aquis,
chymistarum nostri seculi corypheus, piæ me-
morix Ernestus princeps meus, aluminosas ne
an nitrosas vocaret, dubitavit. Et in Suevia vber-
lingani disputant, plumbeum ne, an æreum fon-
tem suum indigitept. Ita Lucenses aquæ de villa,
modo ab Italis ferratæ, modo aluminosæ vocan-
tur. In alijs manifestissime plura metalla notare
est, vt de nostris infra patebit.

Cætera Acidorum fontium contenta.

C A P. I V.

Medici medicatorum fontium contenta
scrutaturi mineralia, vel balneo Mariæ
aquam exhalant, vel vitreis organis ipsam distil-
lant, prior modus quia à fuligine fauillis, atomis,
vix sibi immunitatem tutam prestare potest,
incertior est. Alterius vsus crebrior, veritati-
que eruendæ aptior. Restibiles à distillatione
fæces, semper enim quanquam limpidissimi
aliquas deponunt, quinque ferè modis metal-
lica contenta produnt. Colore nimirum, sapore,
odore, tactu, virtute denique seu operis effi-
cacia. Sali nitroque color albus est, vitriolo
viridis,

viridis, auripigmento flauus, sulphuri flauo vi-
rescens, rubet Ochra palletque, alijs alia pal-
liantur coloribus. Sapor nitri falsus est, & ama-
rus, vitrioli falsus & acris cum rosiuncula: aliud
alij sapiunt. Vt promptius discerni hæc commodè
possit, ferè candenti iniiciuntur laminae, vbi quod
funditur vt lac, alumen esse perhibetur. Calx &
marmor non liquefcunt, sed candore nouo fu-
cantur, gypsum ocysimè albescit, sulfur liqua-
tur, suoque odore, se noscendum præbet. Sal
stridendo, patescit. Sal nitrum sine stridore præ-
terlabitur fluendo: plumbum, lithargyrumque
ruborem sibi induunt. Vitrioli & aluminis ex-
amen aliqui hac ratione ineunt. Aquam cui
aliquod horum, in vase stanneo, vel æneo incoxit
ad medietatem pari quantitate aquæ, quæ gallas
decoxerit eodem decremento, remiscent. Quod
si aquæ mixtæ nigrescant, vitriolum certo inesse
aquis medicatis adseuerant. Hoc ex fallopio
descripsit Escheurenterus, tacito autoris nomine.
Experimentum istud negat Ioannes Bauhinus
certum, omninoque fallere nisi ferreis vasis in-
coquantur, & sic decoctis, gallarum decoctum
iniiciatur. Tum enim commistas iucundo specta-
culo in nigrorem surgere, vt vel hinc quis colli-
gat me rectè infra censuisse excrementa biben-
tum has aquas, non à vitriolo, sed à ferro nigres-
cere. Quanquam alumen, adstrictione satis se ex-
pertis demonstrat, sunt tamen qui bresiliū li-
gnum, aquæ fontis dum colorem trahat, inco-
quant,

quunt, cui aquæ residuum decocti fontis dum
miscent, si aluminosa sit aqua, bresilium longè
fit coloratius. Ferrum, æs aliaque metalla ægrè
cognoscas, nisi ex corruptione sedimenti, quo in
proprium excrementum verso, in metalli vnde
ipsum excrementum fluxit, cognitionem venies.
Sedimentum autem vel aceto acri, aut aqua ro-
denti promptè corruperis. His enim liquoribus,
vel siccatis vel absumptis, in superficie sedimenti
excrementa notanda, in quibus ærugo, æs: fer-
rugo, ferrum inesse aquis significabit, quod ex
limaturis vtriusque metalli eodem modo corru-
ptis discere est. Cæterum virtus operisque effi-
cacia manifestissimè hæc fontibus inesse conuin-
cit. Quo fit vt plerique delineatos diligenter ne-
gent fontes, nisi mineralium singula quæ ipsos
dotibus augent eximijs, quibusque virtutem
suam ac energiam debent describantur, quod
quando in prima editione conselto omissum est,
hicobiter quatuor fontium singularia prosequar
ne in acidorum historia fontium quicquam de-
sideretur. Ordiamur à vitriolo, à quo fontes
vel solo præcipuè accessere capite septimo pro-
bauimus. Dioscorides lib 5. cap. 74. vitriolum ait ad-
stringere calfacere, crustas inducere, latas ven-
tris tineas drachmæ pondere voratum, aut cum
melle linctum necare, vomitumque ciere: ex
aqua potum aduersus fungorum venena auxi-
liari, purgare caput aqua dilutum, & in vellere
paribus instillatum. Non possum quin lectorem
moneam;

moneam, Dioscoridem de crudo, nullisque chymicis præparationibus adulterato vitriolo capiendum, Vt enim hoc lib. non semel docui, tuto ad lumbricos argentum viuum, crebro tantum per corium transitu perpurgatum etiam à puerulis sumi, cum tamen idem vel sublimatum, vel præcipitatum etiã parua mole sumptum, homines ad sepulchrum præcipitet, Sic vitriolum à chymicis prauè paratum, gillam ipsi vocant, vomitum funestum, mortemque accersit. Vix mihi lachrymis tempero cum cogito quendam mihi amicum, chymix, omnis mathæleos & hydraulice artis maxime peritum, eundemque canonicum Fraiectensem, vt stomachum halecibus falsis, acceruisia tenui in pagis, dum metalla scrutatur, saburratum depleret, gillam à se præparatam sumpsisse, eodem die, quam diutius ipsum retinere voluisset, animam: cum vomitu insano expuisse. Viuunt oculati testes multi & ipsi canonici, quorum rogatu cum sectioni cadaueris præessem, ipso die veneris sancto, ventriculum tribus locis tantum non perforatum ad latitudinem daleri Philippici inueni, restabat tenuissima exterior tunica, cui gilla adhærebat, & ipsa erosura nisi egressa animâ, calor naturalis miserum destituisset. Totum ventriculi corpus adustum purpureo colore, omnium in se oculos aduertebat, animosque à gilla & alijs id genus pestibus serio aduertebat. Res accidit anno Christi 1608. mense Aprili. Redeo ad vitriolum quod matthiolus in

commentarijs loci citati dicit tuto ad tineas & fungorum venena dari, etsi erodens & septicæ facultatis habeatur. Mihi sane bonis ægrorum rebus sæpè eo vti contigit vt & alumine, in febribus tam contagiosis quam contagij expertibus, simpliciter bis ter aqua communi lotum propino ad duos scrupulos, vel vt vult Dioscorid aliquando ad dragmam ascendo. Gal. ipsi adstrictionem, insignem, calfaciendi virtutem adscribit, quo fit vt quæ veræ sinceræque aquæ vitriolatæ sunt, potentiâ quantum aliæ minerales aquæ nullæ calefaciant, exsiccent etiam, constipent & contrahant. Quæ vero mediocriter chalcantosæ sunt, eadem possunt quæ aluminosæ & acidæ, ijs tamen promptius penetrant, potæque per vrinam & aluum egregiè purgant, eaque præstant quæ de his fontibus dixi; quæ iam repetere superfluum fuerit.

Bitumen seu succinum liquidum, his aquis inesse eodem argumento probari potest, quò idem cap. 7. Spadanis omnibus inesse conuici, innatat enim huic fonti per noctem adseruato, tela iridis coloribus variegata, quæ & flammam sulfure luculentiozem edit, & gustus in illa, succini saporem agnoscit. Mihi ad alia properanti succini diuersa genera explicare non est animus, multo minus an carbones nostri Leodienses, quos veterum ampelitim esse terram manifestissimum est, in succinorum classem adscribi debeant: satis erit ex dioscoridis lib. 1. cap. 85. huc retulisse, bitumen

tumens discutere, glutinare, emollire, ab inflammationibus tueri, vulvarum procidentias, strangu-
lationesq; olfactu, suffitu, imposito, emendare,
comitiales morbos suffitu deprehendere, mulie-
bres purgationes cum vino & castoreo potum
elicere, tussim veterem & anhelitum iuvare, ser-
pentum morsibus, coxendicum laterumque do-
loribus auxiliari. Cœliacis in catapotio deuoran-
dum dari, cum aceto potum sanguinem concre-
tum discutere. Dysentericis cum ptisana liqua-
tum infundi : distillationibus suffusione mederi,
oblutum dentium dolores mitigare, concalsa-
ctum lethargicis, articulorum doloribus cum fa-
rina hordeacea, nitro, & cera illitum prodesse.
Gal. lib. 10. simpl. bituminis vim tum calfa-
ctoriam, tum reiccatoriam omnem secundo or-
dine dicit. Germanos ad oculorum suffusiones,
& albugines, maximo ophthalmicorum commo-
do adhibere vidi, Itemque ad lepras, lichenas, cor-
porumque pruritus. Tabernæmontanus cap. 40.
part. 2. longe plura addit, quæ qui volet ab eo
petat.

Salem acidis nostris inesse omnes consen-
tiunt. Dioscoridi autem lib. 6. cap. 126. sal ad-
stringit, abstergit, extenuat, expurgat, dissipat,
reprimit, crustas inducit, atque à putredine vin-
dicat, admiscetur medicamentis psoras abster-
gētibus, excrescentias in oculis reprimit, & perté-
rigia consumit, cæterasque carnis extuberati-
ones tollit. Clysteribus infunditur, discutit las-
C 2 titudines

fitudines ex oleo illitus, contra hydropicorum
tumores auxiliatur, dolores in faccis fotu mitigat,
& pruritus sedat ex oleo & aceto infriktus dum
sudent, Item lichenas, psoras leprasque. Anginam
ex melle aceto & oleo illitus leuat, tonsillis vuæ
que cum melle tostus, vlceribus in ore manan-
tibus, gingiuis quas tumor vexat & phagædænis
vlcerum cum polenta crematus illinitur. Aduer-
sus scorpionum ictus cum lini semine, contra ser-
pentum morsus cum origano, melle hyssopo,
aduersus cerassem cum cedria pice aut melle au-
xiliatur, contra scolopendræ morsum cum melle
& aceto, aduersus vesparum ictus, & teredines,
albidasque capitis pustulas, thymos & tubercula,
cum sæuo vitulino: furunculos cum vua passa,
aut suillo adipe aut melle discutit: testiū tumores
origano & fermento maturius concoquit, croco-
dilorum moribus auxiliatur, tritus in linteolo,
& intinctus aceto, ita vt vinctulis loca cōstringun-
tur, prodest ad bestiarum morsus & ad sugilla-
tiones in facie ex melle. Contra haustum opium
& fungos cum aceto mulso bibitur, luxatis impo-
nitur cum farina & melle, ambustis igni cum
oleo impositus, pustulas erumpere non patitur.
Podagricis item imponitur, & aurium doloribus
cum aceto, ignes sacros aut vlcera quæ serpunt
cum aceto aut hyssopo illitus sistit. Recentiorum
plerique ea ex dioscoride transcripserunt, paucis-
que verbis non mutatis sed transpositis sui iuris
facere voluerunt. Breuissimè & verissimè, fallo-
pius

pius de thermis c. 9. Aqua quæ habet in se succos
salis si assumatur in potum, detergit, roboratque
valde ventriculum, & euacuat abundantiam hu-
moris pituitosi, nec lædit aliquod viscus. Et cap.
II. aquæ medicatæ aptæ sunt ad potum præcipuæ
nitrosæ, & salis, quia præterquam quod calfa-
ciunt, exsiccant etiam expurgant & roborant,
Laudantur etiam ab antiquis. Nam Antyllus &
Ætius adhibebant in affectibus corporis interio-
ribus, imo dicunt quod applicitè exterius, faciunt
ad fugandos morbos interius.

Sulfur eodem auctore teste lib. 5. cap 83. & iu-
nioribus quibusdam calfacit, concoquit, & cele-
riter discutit, emollit, exsiccatque. Prodest tussi-
bus suspiriosis, purulenta extussientibus, ex ouo
sumptum aut suffitum. Præterea partum si vra-
tur nidore extrahit. Lepras, lichenes, scabros vn-
gues cum therebintina mistum aufert, cum aceto
autem illitum ad lepras efficax est, vitiliginis
tollit, scorpionum ictibus addita resina mede-
tur, cum aceto vero, draconis marini, scorpionis-
que plagas sanat, pruritus toto corpore erum-
pentes, cum nitro detersum sedat, regium mor-
bium emendat, inspersum fronti cochlearis men-
sura, aut in forbili ouo sumptum. Facit ad graue-
dinem & distillationes, sudores quoque consper-
sum inhibet. Podagricis cum aqua & nitro illi-
tum conducit. Grauitatem auditus raptim suf-
fiti nidore per fistulam hausto sanat. Lethargicos
suffitu excitat, erumpentem vndique sanguinem

sistit contusis auribus cum vino & melle inditum medetur, potu & balneo prauos in cerebro redundantes humores, omnesque totius corporis defluxiones frigidas desiccant, cordis palpitationem à frigidis humoribus curat, cachexiam emendat, visum roborat, vtile ad artuum ac iuncturarum dolores à venerea lue profectos: hydropem frigidum exsiccat, pituitosos & crassos flatus exsoluit, steriles mulieres fecundat. Matrici tumenti & induratae auxiliatur.

Alumen quod spadanis inesse diximus ex Dioscorid & posteriorum scriptorum mente vim habent excalfaciendi, stringendi, & expurgandi quæ caliginem pupillis oculorum offundunt, genarum carnem, cæterasque excrescentias extenuat, putrescentia vlcera compescit, sanguinis fluxum sputumque inhibet, gingiuas humore prægnantes comprimit, motus dentium cum aceto & melle firmat, prodest cum melle vlceribus oris, eruptionibus papularum, & fluxionibus cum sanguinalis herbæ succo. Lepræ conuenit cum brassicæ folijs aut melle coctum, item pruritui & vnguium scabritiei, pterigijs, pernionibus aspersum cum aqua. Valet cum aceti & gallæ pari pondere crematum, ad phagædænas vlcerum, & cum salis duabus partibus, ad vitia quæ pascunt. Furfures cum pice & eruo illitum abstergit. Ad lendes, pediculos, ambusta, cum aqua illitum auxilio est. Contra tumores & graue alarum inguinumque virus illinitur.

Aqua

Aqua aluminosa menses nullo fluentes ordine, fluoresque mensium albos emendat, vomitum compescit, nauseam tollit, urinæ incontinentiæ subuenit: obæsos extenuat, ostocopon luis venereæ tollit: varicibus conducit, obsænarum partium vlcera, scabiem, pruritumque intolerandum compescit, scorbuticorum incommodis optimum remedium est.

Miraberis lector primis dioscoridem verbis dicere alumen vim habere excalfaciendi, & stringendi, quæ verba pugnam manifestariam continere videntur, est enim vt docent interpretes Aristotelis ad capitulum secundum, secundi de generatione: calidi rarefacere, frigoris vero condensare, seu adstringere, quod etiam quarto sublimium sæpè repetitur. Quomodo ergo vir quo pauci melius de re medica meriti, eidem rei tam pugnantes adscribit virtutes? Respondeo alumen & aquas aluminosas qualitatibus constare contrarijs, in eodem tamen se subiecto ob remissionis ac intensiõis diuersitatem tolerantibus. Constat ergo alumen partibus mediocriter calidis, & valde siccis. Præterea insignite frigidis, & potenter adstringentibus, eoque nomine aquæ aluminosæ, primo gustu saporem adferunt prædulcem ac tenuem, pungentem linguam, demum ob qualitates siccas, & frigidas, in amarulentum desinunt, ac valde adstringentem, sed hæc alibi fusius.

Boli seu rubricæ quam in omnibus fermè
C 4 acidis

acidis reperire est, hæ vires creduntur, omnes hoc ijs familiare aiunt, quod exsiccat, astringat eaque ratione venenis in cor ituris viam præpediat, proindeque omnibus alexiterijs, dysentericisque remedijs misceri, In emplastris, exsiccantibus, & adstrictorijs eius vsus maximus, aluum sistit, & sumpta & clysmate iniecta. Iecinoris vitio laborantibus utilis. Qua de re gal. lib. 5. simp. multa: qui cum in omnium manibus sit, non est cur ex eo describendi laborem sumam. Mihi in putrescentibus oris vlceribus maximus eius vsus. Item ijs quibus ex capite in thoracem defluxio incumbit, adeo vt phtisis principio laborantes, mutum inde iuuari compererim, cum & aut fistulas quæ difficillime siccantur, hoc vno remedio ad cicatricem duci constet. Toxicis, Philtris, venenisque aduersatur omnibus: pesti ipsi, qua nihil tetrius, ab irato deo Regius psaltes impetrare ausus fuit; fælicissimè resistit, vel nondum ea occupatos præseruando, vel iam laborantes, è Cerberi faucibus eripiendo. Cordi vnice studet, cerebrum reficit, viscerum malis strenue aduersatur, Cephalalgiam pænè omnem, cardialgiam, cordis palmum, oculorum inflammationes, lippitudines, fluxiones curat, hæmorrhagiæ cuius, vel ex arterijs fluenti ita promptè succurrit, vt nulli alteri medicamento cedat. Catharro seu in rheuma, seu in coryzam degeneret, inimicatur. Hypercatharsecos optimum sufflumen, ambustis vel aqua vel igne, vel metallo liquato, ita succurrit, vt & pustularum

stularum incrementum prohibeat, vulneribus, vlceribus nouis iuxta ac antiquis, optatum remedium. Anginæ aliarumque partium internarum inflammationibus præsentaneum est auxilium, ad scabiem sædam, curatuque per difficilem, malaque quæ sudore egent accommoda.

De Spadanis fontibus sigillatim.

C A P. V.

Columella lib. 1. cap. 3. neminem nostrum ait, vel prosperæ, vel aduersæ valetudinis vitam prorogare sine aqua, putatque aquam dictam à quâ fiunt omnia. Et sane si Aristoteli primo phyticæ ascultationis cap. 2. & Senecæ naturalium lib. 3. cap. 12. credimus, Thales omnium rerum principium, vnâ aquam posuit. In quam etiam sententiam descendit Empedocles qui omnia ex aqua fieri credidit. Et Hippon quidam apud Aristotelem lib. 1. de Animâ cap. 2. animam vocauit aquam, quamuis aquæ nomine semen ipsum intellexisse multi putent. Ipsus Hippocrates principia vitæ Aquam & ignem posuit, & sane cum multa animalia igne carere possint: aquâ quod sciam nullum, si modo diu & bene viuere debeat. Verum hac encomia Spadanis aquis, alijsque medicatis, adscribi debent, nam vix annosiores, homines sub nostro cælo, quam Spadanos inueneris. Quare si quod ait palladius lib. 10. rei rusticæ

rusticæ cap. 4. incertissima aquarum æstimatio ab
accolarum incolumitate petenda est, Spadæ au-
tem inquilini morbos plerosque, nisi quos in
aduenis vident, ignorent: capite, pulmonibus,
præcordijs, renibus &c. valeant: eorum aquas
optimas esse, certissimum est. Quod idem de alijs
Germaniæ vtriusq; locis, horum fontium innu-
meras scaturigines exhibentibus, dictum velim.
Etsi autem acidorum fontium, & Spa, & quod
reliquum est Arduennæ, magnum expleat nu-
merum. duos tamen, qui mihi præscripserunt,
maximè commendant; Sauenirium & Pouhon-
tium, quæ nomina, sine nomenclatore, nec ipse
latinæ eloquentiæ pater, caperet Cicero, cæte-
rum quando & ipse monet, *re intellecta, nos in usu
verborum faciles esse debere*, consueta, totique iam
Europæ nota retineamus vocabula. Sauenirium,
quasi Sabinirium, à Sabino Romanorum Tribu-
no castra ibi metante. Pouhontium à verna-
cula voce pouher, gallicè puiser, id est haurire
deriuant. Vnde forte & latinorum putei, quos
tamen Goropius à Cimbrorum putten, quod
ipsis etiam haurire est, commodius quam alia
deriuaret. Sauehirius horæ spatio à pago Orien-
tem versus seiunctus, è saxo saltuosi erumpit col-
lis, vixque duas cauo lapide excipit amphoras,
vt ego bicongium sæpe nominarim. Alter Me-
diastinus pagi, forique meditullio eleganti clau-
sus marmore, plusquam quatuor orcarum capax,
quotidianæ siti explendæ, etiam æstuante Syrio
sufficit,

sufficit, & tamen infinitæ in dies lagenæ ex eo
implentur, in vicina eburonum loca, Britan-
niam, Hollandiam, Galliam, Germaniam, Ita-
liam ipsam mittendæ. Vterque insigni sed grato
acore commendabilis, cum miracula quæ in me-
dicina fieri dixit Celsus, pluria ediderit: multos
ex Æsculapij Lyceo, in Spadana senticeta pelle-
xit, qui tot supernaturalium effectuum causas,
acri ingenio scrutarentur. Quo in studio Gerin-
gus, Ryetiusque, Philippum Bezanonium Pari-
tensem Medicum, in laudis partem aduocant, qui
Galenicis chymistarumque artibus apprime in-
strikti, destillatorijs organis has aquas, ad sua re-
uocantes principia, compererunt Sauenirium,
rubricam seu ferri matrem, ochram, æs, sulphur,
vitriolum, nitrumque imbibisse. Pouhontium
autem ferri, æris, plumbi, chalcanti, sulphuris,
aluminis, nitri, cerusæ viribus imbutum. Notat
Ryetius, Bezanonium putasse, quod etiam ex
aliorum opinione recitat Frambesarius, & aurum
vim suam communicasse Sauenirio; se vero, co-
gitantem, Arduennam auro gignendo ineptam,
denuo maiori studio chemicis instrumentis has
aquas segregasse, errorisque causam comperisse,
quod sulphur colore auri æmulo, vasa inter co-
quendum tingeret. Cui sententiæ vt facile subscri-
bam, facit, quod in Arduenna duos trientes anni
hyems occupet, solemque auri patrem, vix trime-
stri sentiat. Accedit, quod Arduennates, natalis
soli pertæsi, ima eius penetrarunt viscera, nec
tamen

tamen auri ramentam vnquam effoderunt. Præter hos duos fontes Ryetio & prioribus descriptos, duo alij hoc decennio celebrari cæperunt. Geronster qui iam tum Ryetij tempore innotescebat, & Tonnelet, cui, hoc nomen factum, quod ligneo vase, Tonnam vocant indigenæ, claudatur. Sed hi duo fontes immane quantum à se discrepent: Geronster meridianam Spadæ oram tenens, horæ ab ea spatio distat, omnium supra citatorum metallorum potens; cæterum Chalybis in eo primatum vires tenent, quas odore, Sapore, alijsque experiundi vijs admotis, facile percipies: acri nidore inter bibendum nasum ferit, ipsum caput chalybeo, & quasi sulphureo odore implet. ebrietatem quadrantariam vel semihorariam ijs qui debiliore sunt cerebro, momento inducit; stomachum aluumque turbat multis, quo fit vt plerique ijs potis; sæpius, etsi partem vomitu reddiderint, aluina excrementa deponant, priusquam domum redeant, & tamen non segniter urinam reddant. Tonneletius medio inter Sauenirium & Pouhontium, sed ad latus læuum deflectit, fere itinere, in plano sed vliginoso palustrique, omnibus Iouis Aeolique iniurijs exposito, coiuit loco. Nam Sauenirium & Geronster arbores opacant, natiuæque rupes comoda poturis sedilia prebent. Pouhontius pulchro vndique superbit marmore, sedibusque lapideis bibentium seu ignauiam, seu lassitudinem leuat. Sale nitro cæteris hic multo tinctior, quo fit vt

gultu

gustu frigidissimus sit longiusque à vitrioli, sulphurisque dotibus abeat. Verum hac de re infra sigillatius. Sed quando supra distillationis facta mentio; distillaui, & ego ante sex annos hos quatuor fontes, cum doctissimo medicorum Illustri viro Domino Guilhelmo paddij, equite & medico Regis magnæ Britanniae, & Domino Richardo Androes socio ipsius & viæ, & artis, neque in fundo vasis nitidissimi (Nam quicquid aquæ effluxit, flegma dulce fuit, & ingratam calcem sapiens, & quod cuius horreret) præter rubricam, matrem ferri, ochram, tantillumque vitrioli inuenimus: præterquam quod distillata aqua Geronster, in fundo, maculæ vnguis magnitudine erant; quæ cuius sulphur videbantur: cæterum laminæ candenti iniectæ, non liquefiebant, quod tamen sulphuri ab aquis thermarum aquensium relicto (nam & illas iisdem organis distillaui) accidebat; itaque postmodum prudentiores chalybem esse iudicauimus. Quomodo ergo hec mineralia his aquis mista sint cap. 7. disputabo. Gæringo autem & Ryetio peritissimis medicis, Sauenirium distillantibus, apparuisse Sulphur, non item nobis, si quis mirabitur, legat Doctissimi Libauij epistolarum chemicarum paginam vltimam, cuius hæc sunt verba de fonte Bernheymensi, *Aliquibus apparuit aliquid sulphuris, mihi vero nihil, & fieri potest, vt diuersis temporibus, diuersæ se promant mineræ*, Hanc Libauij sententiam quotidiana microcosmi experientia confirmare

firmare ausim, nam quidam sabulo vel arenis multum vexati, sepe vrinas (quibus nihil fallacius) medico ostendunt limpidissimas, imo multos noui, quos cum ex ratione victus, & doloribus ea regione fixis, certo nephriticos iudicarem, nec illis persuaderem, iussi vt in capacem matulam, totos quinque, vel sex dies quicquid mingebant colligerent, ita demum limpidiori, & ea quæ innatabat vrina abiecta, in fundo vel statim, vel post euaporationem, arena ipsaque imminentis calculi materia, se prodabant. Si vrina totius serum sanguinis, in renibus secreta & collecta, non semper quod in illis, etiam copiosè continetur secum vehit, cur non & fontes aliquando aquam raptent sinceriores; vno aut, pluribus mineralium suorum, ad tempus dissimulatis? Accedit quod fontes non sequantur certam ac ratam, multoque æuo definitam naturæ originem; sed fortuitis mineralium concursibus obnoxij, inordinatè mixtorum conditione, mixtioneque vtuntur. Fortuna enim casusque magnum in aquas ius habent; eademque eiusdem fontis aqua, diuersis temporum interuallis, accessu recessuque diuersarum minerarum, dissimillima sibi prodit, effectusque humano corpori varios conciliat. Sæpius itaque & diuerso tempore distillandus fons, vt subterranea in eo latentia probe noscantur, quod, si Deus vitam suppetet, proximo à me anno fiet vt & sæpius hoc sexennio factum est.

Discrimen

Discrimen horum quatuor fontium.

C A P. VI.

I Diotæ qui solo sapore aquas discriminant omnes acidos fontes, in eandem classem referunt, rati hoc ipso quod acescant, earundem esse vitium: ignari multum differre, vnam ne, an plures secum mineras vehant, clari ne an turbidi; Fossilium substantiam, an vapores tantum, aut spiritus secum raptent. Aliter Philosophi & Medici, inter quos conuenit, omnes qui in Spa fontes, fossilia eiusdem naturæ continere: dispari tamen quantitate; ita vt alter alteri proportionem certa præcellat, eximijsque in re medica dotibus palmam præripiat. Cæterum quando maius & minus, vt ait Philosophus 7. auscultationis Physicæ cap. 4. Speciem non variant, tantumque excellentiæ discrimen relinquunt, videamus cui primas in hac quadriga demus; Sauenirij aqua, exhalationibus seu tenuioribus fossilium, spiritibus referta, leuior est alijs quibusuis aquis, etiam per chemistarum organa distillatis: Fossilium enim vires magis quam substantiam sibi induit, quo fit vt per corporis venas promptius meet, maturiusque vim suam diureticam exerat quam alijs. Vnde etiam ab ortus sui loco nisi diminutis viribus transferri nequit, adeo vt procul delatus leuitatis

leuitatis multum perdat, grāuiorq̃ue efficiatur, eductis nimirum spiritibus aquam leuiorem red-
dentibus, quibus amissis ponderosiores cadaue-
riq̃ue similioreseffici necesse est. Decedit etiam
quantitati aquæ, nam vase optimè obturato, nec
vlla gutta dilabente, si fons hic alio transferatur,
minuitur, quia spiritu turgentia, plus loci, quam
eo priuata occupare amant. Frambesarius doctus
Christianissimi Regis medicus, scribit se bidui
itinere absentem, 48. lagenas Pouhontij, 12. Saue-
nirij afferendas curasse, illas acidissimas se gu-
stasse, has vero nihil à communibus discrepasse,
cum illæ plenissimæ essent, hæ non item, vt qui-
bus singulis aquæ vitrum decesserat, cum tamen
vtræque apud suum fontem, & eodem modo, ab
eodem homine picatæ & subere obseratæ fuissent.
Hæc hætenus maximis viris credita & scripta,
quia priori editione publici iuris feceram, hic re-
petenda duxi. Cæterum toto hoc sexennio con-
trarium mihi videre contigit. Et norunt multi
Sedanenses qui Bullonio Duci ex Sauenirio plu-
rimas quot annis lagenas hauriunt; integerrimas
eo deferri. Hoc biennio principes sæminæ ad-
stantibus mecum Dominis Harlem, & de Brie
doctis Medicis, ad lectum Sauenirium deferri
curantes, negabant quicquam illi aciditatis de-
cessisse; eundemque quem ipsa habet in scaturi-
gine, saporem constanter retinere; etiam nos ad-
ferebamus. Quo fit vt iam plerique Leodienses
aquas ex solo Sauenirio petant, quas tota hyeme
bibant,

Bibunt, cui rei si opus fuerit, plurimos fide dignif-
simos, testes laudabo. Ita vt optimo frambesario
alijsque, ab infidis baiulis impositum putem. Pou-
hontium quouis transferri cuius constat. Ego
sane ante ipsos sedecim annos, ducentas exeunte
Aprili impleui lagenas ex Pouhontio, quas in
Angliam Illustrissimo Christophoro Harlæo
Comiti Bellemontio, Christianissimi Regis ad
Iacobum magnæ Britanniæ Regem Legato de-
tuli, easque nihilo deteriores, quam in ipso fonte,
cum prælibarem Domino poculum, (eram enim
ipsi Medicus domesticus) inueni Geronstero huic
operis celeritate nil cedit! imo in multis superat,
nam & inter bibendum sæpe secundo, tertioque
haustu, ventriculum vomitu deplet, multo ipsum
tenacique flegmate leuat. Sæpe intestina pondere
suo liberat, sæpius etiam vrinam quibusdam ciet,
& si qui ad vomitum tardiores sint, eos sudore
non molesto, ab egerendi scilicet conatu, persun-
dit. Et hic quia transferri commodè potest, mi-
nimumque virium amittit; plurimum sub-
stantiæ metallorum secum trahit. Pouhontius
mineralium & ipse plerorumque particeps, sed
magis terrestrium, cum alijs in montium cacu-
mine positus vallem occupet, ideoque vtrique le-
uitatis palmam relinquere creditur pigriusque
potentiam suam, vt nunc sumitur exerere, etsi &
hic quia salis petrosi plus continet, intestina Saue-
nirio citius, tardius Geronstro, stimulat. Certo
tamen scio quod si ad Pouhontium tam exerci-

tato, quam ad alios supradictos veniretur corpore, cum nihilo segnius Sauenirio aquas motorum, quod & in me & in alijs consilio meo vsis, qui ipsum post horarium exercitium bibebant, expertus sum. Quæ causa est cur nunc plurimi, Sauenirio neglecto vnus Pouhontij aquas utilissime bibant. Tonneletius minus prædictis vitrioli & sulphuris, plus salis nitri (quem cum sale petreæ idem esse dicit, post multos alios, qui primus de his fontibus scripsit Gilbertus Lymborch) nam pleraque alia communia ceteris habet hic fons, etsi longe imperfectius; tum quia natua vligine & cæno, facile sordescit, tum quia omnes imbres momento, capacissimo vase ligneo, & nulla re obsistente, combibit. Hunc tamen fontem excellentissimus Andræas Treuissius Archiducis Alberti Medicus, muro bipedali sepsit, eumque multis commendauit, cuius rationes, quando sub prælo librum eius esse audio, cum viderimus, amicè expendemus. Hic quod in priori editione omissum serio duo monendus mihi lector. Primum: Cum leuitatis aquarum discrimen inimus, ne quis erret, aut magni ponderis interuallo distare aquas putet, Libraui aquas Sauenirij & cum semetipsis distillatione sublimatis, & cum ex prope fluente riuulo petitis, & fere grano distare reperi, minimumque aut nihil omnino interesse inter aquas ex Sauenirio distillatas, & naturales ex riuulo petitas; etiam si Columellæ præscripto adulta ætate periculum fecerim; tunc enim quia pluriæ
admix-

admixtionem non timent sincerissime sunt aquę.
Idem feci in Anteniaco, eodem omnino euentu,
vt vere post alios dicere possim, incertum, nulli-
usque artis hoc examen aquarum esse, quodque
industriam medici etiam diligentissime muntus
suum obeuntis eludat, adstantiumque spem fru-
stretur. Docet hoc & Plinius lib. 31. cap. 3. dum ait:
*Quidam iudicant statera de salubritate, frustrante dili-
gentia, quando perrarum est, vt leuior sit aliqua, nullo
pene momēto ponderis aquis inter se distātibz.* Expedi-
t ergo doctoribus qui ex Arabum doctrina aliam
excogitarunt rationem, aurem præbere. Hi nos
iubent duos pannos laneos lineosque accipere ex-
quisitissime eiusdem ponderis, aut certe gossibij
duo pōdera accurate paria quę aquis quarum le-
uitas, in dubium vocatur eodem temporis mo-
mento madescant, dein sollicitè simul extracta
nullo loci temporisue discrimine, ad siccandum
reponantur, eique leuitatis palmam deberi, cuius
pannus aut gossybiū, prius exsiccatus fuerit.
Hoc enim maioris tenuitatis & quę tenuitatem se-
quitur leuitatis, esse argumentum vtpote quę ci-
tius euaporari potuerit. Quod & si hos pannos
deinde staterę imposueris in his ponderum mo-
menta considerata dubium leuitatis expedient.
Iouertus decadis primę paradoxi quinto, cylin-
dro ligneo aquis iniecto certissimum earum leui-
tatis iudiciū sumi probat hoc argumento: quia
quo leuior aqua est, hoc & tenuior, ideoque in-
iectum corpus facilius ipsam permeat; Grauiorem

efficit crassities, vt marinam quę hoc nomine vastissima sustinet pondera. Hoc de lacu palestinae Asphaltite siue Sodomeno a circumstantibus stagnum montibus, quos sodoma vocari ait Galenus lib. quarto simpl. post Aristotelem, Iosephum & Plinium; qui & testantur, hominem ligatis etiam manibus & pedibus in eum coniectum, non mergi. Nos in horum fontium mentione cum Galeno leuissimam vocamus aquam, quę Hypochondria non grauat, citoque permeat: quod sine dubio aqua cuius substantia tenuissima est, cum qualitates contrarias facile admittat, præstabit. Alterum quod monitum serio hydropotam meum velim: His annis tam in Sauenirio quam in tonneletio nouus fons prodiit; & quidem in tonneletio, quem quia vase ligneo minus capaci excipitur minorem tonneletium vocant, fons est priore multo acrior, vehementiusque aluinas, vesicęque sordes deturbans: etsi vix sesquipede a priore distet: quod quotquot gustarunt ingenue falsi sunt. In Sauenirio, octauo a priori pede, hoc biennio alius erupit in arboris trunco, priore quadruplo capaciore, cæterum eiusdem omnino saporis & efficacię, quod qui linguę suę, operationibusque aquam potam sequentibus non credit; oculis suis saltem fidem habeat; certe videbit eadem rubricę ærugine, alijs mineralium coloribus, huius ligneum, lapideum alterius alueum vndiquaque obduci, vt iam plerisque in confesso sit ijsdem mineralibus vtrumque tingi, nihilque inter illos esse discriminis,

discriminis, quia tamen veteres auias de corde reuellerè difficillimum est, multi horas totas & amplius, prioris Sauenirij aquas expectare malunt, sepius enim in horas siccatur & affluxus nouæ aquæ expectandus est; quam ex nouo nihilo deteriore eiuſdemque acoris & virtutis potum petere.

Vnde acorem habeant hi fontes,

C A P. VII.

A Cidos esse Spadanos fontes, dicunt omnes, scribunt multi; cæterum qui acoris huius causſam redderet, ad hanc diem vidi neminem. Age ergo multis intricatam tricis quæſtionem quantum præſentis inſtituti fert breuitas, hoc capite extricemus. Plerique veterum duabus de cauſis acceſſere res aſſerunt, primam aiunt eſſe putredinem, probant exemplo vini in acetum degenerantis: hoc enim per putredinem fieri, cum grauiffimorum auctorum teſtimonio, tum Gal. in lib. de Simp. med. Fac. auctoritate patet: Aliam cauſam, caloris imbecillitatem aſſignant, à quo diuerſarum ſubſtantiarum partes perfectè nequeant concoqui, vt in fructibus acidis videre eſt. Ceterum neutra harum cauſarum aquis noſtris aciditatem conciliat, cum iam per tot ſecula maneant acidæ, incorruptæ tamen, lymphidæ, illimes, ſynceræ, putredinis expertes, nec eſt aſſignare

D 3 tempus

tempus quo in fonte corrumpi incipiant, atque à sua illa puritate acida deflectant, quæ omnia in alijs rebus putridis, minime solent contingere. Imo, quod observabile, si quando in penuarijs malè obleratæ putiscunt, acorem omnem, contra quam solet vinum, cereuisia, & talia deponunt; saporemque aquæ communis induunt, & ruffo colore tinguntur. Non etiam cruditas & indigestio acescere illas cogit; qui enim caloris imbecillitatem imaginemur in re, quæ sua natura caloris omnis actualis expers dicitur. Addenda ergo veteribus causa tertia, acidæ videlicet rei permixtio, quam & si Aristoteles silentio inuoluisset, ut alia videatur multa, tamen eam satis expressit, cum aquam ex accidenti acescere dixit. An non id quod aquæ naturam adulterat, corrumpitque, ex accidenti est? omni carere aqua sapore debet, omni que calore, cum natura eam frigidam humidamque finxerit. Vitruuius paulò exactius rem docet, cum ait succum natura acidum, in terris concorporatum, in ipsis aquis aciditatem facere, cæterum huius succi, nec nomen, nec operandi modum exprimit: Fallop, vir doctissimus à quo qui thermas describunt, plerumque decurrunt, etsi de fontibus paucissima scripserit, hos tamen fontes adumbrare tribus verbis videtur, quando fontium meminit, quos corruptissimo nomine Stpalia nominat, eosque acescere dicit quod in se habeant chalcantum, aliqua ex parte affatum, aut quia vehant aluminis quid parum exusti.

exusti. Si quis meæ coniecturæ locus est, putaue-
rim plerumque ex chalcanti commixtione, acore
aquis conciliari: quanquam & ferrum & an-
timonium, & argentum viuum, saporem hunc
vel quadamtenus inducere: vel inductum augere
possint. Sæpe enim expertas sum, butyrum An-
timonii, quod est oleum, ex pari quantitate anti-
monij & sublimati distillatum, paucis guttis cui-
us liquori acorem conciliare, vel parem vel ma-
iorem, quam ab oleo vitrioli expectare possis.
Fontium tamen nostrorum saporem acidum,
vel soli, vel præcipuè chalcanto deberi conijcio.
Coniecturam hanc duæ rationes firmant, vtra-
que ni fallor euidentissima, vna est, quod vbi in-
ueniuntur acidæ, ibidem aut certe locis conter-
minis chalcanti fodinas reperire est. Altera quod
chalcantum saporis sit acidissimi quod norunt
omnes chimistæ, qui vel chalcanto, vel eius oleo,
aut spiritu, quo nihil acidius, dicto citius tinctu-
ram rosarum, acore iucundissimo cum febribus
calentissimis, ipsaque peste pugnantem, concin-
nant. Certus sum quemlibet cui pituita nasum
non obstruxerit, huic coniecturæ suffragaturum,
ceterum quomodo chalcantum seu vitriolum
aquis se, aut acorem suum comunicet, non est
cuius obuium capere. Tres omnino modi sunt
quibus id fieri solet, vnus quando ipsa aquæ sca-
turigo seu venâ, mineram adlambens, secum ra-
menta ducit seu mineræ excrementa, quo spectat
illud Arist. in lib. de sensu & sensibili. *Tales sunt aquæ*

*qualis est natura eorum per qua transeunt; quod longe
fufius non vno loco secundo sublimium ante do-
cuerat. Hunc à plerisque quos legerim receptum
modum, imò ab ipso Galeno l. de Simpl. Med.
fac. vbi ait Quæ exactè ac sincerè aqua est, si per bitumi-
nosa, sulphurea loca discurrens, substantia eius aliquid
absterferit secumque traxerit, & quæ sequuntur: re-
ijcit Tabernemontanus, inquiens hoc modo non
fontes tantum, sed & tota flumina medicamen-
tosa fore, cum Rhenus, Albis, Tagus, non tan-
tum auri mineram adlambant, sed & aurum se-
cum vectent, ea copia, vt & nummis cudendis, qui
etiam inde nomen trahunt, sufficiant, multique
illo colligendo occupati, se suosque alant: Addit
tantum abesse vt aurei, argenteique nummi vir-
tutem vt vllam aquæ cui iniiciuntur communi-
cent, vt etiam alijs citius, aquæ metallis istis medi-
catæ putifcant. Respondeo per mineram nos non
intelligere perfectam & omnibus numeris abso-
lutam, & tam solidam, vt & ardentissimarum
fornacum vim eludat: sed crudam, inchoatam,
& longa die nisi ab aquis rapiatur, in solidum me-
tallum vi solis concreturam. Deinde, etsi quæ no-
minat flumina etiam hanc nouitiam secum rapta-
rent mineram, tam vasto tamen alueo, tantisque
aquarum gurgitibus ita obruerent, exiguam eius
quæ paruis sat est fontibus quantitatem, vt nihil
inde mutari viderentur. Cæteroqui scimus aurum
vel argentum quod septima flamma recoxerit vt
loquuntur psal'morum interpretes, parum vel ni-
hil*

hil virium aquæ datûrum, si quis ipsum vel syncerum, vel candefactum, vt vulgo fit, injecerit. Alter modus est, cum vapor chalcantinus è minera surgens præter labentibus, vel vicinis, miscetur aquis, vapores enim retinere saporem rerum vnde eleuantur, docet in 4 sublimium Aristot: quo fit vt & aquæ ex ijs concretæ, ijsdem qualitatibus imbuantur, dulcoremque aut acorem a quibus exhalarunt, subterraneorum retineant. Postremus cum idem vapor supernè genitus, ex ambientis cogitur terræ frigore, & in aquam acidam mutatur, quæ demum fonti vicino mixta, totum fontem, aciditate gratissima, & quæ palatum assuetum parum feriat, imbuir: & hæc sane acidarum omnium præstantissima,lympida, argentea, syncera, minimum ab aqua vulgari, si aciditatem auferas differens. Quærat quis quo nam horum modorum spadaneæ acescant. Hoc sane facile cognosceret qui leuiter philosophia tinctus, solis hos fontes libarit oculis: nam Sauenirius maxime pellucidus, syncerus, tot sæcula incorruptus manens, cui ingeniosissimi illud poëtæ quadret, *fontes erat illimis nitidis argenteus vndis*, certe chalcanti mineram secum non rapit, crassior enim haberet substantiam, ipsiusque mineræ odor, nasum vapore, non iucondo feriret, nunc autem substantia tenui, odore saporeque periucundo se omnibus commendat, accedit quod cum substantia mineralium crassior, fontibus se miscet, vt plurimum circa fontis scaturiginem lapidibus vel tophis adherendo

hærendo se prodit, vt in agro Neapolitano a puz-
zolo alla solforata, videre est, vbi quæ maximè
bulliente aqua feriuntur saxa sulfuris substan-
tiam concretam exhibēt. Hoc & Aponi, & Weis-
badenses & aliæ Thermæ spectaculum præbent.
Itaque alterutro posteriorum modorum, vel
quod magis credo vtroque acersit Sauenirius:
quod idem fere de Pouhontio & Tonneletio di-
xerim. Ceterum Geronster, qui omnibusemun-
ctæ naris, ferreum & sulphureum nidorem sapo-
remque manifesto exhibet, virtutesque sulphuri
& ferro à medicis attributas, liquido ostendit,
sine dubio sulphuris ferrique mineram (primam
illam necdum concretam intelligo) præter va-
porem secum trahit. Quod vtinam nummiperdæ
quidam terrarum scrutatores, suo nos aliquando
lucro doceant. Valeant ergo qui nugacibus moti
argumentis, æris florem leu chalcantum, aquis
nostris negant. Si inquirunt his fontibus chalcant-
um misceretur, egregiè calerent, insignitaque
acrimonia linguam ferirent, Atqui nemo ijs po-
tis acrimoniam aut calorem, quin potius calor-
is leuamen experitur. Huic nodo tam imbelli, fa-
cilis est cuneus. Dicimus enim aquas medicatas,
etsi chalcanti, & aliorum viribus fossilium re-
rum, quas decursu ad lambunt misceantur: earum
tamen vires non nisi fractas, imminutas, atque
debilitatas obtinere. Maxime cum terras perla-
buntur, quæ contrariarû virium mineris scatent,
vt fit Spadanis in aquis, in quibus chalcanti feruor,
frigore

frigore rubricæ, ærisque, sat superque temperatur. Fingamus chalcantum, sulphurque tertio gradu calere, ideone aquæ horum qualitatibus aut substantia tinctæ, eodem caloris gradu æstuant? Non ita: cum videamus sulphurearum aquarum quasdam actu frigere, alias tepere, nonnullas feruere, vt vel ouo coquendo, vel auibus deplumandis sufficiant, prout nimirum multum parumque, sulphuris & a quo maxime æstuant bituminis, admixti habent. Iam vero plurimum vitrioli Spadanis inesse fontibus, eosque eo vel solo, vel præcipue, acescere, hinc patet: quod si certam vitrioli, etiam nostratis portionem in aquæ cymbio dissolueris, aut olei chalcantini stillatim guttas aliquod inieceris, aquam Spadanam æmulaberis, eius gustum lingua percipies, eosdemque fere effectus, in leuandis morbis consequeris. Demum multi qui hanc aquam balneo maris, vel alio vase, quo chemici salium curiosi aquas euaporant, Spadanam exhalarunt, chalcantum inuenerunt vt Geringus, Ryetius, Besansoni, ego & alij. Denique in locis spa vicinis prope Franchimontium magnæ sunt fodinæ, ex quibus vitriolum sulphurque, maxima quantitate Eburones eruunt. Commune hoc omnibus quatuor est fontibus, quod cum eorum aquæ in vase aliquo terreo adseruantur, etsi primo limpidissimæ appareant, post aliquot horas multicolorem iridisque cælestis æmulam pinguedinem, vt in renum colliquatione, aut telæ araneæ, similem,

æmulam, innatantem habent. Hanc sunt qui sulphur esse putent, eo quod si exhaletur, sulphuris vt aiunt mineram in fundo relinquat. Ego vero, quod puto plerosque mecum sensuros, succinum liquidum esse crediderim, vel quia clariorem sulphure flammam edit, vel quia gustui succini saporem exhibet. Commune item omnibus cauum quod implent, siue ligneum sit seu lapideum, vicina item saxa & quos pertranseunt syllanos, aut canales, rubro, vel subflauo colore inficere, qui nihil est aliud quam mater ferri, seu rubrica illa quam dixi. Et illud, quod omnes iniectas occidunt ranas, gambaros seu astacos, quos male hic caneros vocant, pisces item minores, nam in maioribus periculum non feci.

Quales sint hi Fontes.

C A P. VIII.

Medici aquarum aliarumque rerum quas in vsum vocant medicum, qualitates indagaturi, primum sensibus (est enim medicus artifex sensatus) quantum possunt eas explorant: deinde ab earum effectis, hoc est vt scholæ loquuntur a posteriori sumpto argumento, earum cognitioni incumbunt. Qui modus etsi prior, maximè cum ratio sensuum iudicio subscribit, certissimus sit, longe priore communior, vsuique nédico cum primis accommodus censetur. Hinc
illa

illa qualitatū in primas, secundas & tertias trita
iam in scholis distinctio; ex quibus cum formas
rerū substantiales rimemur, quarum nullam
tamen, si immortalem hominis excipias animam
nouimus; aquarum nostrarum qualitatibus om-
nibus penitus scrutandis incumbamus. Constat
sane omnes hos fontes actu frigidos esse ac hu-
midos, ceterum potentia calidos & siccos. Pri-
mum, quisquis eas biberit fatebitur; cum sitim
iucundissime extinguant, quam tamen esse appe-
titum frigidi & humidi, qui Indosthermopotas
non nouerat, definiuerit Philosophus. Alterum
infra probabimus, cum de earum usu agemus.
Experientia quibus hæ aquæ misceantur subter-
raneis nos docuit, cæterū qua proportione com-
misceantur, quod quot mihi præscripserunt, in-
genue nescire fatentur, nec sane video quā accu-
rate sciri possit quem inter calida & frigida, hæ
aquæ habeant ordinem. Hoc in origine Nili, aut
Democritæo in puteo, cum veritate latet. Nimi-
rum in luce rerum tenui, homines caligamus, in
mediocri cæcutimus, in maiore talpæ sumus, in
maxima insanimus. Sufficiat ergo scire his aquis
ferri, sulphuris, chalcanti, aliorumque fossilium
vim inesse, qualitatū tamen primarum pro-
portione manente incerta, siue varietatem sub-
terraneorum consideres, siue bibentium disposi-
tionem diuersam; cum hic pituitæ, illebili flauæ,
aut atræ medelam quærat: ille idoneis medica-
mentis aluiuas feces eiicerit, hic nulla præuia usus
præpa-

ratione, fontes adierit. Quæ causa est, cur diuer-
sos sentiant effectus, vti videmus omnia agentia
æquiuoca, pro varietate obiecti vel materiæ, mu-
tare suas operationes. Semper tamen hæ aquæ
dum bibuntur, refrigerant & humectant. Mox
calore stomachi domitæ calefaciunt, denique in-
signiter exsiccant. Nec est quod ideo exsuccos
quis & emaciatoſ his fontibus arceat, veritus vt
omnino exsiccati, animam in calido & humido
positam expellant: vidimus enim siccissimos, &
tantum non exsanguē, viuā potius cadauera
quam homines, horum vsu fontium carnosos &
bene habitos euasisse. Nimirum obstructione
mæseraicarum, hepatisque ablata, ventriculoque
confirmato, meliorem chilum venis transmit-
tentes, sanguine optimo qui facile musculis car-
nem reponeret, repleti sunt. Sed hi, vt hoc obi-
ter moneam solis clysteribus aut manna, vel cas-
sia præparandi, alij medicamentis relictis, quan-
quam & syrupum rosaceum vel violaceum solu-
tium simplicem admittere possunt. Hæc de qua-
litatibus primis. Quod ad alteras; abstergunt, in-
ciduntque humores viscidos ac tartareos, pitui-
tamque extenuant, hepar, lienem, mæseraicās,
omniaque viscera infarctu expediunt, inflam-
mationes domant, temperiei primæ restituunt;
ventriculū vero astrictione sua ita roborant,
vt millesimus quisque ijs ex præscripto medici
vtens, nihil se damni ex actuali earum frigore,
si tonneletiū excipias, percipere fateatur. Neruis
egregie

egregie robur afflant, serum sanguinis humoresque excrementitios, bilem, pituitam, melancoliam, non vna via exturbant. Bibentium hi multum mingunt, hi ventris sordes, atro semper, interdum viridi, flauo, cæruleo aliquando colore tinctas, magna in copia deponunt: vomunt alij sudantque, & sturias naso emungunt. Narrat Fallop. se Aquarianas aquas bibisse, totoque triduo, neque alui nec aliorum excrementorum quicquam deiecisse: cæterum tertio die tam copiose sudasse, vt sudoris scutellas colligere potuerit. Visi Geringo, & post illum mihi alijsque, paralytici qui totam aquam scaphio redderent, interim non secus ac sumpto cathartico secederent, & tamen toto corpore sudoribus disflueret, quod vellem notarent qui varias diuersiones naturæ veriti, eidem pharmaco, vrinalia & eccoprotica remedia incoquere reformidant. Sed illos alibi. Matronas idem nouit, & nos vidimus, quibus ab his aquis vrinæ, menses, hæmorrhoides simul fluerent. sic in

Spadani ludit diuina potentia lymphis.

Sane hæ lymphidæ, gustu oculisque gratissimæ aquæ, tam varias pugnantesque vno tempore vacationes prouocant, quot vix vlla pharmaca odore tetra, colore horrida, sapore abominanda præstarent. Cum enim diureticorū quædam vrinam moueant, quia multam aquosam materiam corpori suppeditant, quam cum renes trahunt, simul humores in venis cōtentos rapiunt: alia idem
prestant

prestant abstergendo humores in vasis & renibus
impactos: Hæ aquæ, quod nulli alteri medica-
mento datum, vtrumque præstant: abstergunt
enim, & aquei succi plurimum, prout quisque in-
gerit, præbent. Vt taceam alia quamuis insignia
remedia, non cuius conuenire: hos autem fontes
omni sexui, omni ætati, a prudenti medico atque
harum aquarum perito, tuto concedi posse, qui
sequentia legerint, fatebuntur. Demum fossilia
& mollia, & exhalationi ex qua coeunt propin-
quiora, aquisque accuratissime permixta, facilius
etiam minimos humani corporis poros perua-
dunt, neque quicquam tam occlusum reperiunt
quo se non penetrent: cum alia medicamenta
longiori die duritiem magnam nacta, nec aquis
ita permisceri, nec tam iucundè a nobis sumi
possint.

*Quibus affectibus debellandis utilis
sit aqua Spadana.*

C A P. IX.

Seneca tertio Nat. Cap. i. De aquis inquit dis-
seremus, quas insignes aut sapor, aut aliqua
reddit utilitas, quædam enim oculos, quædam
nervos iuuant, quædam inueterata & desperata
à medicis vitia percurant, quædam medentur vl-
ceribus, quædam interiora fouent potu, & pul-
monis ac viscerum querelas leuant, quædam sup-
primunt

primunt sanguinem, tam varius singulis vsus
quam gustus est. Hæc ille. Certe Spadanæ aquæ
calidorum frigidorumque mineralium faculta-
tibus dotatæ non possunt non calidos frigidosque
affectus in eodem diuersis que corporibus percu-
tare: & cum caloris opus sit rarefacere, incidere,
attenuare: frigoris condensare, astringere, in-
crassare, non mirum est his aquis contrarios edi
effectus, nimirum menses moueri, & rursus ni-
mium eorum fluxum sisti. Verum enimvero,
cum non empiricam sed rationalem medicinam
& faciam & profitear, libet quantum libelli bre-
uitas permittit, explicare, quâ ratione vnum
idemque remedium, & multis ijsque contrarijs
morbis mederi possit, & a sanis neutriusque con-
stitutionis hominibus, non tantum tuto sumi, sed
& illos a prædictis morbis præseruare, immunes-
que reddere. Ea quæ fieri in dies videmus, vel
cum pyrrhonijs omnino negare, vel cum idiotis
indubium vocare, vt non satis sani hominis, ita
rationem qua quæ vulgo impossibilia videntur,
eueniunt, scrutari: medicophylosophi, opus est,
clare autem eadem interpretari, etiam arguti,
fælicisque ingenij. Age quando hic Rhodus est,
saltemus, nullique quod sciam priorum tentatam
quæstionem, enucleemus. Iam ante capite pro-
ximo dixi multum veritatis in democriteo puteo
latere, multa nos ignorantia circumfusus nebula,
nec tamen ideo sensibus fidem negare, omnem-
E que

que scientiam mundo eliminare debemus. Nam quod hic in aquis acidis, etiam eniunctæ naris homines capere se negant, paucis me persuasurum confido. Corporibus nostris tam sanis quam ægris quædam communia sunt, parique conatu conseruanda, vires nimirum quæ fouendæ roborandæ, augendæque dum licet, vt & malis quæ nec sentiētibus obrepunt, obsistant, & naturæ debitas actiones exercent, & morbos propulsent: ad has vires ita collineant docti medici, vt earum vel solam, vel præcipuam rationem habeant. Quantitatem vel medicamentorum aluiducorum, vel vrinas, sudoresque cæntium; pro virium constantia dispensant. Si quando sanguis mittendus est, vires in consilium ante omnia adhibentur; ita vt vel in ipsa pleuritide sanguinea, cui sane sectione venæ maximè opus, si medicus iudicet anacatharsi, aut exspuitioni non suffectura latera, venam vel non tundet, vel parcissima manu tantillum sanguinis educet. Harum virium ratione etiam in febribus aliisque morbis, abstinentia curabilioribus, cibum potumque admittimus, magisque ad vires quam ad morbum collineamus. Virium causa condimenta omnia inuenta sunt, vt ventriculus ad solita nauseans, sesamo, pipere, aceto, aliisque excitatus, facilioribus concoctu, gulæque gratioribus, attrahendis, detineendis, digerendis sufficiat. Quo fit vt sanis iuxta ægrisque, roborantia conueniant, naturalesque actiones commodè promouentia: hoc vnum interest quod diuersa quâtitate his illisque

opus

opus sit : nam pauca in sanis naturam vel pigram,
vel officij sui immemorem excitant, quæ in ægris
prorsus sopitam vel ablatâ, non nisi maiori mole
reponunt. Ita parum apij serpilli. roris marini,
macis, sanorum ouinæ elixandæ, alijsque cibis sat
est, vt lentorem crassitiemque chyli, & quæ inde
sequitur obstructionem impedian, serumque
sanguinis superfluû ad vrinarios meatus, vel su-
doriferos poros deducât : at in ægris ad totos her-
barum, florumque manipulos : ad radicum semi-
rumque vncias, ad alia pertinacé obstructionem
debellatura, veniendum. Lienis succum melan-
cholicum per vas breue ad ventriculû non trans-
mittente, saniorum ventriculum ignauius appe-
tentem : parum aceti vel omphacij corrugat, ex-
citaturque. In ægris & magna medicamentorum
mole, & longa die sæpius repetita opus est : sic
aquæ acidæ minoribus obductæ vitris, sanis sani-
tatem conseruant. Maioribus vero, auidius & lon-
giori tempore epotæ, ægrorum morbos debellant,
naturaléque temperiem reuocant. Itaque fontes
quos sacros merito vocauit vetustas qua debemus
admiratione prosequamur, ijs valere iussis qui
quæcunque exiguo suo cerebello non capiunt aut
inficiantur, aut calumniantur. Sed à capite
ordiamur : Primum catharos omniû morbo-
rum originem absumunt, cerebri humore su-
peruacuo ablato, eoque mala hinc nata, vt pa-
ralysin, artuum tremorem, & cætera his affi-
nia curant. Narrat Rhetius suo consilio vsum

Dominum Arnoldum Brugel Ecclesiæ Collegiæ in Oirschot Canonicum, integra crurum resolutione, etiam brachijs ex parte affectis, laborantem, has aquas bibisse, urinam, sudores, aluius excrementa simul copiose deiecisisse, nec multo post commodè per cubiculum ambulasse, cæterum recidiuam passum, obortis continuo pluuijs ad suos rediisse. Ante sex annos Illustris Domina Lumley Angla, vtens quotidiano consilio Domini Gifort medici Londinensis, à tremore capitis, quo vltra octennium laborauit multum leuabatur, cæterum eandem passâ imbrum molestiam ad suos redijt, priusquam, tam iniquo cælo percurari posset. Scribit etiam Ryerius se vidisse Dominum Sanseux nobilè Gallum. conuulsione colli pertinacissima, & omnia remedia ludente correptum, vnicum Spadanæ aquæ quod supererat tentasse remedium, reque vt videbatur infecta, in Franciam occiduam rediisse, cæterum domum regresso remissum malum, triennio continuo Spadam reuersum, quarta demum ætate insignis suæ patientiæ præmium tulisse sanitatem perfectam: Cephalalgia. Hemicrania. Vertigines obnoxios, quamquam tardius, multum solatur. Oculorum rubores, pota & admota tollit, vtriamque maculas faciei rubras, & erysipelata, pustula denique à bile, aut falso flegmate in facie orta delet, ructusque continuos, & vomitus, singultusque compescit, quod sane cum alijs annis, tum

hoc ipso in virgine quadam obseruavi, quæ cum
semper singuliret, tum huius aquæ, tum opiatæ
quam infra scribam vsu, omnino conualuit, ei-
que interim decima iam Luna menses stantes flu-
xere. Non alibi manifestius vires suas exerit,
quam in hepatis lienisque obstructionibus atque
inde natis malis persanandis. Ictericæ sanantur
multi, multi alterutrius, vel vtriusque visceris
scyrrho non confirmato laborantes. Melancolia
flatulenta seu hypochondriaca curatos vidi com-
plures. Hydropici adiuti multi. Ante octennium
venit in Spa, exeunte Augusto vxor Domini
Berthelemy, Domini de Buffy Consiliarij in cu-
ria Parisiensi, Hydrope leucophlegmatica quan-
tum vnquam vidi laborans, cui cum consilium
modumque aquas bibendi dedissem, sanior ad
suos redijt, eademque anno potis iterum toto fere
bimestri aquis, sanissima Lutetiam concessit.
Ante annos quatuor frater Gabriel capucinus
post longam quartanam, vomitumque & seces-
sum multarum sanguinis librarû (me enim præ-
sente simul vltra octo libras emisit) in hydropem
ascitem, & ab alijs medicis, & a me omnino incu-
rabilem iudicatum, prolapsus cum in Spa om-
nium iudicio ibi sepeliendus venisset; atque in
cubiculo, (nec enim pedibus consistere nedum
ambulare ob immanem pedum, crurumque &
abdominis tumorem poterat) aliquot dies stre-
nuè pouhontium potasset, mox & Sauenirium &
Geronster totâ hora a pago dissitum pedes adijt
E 3 sanissimus.

sanissimusque, & me, vt iocans insultabat, velocior, gressuque & cursu longe superans, ad suos redijt. Verum biennio post recidiuam passus, ne quid dissimulem: tandem exeunte Decembri, asciticus obiit, viginti octo menses quos Spadanis debebat aquis, omnium opinione tardius. Vt iam affirmare auserim, qui toto bimestri hydropē laborarunt, hoc est quibus hepar vitiatū est, numquam perfectē sanari. Calorem renum temperat, eorum arenulis detergendis & expellēdis, omnium aliorum medicamentorum vim excedit, tum quia valde diureticum, quia simplex, quia naturale, quia artis omnis expert, quia gratissimum plerisque ad omnia alia nauseantibus remedium. Vt arenarum concrecioni obstat, ita & calculi generationi renititur. Vesicæ calculum curare posse negat Pigræus, cæterū visitator Carthusianorum Ludouicus Hagerus vir omni fide dignissimus, mihi non semel narrauit, se maximo laborantem calculo superiori anno Spadā venisse, priusquam eo iret, & domesticis Herbi-polen-sibus, & Leodiensi lithotomis sentiendum calculum dedisse; haustis magna copia aquis, ad suos redijisse, multo cos minorē calculum reperisse, qui cū hoc anno Spadam redijisset, meque & multis admirantibus ultra decem hebdomadas, quotidie trecentas quinquaginta vncias bibisset, multum adhuc diminuto lapide recessisse, idem Lithotomus, & qui Lithotomo adstitit Dominus Michael Ogerus, medicus excellens adfirmavit. Et sane etiam si
vesicæ

vesicæ calculum non frangeret, multum tamen prodesset his aquis ante sectionem vti, quia vesicam eluunt, calculum viscida pituita & mucore quo oblidetur mundant; facilioreque extractioni reddunt. Accedit quod sæpe pituita nondum in calculum coalita, patientibus calculi ideam, symptomataque omnia exhibeat, quod Gratiano sæculi nostri Lithotomo famosissimo accidit, qui cum calculo se premi ratus, socio Lithotomo vesicam secandam præbuisset in vrbe Namurci; nihil præter tenacem pituitam, quæ huic aquæ facile cessisset, eduxit: insuper Horatius Augenius, Paræus, Hollerius, Marcellus Donatus, scribunt multos calculo laborare, cutaneo seu mucoso inuolucro latente, ita vt catheteris omnis sensum eludant. Hi sane ab his aquis multum iuuarentur; cum enim exemplo supradicti Carthusiani friabilem attriuisse lapidem constet, multo facilius obuoluentem hanc cutem dissoluerent. Ante sexennium Italus Rhynercæ stipendia merens, sedecim se in penis cole calculos gestare dicebat; pisces recentibus maiores. Iussi hominem mingere, cum viderem ipsum mictionem tardius, & cum difficultate, pubisque compressione cæptam, sicut alios facile continuare, proculque vrinam iaculari, rogavi num cerebro constaret, me enim non capere quomodo tot calculi, tantæ molis, in ipso vrinario meatu positi, tantam vrinæ libertatem permetterent. Ille subito manu mea peni suo admota,

numerare me calculos iubet, numero sedecim,
& quidem tam facile, quam vel globulos preca-
rio fune irretitos, vel nodos thoracem vincien-
tes. Testor fidem me quarta post septimana tan-
tum sex inuenisse, decem emictos sanctè affirma-
bat, eosque in pixide ostentabat. De alijs, diu
enim post me in Spa hæsit, quid factum sit, nescio.
Sed miraculo propius est quod subnectam. Pa-
ter Reginaldus Maillot Recollectus, iam tres &
quod excurrit annos, hyeme iuxta ac æstate, Spa-
danum fontem magnis potat poculis. Ostendit
ille non tantum plures calculis durissimis plenas
capsulas: sed & quod qui non viderunt vix cre-
dent (viderunt autem hoc triennio ex tota euro-
pa innumeri) duas vesicas sex latos digitos lon-
gas, minimo suo digito crassiores, arenis vndique
confertissimas, simul cum infano, & non tantum
internecino dolore emictas, videndas præbet.
Qui micturienti vel potius tam portentosum
parturienti foetum adstabant rustici, intestina
ipsum minxisse clamabant, eaque media hyeme
pro mirissimo miraculo, ad me deferebant. Has
vesicas qui volet, etiam hoc anno Spadæ videre
poterit. Aliud hic notatu dignissimum occurrit,
vnde Spadanæ aquæ præstantiam agnoscas, cum
primo biennio multos eosque durissimos, & æta-
tem latus lapides mingeret, quos a sedecim
præter propter secrevit mēsis tam molles sunt
vt aliquum diu aëri expositi, & frientur & modo
pituitæ malè concretæ, diffuant. Eadem renum
vulceribus

ulceribus, & carnis in vrinario meatu incremento, seu carnositati vtilissima est, tollit enim humorem qui illum generat, ipsum desiccando; & si aquæ Spadanæ in meatum vrinarium iniectio fiat, vlcus cicatrizat, suæque roborante vi carunculæ regenerationem ac recidivam impedit. Prioris exemplum vidi in sene quodam Antvverpiano, qui cum continuo triennio quotannis sex integros menses hanc aquam plenis obduxisset faucibus, renum vlcere inueterato leuatus est: Posterioris fidem mihi fecit vir quidam religiosus, qui meo, hoc ipso anno vsus consilio, à carnositate molestus liberatus fuit, Gonorrhææ Venereæ quicquid alij dubitent, certo auxiliatur, quod & ego cum alias, tum hoc anno in duobus Parisiensibus, & alij obseruarunt; Parastatarum dyscrasiæ hinc natæ etiam vtilissima est. Tuto itaque, qui morbo vel gallico, vel suo verius laborant, vtantur: Si enim metalla, fatentibus omnibus vim specificam ad hunc morbum debellandum habent; huius autem aquæ facultas tota ex metallis est, cui dubium, quin Adonidis nepotuli, propitijs his aquis vsuri sint? Sane hoc ipso anno quidam aphtis seu ulceribus gallicis, vnguis latitudinem æquantibus, os linguamque oblitam habens, eius vlu conualuit, quod iuratus confirmare possum. Sensit idem Solenander consil. 37. sect. 3. ita scribens: & Gonorrhæis & carunculæ in virga vtibiles hæ aquæ, meatu virgæ vnguento camphorato libero red-

ro reddito, potus acidulæ ipsum eluet, refrigerabit, siccabitque vlcus quod in eo remanlit, quod deinde eo modo roboratum, facilius obducetur cicatrice. Non possum quin hic historiam inseram à Remb Dodonæo cap. 41. obseruat medicinal, descriptam vbi post multa ait. Generosus vir ex familiâ Francisci, & Henrici Franciæ Regum cum 10. & 8. annis venereo profluuio laborasset, increſcente in dies malo atque vnâ symptomatum sæuitia nec vllum medicamento- rum præscriptorum vsu fructum consequeretur ad fontem proficiscitur, haud procul à Leodio, qui creditur esse quem Plinius lib. 31. cap. 11. in Tungris esse scribit. Hoc vbi aliquot dies vsus esset, dolores valde remissi sunt, ita vt suauius illic, quam alibi multis annis vixerit. Fontis si- quidem huius ea propria ac singularis est facul- tas, vt vesicæ renumque dolores sopiat ac leniat: morbos tamen harum partium raro persanet: ventriculum debilem idem roborat: ciborum languentem appetētiam excitat; hydropicis præ- fertim leucophlegmaticis, subinde sanitatem re- uocat. Possemus nonnullos referre grauissimis ex renum ac vesica doloribus miserè afflictos, qui interea dum hunc biberent, à doloribus liberi visi fuerint, non tamen idcirco sanitati restituti. Prætermissa siquidem huius potione, etiam acer- bius quandoque doloribus peius habuerunt. Ve- luti huic generoso contigit viro, qui interea dum aquam fontis biberet, melius habere videbatur:
Sed

Sed illinc reuersus, mox omnino peius, vbi ingrauescentibus omnibus doloribus, vitam cum morte commutauit. Dissecto ac aperto huius corpore, repertus est ren vterque maior, quàm secundum naturam, durus, concreti ac indurati puris colorem, ac similitudinem referens: vteræ ambæ interius exulceratæ: vesica planè rigida, nec extendi nec contrahi potuit. Huius vna membrana ab altera diuulsa, copioso intermedio pure. In exteriori tubercula quædam liuida apparebant: interior multis foraminibus pertusa. Hæc ad verbum celebris ille Cæsareus medicus. In hac hiltoria velim Lectorem meum obiter notare, moram in Spa esse necessariam, & quod sæpe multis dixi, toto ibi anno viuendum ijs qui à diuturnis, & pertinacibus malis liberari cupiunt: at nunc qui trigesimo vel quadragesimo die non persanantur, aquarum impotentiam atguentes, sæpeque de medicis multa immerito questi, ad suos irritò euentu redeunt. Reuera enim aliquot, qui totos tres quatuorue, annos assidui in Spa, manserunt, ab vlceribus istis, calculoque & hydropè persanatos vidi, qui etiamnum viuunt; votiuamque sanitatis tabulam Spadanis appendunt fontibus. Leprosis etiam siue Elephanticis, morbo, venereo multum affini laborantibus, insigniter opitulantur. Nam iecoris ardorem, sanguinem assantem temperant. Dixi supra mucum aut humorem in vesica lentum his aquis elui, addo scabiem in eius corpore

corpore & collo, aut vlcus in sphinctere ab ijs abstergi mundariq̃ue, & sæpe ad cicatricem perducī. Si cui male curato in perinæo abcessu fistula superfuerit, ab his aquis præsens remedium inueniet. Vterum muliebrem, albo fluore mucosq̃ue oblitum, & pota, & per metrenchytam iniecta, valdè curat. Virginibus etiam solo foru ad menses albos profuisse scio. Cancro item, vteriq̃ue schyrro, si commodè inijciatur, vnicè proddest, cum omnia phagædenica & dysepulotica vlcera manifesto iuuat. Inter cætera mensibus mouendis in primis idonea, quod millies experientia comprobauit. Et tamen nimium eorum fluxum quouis alio medicamento felicius sistit. Quod ante octennium in Antvverpiensi quadam domicella, hoc vero anno in nobili virgine obseruauī, quarum vtraq̃ue cadauerosa facie, viribusq̃ue valde afflictis, cū in Spa venissent, saniores ad suos redierunt. Solenander cons. §. sect. 4. *his fluxibus inquit sistendis, & causis eorum auferendis, omnibusque membris sine incommodo confirmandis, maximè vtilis aqua Spadana, & multa earum in Liffia amula.* Idem in aluino fluxu, ipsaq̃ue dysenteria aliquoties vidi: Inter alios M. Petrus vander schroet Canonicus Syluæducensis, post dysenteriam, etiam Lientericus, totum iam triennium his aquis superiori anno me suadente potis, sanus ad suos redijt, liber à febre, qua fere marasmode iam detinebatur. Idem easdem hoc
anno

anno vtilissimè bibit. Purgant enim hi fontes, atque intestina roborant. Tandem causa mali exclusa alui fluxus sistunt; quod iam antea à Myrobalanis etiam & Rhabarbaro fieri multi adnotarunt medici, ac in primis Ludouicus mercatus operum suorum tom. 3. cap. de dysenteria. Sed inter cætera inquit præsidia a doctissimis etiam viris rationes & diutino ac firmissimo experimento firmatum proclamatur, frequens aquarum thermalium quæ potentiam habent refrigerandi vsus, ita vt in potu & clysteribus mirum in modum prodesse ferant. Vermes omnis generis egregiè deturbant, quod luculenta narratione Gheringus confirmat. Res, inquit, dictum mira. Mulier annorum quadraginta sex, quæ ob diuturnam mensium suppressionem in atci-tem incidèrat, à quo vt liberaretur octo iam annis peritissimorum medicorum diligenti cura frustra vsa fuerat, tandem potu aquarum Spadanarum per aliquot septimanas continuato, cœperunt fluere menses, ac tandem aqua satis copiose, ac tertio vermis quidam semicubiti longitudine, quadrupes, cauda oblonga, figurâ fere lacertæ, cineritij ferme coloris extra aquam, in aquam vero projectus colorem exhibebat rubrum; postremo cæto aut nouem similis figuræ & coloris, sed vermiculi prodierunt. In summa, tantam illa sabarræ serosorum excrementorum ex diuturna illa mensium suppressione natorum, copiam excreuit, vt illicò venter, qui ante in maximam sub-

latus

latus fuerat molem detumesceret, ægraque statim melius habere cœpit, & in præsentia satis commode habet. Hoc sane adseuerare audeo me adolescentem Ægidium d'Orffet, etiam nunc Bartholomæi Wolters Sartoris famulum, vndique vermes egerentem, nam infinitos vomebat; per anum reddebat, imo lectu, vel visu rarissimum, mingebat, his aquis percurasse. Ita me bene amet Deus; uti semel in matulam vitream, vna mictione sedecim viuos vermes reddidit, me præsentem, & quæ mea est curiositas, quia fucum timebam, matulam tenente, qui à me in domum Bauaricam (Xenodochium est à Principe nostro Serenissimo institutum, cui tum sextum annum præeram) missus; harum aquarum usu, medicamentisque ei reidicatis, sanitatem qua nunc pollet optimâ, paucis diebus consequutus est. Si quis eum ob rei raritatem videre volet, in ædibus dicti Bartholomæi, ad ædem S. Ursulæ inueniet. Et hoc mirum quod ex nobilium fide dignorum qui oculati adlitere testes, relatu habeo: rusticum cui dormienti in aurem insectum penetrarat, cum dolore tantum non furiente, acidi fontis aquam auri immisisse, mox vermem à rosione & puncturis abstinuisse, nec multo post frustra ductum esse. Vteros etiam tumentes iustoque humidiores desiccat: quo fit ut multæ quæ æterna sterilitate post duodecim, vel ut vidi quatuordecim annorum matrimonium infrugiferum damnatas se putabant, harum aquarum usu

matres

matres factæ sint. Cæterum hoc potius præstant in vterum per catheterem immissæ, vel per infersionem, aut vaporarium applicitæ: quanquam & potæ aliquid profint, purgando venas, roborando viscera, calefaciendo partes vtero vicinas: vt mirer scripsisse Senecam, reddi causam non posse, cur aqua Nilotica, sæcundiores faciat scēminas, vt quarundam viscera longa sterilitate præclusa, ad conceptum relaxauerint: quare in Lycia aquæ quædam conceptum scēminarum custodiant, quas solent petere quibus parum tenax est vulua: huius enim rei causas obiter adduxi. Arthriticis prodesse scribit Pigræus, eo quod serum expurgant, quod in articulos lapsum, membranas tentando, diritatem illam dolorum, carnificinamque excitat: Cæterum nisi purgatissima corpora sint, fluxus ciendo, tum hoc anno, tum superioribus nocuisse, arthritimque alieno tempore accersisse vidi: cui rei testem laudare possum, Dominum Laurentium Petri Iureperitum, nunc Canonicum Namurcensem, cui ante septem annos aquas bibenti, tettio die, podagra primum: dein chigrá, qua ad eum diem non laborauerat, quia, vt ipse fatetur, purgationem neglexerat, superuenit: & ratio cur podagricos non promptè iuuat est, quia nervos & articulos non tangit, nec eo, vt ad cerebrum, promptè vapores transmittit. Per accidens tamen prodesset hæc aqua

aqua potest, roborando nimirum viscera & impediendo generationem phlegmatis, & feri, quod in articulos decumbendo, podagram excitat. Vt rem totam quasi syllabo comprehendam, Aquæ Spadanæ, ventriculi concoctionem iuuant, orexin faciunt tantam, vt quidam a fame canina superuenturâ sibi timeant, sitim domant, colicosis liacisque torminum dolores sedant: arenas minutosque calculos ex renibus & vesica expellunt; obstructions viscerum hepatis maximè & lienis, venarumque meseraicarum deobstruunt: crapula hesternoque mero nauseantes mirifice recreant: sanguinem depurant, lumbricorum genus omne necant, menses si stant mouent; si nimium fluunt, sistunt. Febres pellunt: oculorum fluxus illitè sistunt; cutis infectiones, pustulasque & scabiem lotionem, & magis balneo auferunt: morphæam lepramque recentem tollunt, conceptum iuuant: catharros & quæ illos sequuntur, paralytin, apoplexiam, epilepsiam impediunt. Ozenis narium: dentium vacillationi opitulantur. Pendulas mammas coercent: affectus tonsillarum gargarisatu tollunt. Hydropem, leucophlegmaticam maximè, & Ascitem exhauriunt; penis exulcerationem sanant. Ceterum ne longior narratio molesta sit, cum Gheringo harum historiarum cupidos in Spa remitto, vbi quotannua exempla, etiam curiosissimorum animos explebunt.

*Qua ratione prædictis affectibus laborantes, san-
nitati restitui possint.*

C A P. X.

Q Vi proximum legerunt caput, sine dubio Aretalogi, vel Ceretani orationem, ad omnes morbos remedia profitentis, audire visi sunt, itaque res habet, ut omnes qui harum aquarum vires describendas sumpserunt, cum eas in plerosque humani corporis affectus valere dicunt, fiduciam apud paucos, fidem apud neminem prope inueniant, Cæterum si in Spa maturè, & constantibus naturalibus, vitalibusque venerint: (nam quosdam, & inter alios nobilem quendam Morelini Venetum: Piccenini testudinis pulsandæ peritissimum Romanum, tertio priusquam morerentur die, ut alios taceam, Spadam ab ijs quos primis huius libri notavi lineis; missos vidi) aquasque quo dicemus modo biberint, indubiè quæ dixi vera esse fatebuntur. Paucissimos enim vel nullos Spadæ incolas, capitis doloribus, cardialgia, calculo, obstructionibus renum, hepatis, lienis, meseraicarum laborantes, inuenies. Ictericos, hydropicos, podagricos, scabiosos, epilepticos, quod sciam nullos. Sed cum modo bibendæ aquæ: Ut enim non medicamenta modo, sed & alimenta nullo ordine modoque, & alieno tempore ingesta, damni multum, commodi nihil adferre solent; ita & aquæ Spadanæ, nisi certo

F
anni

anni tempore, certaue diei hora, modo & quantitate conuenienti, corpore bene ex consilio periti medici præparato bibantur, morbos augere potius, quam auferre amant. Ninium mel, fœfel, nec quicquam tam bonum habet sublunaris mundus, quod non malæfæcis aliquid secum trahat. Ne igitur aquæ, quibus multi votiuam salutis appendere tabulam, sequiori vsu infamantur ab ijs, qui ex prauo earum potu, morbis non tantum non sunt leuati; sed & cum valerent optimen, voluptatisque causâ eas biberent, febres, aliaque damna contraxerunt; vt ante annos septem Genuensi cuidam nobili accidit, & aliquot Belgis: alijs ventres intumescere vt hydropici viderentur; modum eas commodè bibendi docebo, si prius causas cur supradicti in hos casus inciderint, aperuero quam breuissime, vt alij horum exemplo docti, has syrtes vitent. Constat febres nasci ex rebus præter naturam calorem nostrum naturalem accendentibus; Cæterum & si sanguis solo calore aucto febrem excitet, alij tamen humores, vt docet Gal. Sec. de diff. febrium quatuor primis capitibus, nisi putrescant, febrem accendere non possunt; non putrescent autem in corpore perspirabili & libero, obstruatur ergo febricitandum corpus, necesse est: Hæ itaque aquæ cum valde diueticæ sint, humores facile & confestim secum ad venas rapiunt, quæ cum tam multæ materiæ transitum præbere non possint, obstruuntur; obstruëtis venis, humores ijs contenti,

contenti, accedente calore alieno, & vitiante vel
educente calorem genuinum, seu natium, pu-
tiscunt, vnde homines febriunt. Cæteroqui cer-
tissimum est, purgato bene corpore, has aquas,
plus momenti ad debellanda omnium febrium
genera, quam vlla alia pharmaca obtinere. Ea-
dem ratio est subitæ hydropis, vel potius tumo-
ris hydropem mentientis. Calefit aqua Spadana
in ventriculo, pulsoque actuali suo frigore, po-
tentialem suam calorem in actum reducit, & sic
pituita, quæ plurima in corporibus mollibus
maximè scemineis & cachecticis stagnabat, atte-
nuatur primum, dein in aquam soluitur, quæ
suo pondere imam ventris impletura capacita-
tem descendit, nec hoc mirum, cum in dies ca-
tharticus medicamentis incautè adhibitis, idem
fieri videamus: quæ cum magna copia in abdo-
minis cauitatem decumbunt, in eam molem ven-
trem attollunt, vt hydropem præsentem om-
nes iudicent. Quæ causa est cur in longo apo-
zematnm pituitam soluentium vsu, ne ægri
pituita crassiori pleni, hoc periculum adeant,
periti medici quotidie apozematis symptioni,
aliquid trochiscorum de absynthio, de capa-
ribus, de eupatorio, de spodio, de carabe, &c.
præmittant. Alioqui vel solis syrupis nimis
incidentibus, hydropem quosdam incutrisse, no-
tat Auerhoes 7. colliget, dicens etiam syrupi ace-
tosi simplicis immodico vsu hoc accidisse: qui ho-
rum trochiscorum vsu, malum hoc præuerrere

poterant. Verum vni aut alteri medicamento si recens sit hoc malum, cedit, vti plures testari poterunt, qui hoc & superioribus annis, his incommodis à me leuati sunt. His affectibus obiter elucidatis, rei me accingo. Qui aquas bibaturi sunt, vel sani voluptatis ergo, vt solent recens nuptæ cum maritis, vel proci cum amasijs: aut ægri necessitate adducti illas adeunt. Illis leue eccoproticum siue elect. lenitium, seu benedicta laxatiua, ad dragmas 9. vel 10. seu cassiæ vncia vna cum scrupulis duobus rhabarbari vel mecoacæ: vel syrupi rosatijs solut, vnciæ tres plus minus suffecerint. Imo qui corpore sat laxo fuerint, vt sunt qui bis, ter, in dies secedunt, nullo medicamento præuio, Poubontij vel Geronsterij aquis per se satis aluum iam incitatum promoturis, vti possunt: Nam & Galenus libro de sanit. tuenda, consueuisse ait multos, vere vel Autumno ad excrementa vacuanda, vel deiectorijs medicamentis vti vel sponte manantibus aquis, quibus utique aut sulfuris aut bituminis, aut nitri vis inest. A Egros conuenienti & affectui proprio medicamento purgare conuenit, & quoniam plerique vel pituitæ, vel bili flauæ, vel atræ seu melancoliæ medicinam petunt, idque vt affectibus superiori capite recensitis occurrant, obiter formulas præscribam, vt qui in Spa vel medicum non inuenerit, quod raro accidit, hoc enim anno quo scribo, præter me quatuor decim ibi visi medici, vel qui sumptui parcere volet, quod multi faciunt,

faciunt, hinc sibi medicamentum non nociturum
petere possit. Cæterum hoc moneo, me præscri-
bere formulas quæ nostratibus pharmacopolijs
conueniunt. Cum enim Galli, Hispani, Angli,
qui recentiori quam nos rhabarbaro, manna,
agarico vtuntur, sex dragmis, vel octo electuarij
alicuius, purgantis, in decocto cordiali, vel aqua
aliqua stillatitiâ soluti, contenti sint, scammonio-
que defæcatori forte, quod tamen solum omnia,
purgantia pharmaca stimulat, quam nostrates
vtantur, nos totis decem dragmis, vix tantun-
dem proficimus. Imo cum chymicis eorum me-
dicamentis vtimur, nisi dosi plusquam dupla
vtamur, & operam, & tempus, & nummos per-
dimus. Qui sua in patria, quod suadeo, medica-
mentum præsumpserit, leni pharmaco eluiem
in itinere contractam, cum spadam venerit, elue-
re poterit. Cæteri hæc aut similia, vel in Spa,
vel Leodij sumant. Qui pituitoso affectu labo-
rant, capiant fol saluix, bethonicæ, verbenæ,
maioranæ añ. manipulum: florum cyperi, an-
thos, primulæ veris, pæoniæ, ocymi caryophyl-
lati, centaurei minoris añ. pugi, radicis galan-
gæ, æuulæ tamen dragmastres, pyrethri drag-
mam; fol senæ or vncias duas, agarici, mecoacæ
an dragmam, bulliant in aquæ s. q. ad vncias no-
uem, in colatura solue electuarij de dactylis, de
sebesten añ. dragmas sex, syr de stechade, byzan-
tini, Iuiubini añ. vnciam, olei cinnamomi scru-
pulum, misce pro tribus dosibus, vel continua-

tis, vel vno intermedio die sumendis. Aut sumat tabellas. Rec spec elect. Indi dragmam, cum saccharo aqua maioranæ & anisi soluto, q. s. f. tabellæ; quæ olei cin guttis aliquot irrorentur plumâ, vel cum saccharo simplici, & syr de stæchade fiant boli pro triduo, qui accurate diuidantur, si malit pillulas accipiat pill. foetidarum dragmam vnam semis; cochiarum, sine quibus añ. scrupulos duos, trochis alhandal scrupulum, cum aqua cins. pill. 21. sumat in dies septem, post primum somnum, & si potest, dormiat vnam alteramue horam. Qui bili remedia volet, R. capill. veneris, cythorei, acetosæ, sonchi, endiuæ, añ. manip. flor. rosar. violar. nymphæ, añ. pug. rad graminis aceto maceratarum, rad. asparagi, quinquefolij añ. vnciam vnam semis; tamarindorum, passularum iuiubarum añ. vnciam, quatuor sem. frig. maior, añ. dragmas duas, bulliant in s. q. feri lactis ad lib. i. in collat. solue elect. de prunis solutiui, de turbith. cum rhab. añ. vnciam, de sebesten vnciam vnam & semis, syr oxysaccharæ, limonum añ. vncias duas, olei vitrioli minimum, ad aciditatem iucundam, misce pro tribus dosibus. Si malit pill. capiat aggregatiuarum, Arabicarum, aurearum añ scrupulum, addat dacrydij grana quatuor cum aqua rosar. f. pill. 7. repetat duobus aut tribus diebus, aut sumat pulpæ tamarindorum vnciam semis, succi fumaris densati dragmas duas, calsiæ vnciam, dacrydij grana nouem, f. bolus, aut infundat

dat dragmam vnam & semis rhabbari, spicæ
scrupulum semis, in aquæ endiuix & vini albi
añ. vncijs duabus; mane soluat in colatura syr.
ros. solut. compos. vncias duas: repetant bis
terue. Melancolicis affectibus laborantes hoc
modo purgari poterunt, Rec. florum stæcha-
dis, Sambuci, genistæ, epithymi, thymi, centau-
rij min. añ. pugillum, herb. Mercurialis, fumariae,
palegij, serpilli, corticis mediani sambuci
añ manipulum; radicum polypodij, ænulæ
campanæ añ. vnciam semis, fol. fenæor vncias
duas, seminum citri, carthami, añ. vnciam se-
mis, macis dragmam, bulliant in seri lactis, vel
iure caponis antiqui s. q. ad vncias nouem: in-
colat. solue conf. Hamech, electuarij. Indi añ.
vnciam semis, electa catholici dragmas sex, syr.
de epithymo, de fumaria, mellis mercurialati
añ. vnciam: ol vitrioli q. s. ad aciditatē palato gra-
tam. Pillularum in hoc affectu rarior vsus est, nisi
ex capite laborent, tuæ enim quia longiori à
spatio euocandi humores, pillulæ alijs pharma-
cis præstant. Sed statim ijs sumptis iuris aliquid,
vel decocti sorbendum. Siccus enim humor est
squalidusque, & naturâ cunctator, ideoque hu-
midis liquidisq; remedijs oppugnandus. Si quis
tamen ad omnia alia nauseans solis pillulis uti
velit, capiat massæ pil. assaiereth. indarum, de
lapide lazuli añ. scrupulum sætidarum scrupu-
lum semis cum oleo anisi q. s. f. pil. 7. hieræ rufi
dragmæ 5. vel 6. (sæpè dedi ad vnciam & paulo

amplius) cum saccharo vel syr in bolum formatæ,
valide conueniunt. Aut R. elect. catholici drag-
mas 5. confect hamec dragmas 3. lapidis armenij
præparati scrupduos, cum saccharo fiant boli. Cæ-
terum quia raro humores sinceri, plerumque
mixti peccant, ideo plerisque hanc vel similem
portionem suadeo. R. herb rec. endiuix, betho-
nicæ, lupulorum añ. manipulum, florum hype-
rici, genistæ, Keiri, sambuci; añ. pug. 1. radicum
acori dragmam vnam semis; bulliant in f. q. aque
ad vnc tres, in col solue el cathol dragmas sex,
syr oxisaccaræ vnciam vnam, aquæ cin dragmas
2. f. haustus: aut si quis sumptus vel non habet,
vel metuit, petat à pharmacopæo elect cathol
(quod solum vt & electuarium lenitiuum ingrati
saporis expers est) dragmas decem, dissoluat in
iussculo aliquo, vel vino albo: hoc ter quater re-
petat prout opus fuerit, vel continuo, vel inter-
polatis diebus. Cæterum contumacioribus ma-
lis præcedentia decocta magis conueniunt. For-
tean mirabitur quis, quod triduanas omnibus,
vel quatruiduanas præscribam purgationes, cum
diariâ hætenus plerique contenti fuerint. Dico
tres vel quatuor leuiore potiones, vni validæ
præferendas, nam primo die primam purgabunt
regionem, hoc est ventriculum & intestina, se-
cunda hæpar deplebunt, ipsiusque obstructio-
nem & infarctum expedient: Tertia venas, quæ
reuera stabulum sunt colluiei, morbos mortem-
que accersentis, emundabunt; hæc medendi ra-
tio,

tio, viribus illæsis, imo lentâ depletione roboratis, inueterata & callum ducentia vitia sensim demolitur; quæ vehementiora pharmaca, summâ vi, summaque perturbatione non excutiunt, & quæ antiqui vt immedicabilia reliquerunt. Principibus aliisque magnatibus, cum fere familiarem secum trahant medicum vel Leodio secum ducant, pharmaca non præscripsi; extracta, essentiasque pretiosas omisi, quanquam & hæ illis qui pecunia affluunt, non incommodè donentur. Aptari corpus aliquo horum medicamentorum necessarium est, ne forte aqua noxios humores incurrens, eos secum rapiat, inuentamque obstructionem augeat. Imo qui salutis suæ rectè consultum volet, octauo, decimo, vel duodecimo quoque die, medicamentum, sed semel tantum resumet, atque tunc aquæ haustum in diem proximum differat, sic liberius permeabunt aquæ, totaque cloaca humorum elota, corpus sanissimum relinquent: quod velim plerique medicæ ægris suis imperent, memores etiam eos qui guaiacina vacant dietæ, si non octauo vel decimo repurgentur die, ac nisi aluus semel quotidie respondeat, symptomata incurrere grauissima.

Remedia his aquis in actum ducendis necessaria.

C A P. XI.

CVM nō omnes his aquis eaq̃uā dicam quantitate, pauci etiam ijs quas præscribam hebdomadibus,

domadibus, vel mensibus bibere possint: ideo remedia quædam addere visum est selecta, malisque in quæ has aquas valere dixi debellandis idonea, atque vt loquuntur chymistæ specifica. Hæc remedia quacunque ratione, solida, liquida, consistentiâ mediocri, coaluerint, tota hora, vel eius dimidio, aut certè quadrante ante sumenda. Aut si quis nauseam aliudue incommodum inde timet; vel proximè eam sumptionem præmittat aquis, aut in primo carum alteroue vitro hauriat, ita diureticâ vi aquæ Spadanæ adiuta, facilius corpus permeabunt membrumque cui destinantur, attingent. Veniamus ergo ad cerebrum humidum seu catharris obnoxium. Mirabitur quis me huic malo, multum aquæ prescribere, cum iam toti medicorum scholæ, hoc versu aures caleant.

Ieiunes, vigiles, sitias: sic rheumata cures.

Credunt nimirum contraria contrarijs curari quare cum ieiunium, & vigilæ, & sitis exsiccant, his cerebri humiditatem opportunè oppugnare videntur. Iam ante dixi has aquas actu humidas, potentia potenter exsiccare & calefacere, sicque ventriculi & cerebri vitia emendare. Catharrøsi itaque ijs vsuri, huius syrupi præcipiant vnum alterumque cochlear. R. visci quer-cini, radicis & feminis præoniæ, ligni aloes, sassafras odori non cariosi, scobis eboris, scobis cornu cerui

cœrui apto tempore, hoc est cum in furias ignem-
que ruunt, quod fere fit à medio Augusti, ad
idus Septembres, añ. vnciam semis, corticis ci-
tri sicci, corallorum præparatorum, piperis,
acori veri, Zedoariæ, galangæ granorum iu-
niperi añ. dragmas 3. florum stæchadis, lilio-
rum conuallium, pœoniæ, bethonicæ, lauen-
dulæ añ. pug. vnum semis, bulliant omnia in
f. q. aquæ stillatiæ liliorum conuallium, pœo-
niæ, flor tiliæ ad libras duas, incolaturâ, solue
saccari rosati perlati q. s. coque ad consisten-
tiam syr apprimè cocti. Hoc etiam vti pote-
runt vertiginosi, à paralyfi & tremore sibi me-
tuentes. Pauperes capiant baccharum lauri, iu-
niperi, rad. aristolochiæ rotundæ, pyrethri,
gentianæ, Zedoariæ, añ. dragmas duas; exci-
piant omnia paucò melle anthosato, aut sim-
plici, & ducant in formam electuarij solidi: ca-
pient ad magnitudinem fabæ vel amplius. Cæ-
terum Leodienses pharmacopei aquam habent
catharralem à socero primû meo Thoma Ryetio
ipsis communicatam, cui si addatur aliquid the-
riacæ antiquæ, vel mithridatij, optimum dictis
malis fiet remedium. Eius descriptionem quàm
Illustris & generosus Dominus Ioannes Curtius,
Dominus d'oupey &c. ab Alexandro Farnesio
Parmensium Principe acceptam, ipsi pro arcano
plusquam Eleusinio communicauit, libens hic
euulgabo, quando certissima fide asseuerare pos-
sum, fidum & tutû his affectibus esse remedium,
si eius

si eius cochlear vnum alterumque hic mane, domi suæ lectum ingressuri sumant, atque temporibus interdiu sepe oblinant. Descriptio hæc est R. florū saluiæ, rorismarini, lauendulæ, caryophyllorum, nucis moscatæ, cin, fac, añ. vncias duas, granorum paradisi, macis, Zedoariæ, sem coriandrorum, piperis longi, & nigri, añ. vn: fol rutæ, absynthij añ. dragmas duas, pomum aurantium incisum vnum, omnia grosso modo tusa macerentur plures dies in vini cretici libris quatuor, vini albi optimi libris sex, deinde distillantur per arenam. Oculorum rubori nihil melius quam si Spadanis aquis præmittant haustum aquæ stillatitiæ ex folijs hederæ terrestri, qua etiam oculos faciemque abluent. Singultuosus post ventriculum ex hieræ vsu perpurgatum, tam à calida quam à frigida ortum habente, vtilissimè hæ aquæ: si modo in singultu calido præmittant species diarhodonis Abbatis, siue in tabulis, siue conseruæ alicui, vt rob. deribes, aut berberorum mixtas: aut si hinc minus iuuentur, sumant duos vel tres scrupulos Philonij Romani, cum syr papaueris, & aquâ menthæ vel absynthij. Ceterum cum virginem illam cuius supra memini curarem, nec hoc medicamine quod plerosque iuuat proficerem, singulis dosibus opij tria vel quatuor grana remiscebam. Si singultus frigoris soboles sit, R. schænantij, calami aromatici, anisi, salis menthæ & absynthij Añ. dragmam vnam, croci, ligni aloes, ambriæ, cariophyllorum, aloes alexan-

alexandrinæ, añ. scrupulos duos, coriandrorum
cum succo cydonij præparatorum, cassiæ lignæ
añ. scrupulum, conferuæ aurantiorum vncias
duas, cum saccharo aqua anisi soluto q. s. f. elect.
Vomitu molesto vexati, regionem ventriculi li-
nant vngento, quod capit olei masticini vnciam,
ol macis semũciam, spec aromatici ros. scrupulos
duos, ceræ parum, fiat vnguentum. Intus autem
fumant vinum Alleganticum, cui incoxerint ra-
dices mali cotonei, cuius vnum alterumue co-
chlear sufficit; aut vtantur radice acori, aut, zin-
ziberis, aut anthoræ, aut eringij conditâ. Ictero
viscerumque obstructione laborantibus, item ijs
quibus retenti vitium faciunt menses, commodè
præscribat hoc olim Generosus & doctissimus
Guillelmus Paddij. R. troch de Eupatorio, drag-
mas duas & semis, cyphios sesquidragmam, gum-
mi ammonij generoso vino soluti, chalybis præ-
parati añ. dragmam, specier diarod Abbatis, scru-
pulos quatuor, salis cochleariæ, absynthij añ drag-
mam semis, diagalangæ scrupulum, confer. ros.
damasc. vnciam, conf. flor. calendulæ vncias duas,
cum syr byzantino & de cort citri añ. q. s. f. opiata:
fumant dragmam vel amplius. Pauperibus puluis
interaneorum terræ præparatorum, aut radix ru-
biæ tinctori suffecerit. Arenosi & calculosi, vel
præbiant Heurnij illam optimam insolatu fa-
ctam distillationem, quæ recepit vini ardentis,
aquæ fragariæ & petroselini, cuiusque libras
duas, maluatice acerbi libram, misce primum
vtrasque

utrasque aquas ardenti quadrante horæ. mox
iunge maluaticum, & sacchari candi tusi, libram;
macera dies octo, nec moue, tum effunde, & ite-
rum dies octo soli redde, demum quod clarissi-
mum est deple, eiulque ante aquas sume coch-
learia tria: quanquam propestanti sat erit, tam
diu ad ignem vel in sole phialam agitasse; dum
saccarum solutum sit, quod duabus vel tribus
horis confieri potest. Ego his annis multum sæ-
liciter hac aqua usus, soleo addere aquam ex bax-
cis paliuri, & parietaria distillatam; remisceo-
que olei vitrioli guttas, quot sumentis palato ad
acoris gratiam sufficiunt. Aut elect diasperma-
ton, Fernelij dragmas tres vel quatuor præ-
cipio. A Renum vlcere male habitis feliciter
præscripti, R. olibani, masticis añ. vñciam se-
mis, gummi arabici, cerasorum, tragacanthi;
añ. dragmas duas, sem frigid. mund. añ. sesqui-
dragmam; troch. Alkekengi dragmastres; ex-
tracti corticum rad. iulquiami, croci añ. drag-
mam semis, cum syr de althea fernelij f. massa;
de qua deglutiat dragmam. Ad gonorrhæam;
aut fluxorem muliebrem, vtiliter præscribitur
hic puluis, qui habet capulorum glandium, se-
minis viticis, sem Cannabis parum tosti, gum-
mi arabici, tragacanthæ, carabe, mummiæ, boli
armeni, mandibularum luci; añ. sem unciam ca-
phuræ dragmas binas, cum terebinthina cypria
f. pill. parua quarum sumant dragmam: aut cum
syr myrtillorum aut de rosis siccis, ducatur in
formam

formam opiatae. Verminosis diuitibus do bezar
cum osse ceruino, eo quo dixi tempore collecto;
pauperibus vel corallinam, vel mercurium cru-
dum, crebro tantum per corium transitu repur-
gatum, à quo qui sibi metuit legat Mathiolum,
Fallopium, Massam, Gesnerum, Cratonem, Fœ-
licem platerum, alios.

Quando bibenda sint aqua Spadana.

C A P. XII.

Temporibus medicina valet, data tempore profunt:
Et data non apto tempore vina nocent.

Etiam lymp̃ha Spadana nisi anni aptum quis
tempus seligat, horamque diei commodam, no-
citura est; vniuersim omne tempus iudum,
quoties aer serenat, huic potui per opportunum:
pluuio cœlo, cum Iouem per cribrum mingere,
nugatur Aristophanes, aut cum densa, & mox
calura pendent nubila, multum de aquæ huius
viribus & præstantia decedit. Nec mirum est
admixture crassiorum vaporum, vel imbrum,
has aquas adulterari, aciditatemque nativam,
si non omnino deponere, minimum certè eius
retinere, atque ad communium fontium sapo-
rem accedere; Quod bibentes magno suo tædio
experiuntur, qui magno sumptu, maiore nausæâ,
multum maris & terræ emensi, quando cœlum
tota fere æstate, vt hoc anno, pluuium nasci;
insipidam

insipidam ferme, aut minimum acrimoniæ habentem bibunt aquam. Verum cum æstate, & Autumni initio, dies vt plurimum sunt sereniores, spatium quod sol nostrum pererrat Horizontem longius, iterque facturis commodius, multaue ad ambulandum inuitent, vnde calefacto corpore auidius, & copiosius hauriuntur aquæ; ideoque hoc anni tempus reliquis opportunius iudicant omnes medici. Germani & Belgæ nescio à quo Macaroneorum scriptore verbum sumpserunt.

Mensibus in quibus R non debes bibere vater.

Itaque ante Maium, & post Augustum, boni viri, vini quam Lympharum ceteroqui amantiores, aquam bibendam negant. Si de alijs fontibus, stagnis, lacubus, quos primo vere ranarum bufonumque spermata; ineunte Autumno decidua vicinarum arborum inficiant folia, ita sentiunt, eorum sententię libens subscribo: Sin hos fontes aliorum numero adscribunt, in alia eo omnia. Nam & veris tempore, & Antummi, & hyeme etiam adulta, cum omnia gelu acri rigent, & penetrabile frigus, non terrę tantum mandata semina, sed & mineras per antiperistasin calefacit, summo cum fructu hæ aquę bibuntur. Antecedennium Illustrissima Domicella Henrica de Rohan, ad vigesimum vsque Septembris diem, me suadente & presente, magno suo bono bibit. Et omnibus annis superioribus, noui multos, & inter alios Antvverpianum quendam ciuem, vlcere

cere renum à quo etiam liberatus fuit, laboran-
tem, totas tres hyemes continuas hanc aquam
bibisse : & sane media hyeme, cum per oppositio-
nem frigoris contrarij, calor in ima terræ se re-
cepit vilcera, aquæ acerrimæ sunt, quod mea ex-
perientia didicij quæ causa fuit, cur cum Illustris-
simus Mantuæ Dux, fælicis memoriæ, Thomæ
Ryetio focero meo, mihiq; in mandatis dedit-
set ante tredecim annos, ducentas vt aquæ lage-
nas ipsi mitteremus, ipsa vigilia Natiuitatis Do-
mini, cum multos ante continuos dies gelasset,
eas impleuimus præsentibus, simulq; aquam gu-
stauimus acriorem, quam vllò vnquam æstuante
Syrio. Certum tamen est bibendas hyeme aquas
ad ignem luculentum, aut itufà, vt vocant, vel
cubiculo probè calfacto, ne si bibentes frigeant,
quod sibi & alijs accidisse scribit Fallopius, aut
resoluantur, aut conuellantur. Eadem causa est,
cur cum mollis præcelsit hyems, vt hoc anno,
aquæ solito inefficaciores sint. Cæterum constat
purior æstatis aerem, corpora potus sitien-
tiora, tempus ambulationi aptius, Maium, Iu-
nium, Iulium, Augustum, præ cæteris commen-
dare; quod nostri Leodienses accuratè obseruant.
Hi enim indicto Iustitio, *cum canis arentes findit
hiulcus agros*, cum alia omnia medicamenta pro-
hibet, qui dixit, *ex oriente cane, & ante canis ortum,*
perdifficiles sunt purgationes ; centuriatim in Spa
conuolant, caniculæq; æstus hac aquâ, mærores
& curas, incundissimis salibus eluunt. Quan-
quam

quam etiam tunc, si tota nocte dieque pluat Iu-
piter, cæptam diætam, saltem Sauenirij: nam il-
le citissimè alluuiem eluuei sentit; tardius Ce-
ronster, tardissimè Pouhontius, qui etiam quin-
to quam pluit die, sæpe nondum vitiatur, omit-
tere debent; dum quicquid alieni madoris af-
fluxit, efluxerit: quod ex sapore, qui vel semel
aquam gustauerunt, facilè discernunt. Hæc de
mensibus & diebus. Ad horam: cum sæpe multis
dixerim quod sæpius dicendum erit, diuretica
omnia longe à pastu sumenda, corporeque ma-
xime vacuo: tunc bibenda aqua, cum ventriculus
cibi maximam vacuauit partem, quod fere fit
primo diluculo, vna vel altera post solem ortum
horâ, cum solis ardor temperatior, ambulation-
em permittit, quæ aquam bibentibus Spada-
nam, in primis necessaria. Dixi vna vel altera
post solem ortum horâ, sub meridiem enim, &
horis ei vicinioribus, languidiorem minusque
acidum fontem, maxime sauenirium est notare,
eo quod tum solis radij æstuosissimi, spiritus vi-
triolicos facile ad se rapiant. Quilibet ergo qua
volet hora matutina, sexta, septima, octaua, no-
na, cum capitis sordes, per narium, os, aures, eges-
serit: ventris onus, & vesicæ deposuerit, bibere
incipiat: pransurus hora vndecima, duodecima,
prima, prout aslueuerit; aquam concoxerit, &
emiserit: atque prout fames, optimum ciborum
& condimentum, & cocus, prandendi horam di-
stauerit.

Bibituri, vel pedibus, equo, rhedâ, ad fontem conferre se possunt: vel ita debiles sunt, ut aut lecticarijs, aut ad sellam famulis egeant: aut cubiculo efferri, nullo modo sine periculo queunt; primi, matutinis quas dixi horis, Sauenirium adeant, eô quo dixi cœlo, ieiuni aut haustis prius aliquot vncijs aquæ, puta 20. aut 25 ex Pouhontio. Secundi modo quo possunt optimo deferri per homines, aut Iumenta ad fontem se current. Tertij per famulos à pedibus domum, aquam è Sauinirio, aut alio fonte prout suaserit medicus, ferri sibi imperent: eamque vel in lecto, vel ante focum bibant. Cum ad fontem ventum fuerit, si quem vel corporis pondus, vel succussorius equus, difficile enim est & salebrosum iter, fatigarit, paulum quiescat, deinde bibere incipiat, sensim inter haustus singulos obambulando, nam ambulatio calefacit viscera, quæ ideo aquam avidius attrahunt magisque roborantur. Et quoniam actuale frigus ventriculo bellum indixit, plerique aliquid seminum anisi, coriandrorum, çarui, cumini, vel singula, vel simul mixta vel obducta saccaro, vel nuda sumunt. Ego meis fere tabellâs præscribo in hanc formam, de quibus vnâ, vel dimidiam, inter singulos haustus capiunt. R. specier aromatici rosati,
G 2 diambrae,

diambrae, pleres archon, añ. dragmam vnam,
diatrion pipereon, salis absinthij añ. dragmam
semis, cum saccharo aqua cinnanomi vel anisi so-
luto q. f. f. tabellæ vt n anus Christi, quæ linguam
non nimis feriant, Aut Recipe specier, diacumini,
rosaræ nouellæ añ dragmam, macis scrupulum,
saccari, aqua cin soluti q. f. f. tabellæ gustui gratæ,
Pauperiores sola radice Zedoariæ, galangæ, ænu-
læ campanæ, angelicæ, acori, nuce moscata in
exigua quantitate, vti possunt. Sed qua quanti-
tate bibendæ aquæ? Pigræus dicit incipiendum
ab vncijs aquæ 10. & surgendum ad 20. Aquæ
enim bonitatem non quantitate, sed qualitate
metiendam: Tabernæmontanus à sedecim vn-
cijs incipit. & surgit ad triplam, vel quadruplam
dosim. His ego nullo modo suffragari possum,
cum quotidiana experientia constet, omnes qui
parum huius aquæ bibunt, nihil iuuari, imò mul-
tum rebus suis officere, quod magno meo mæ-
rore vidi ante nouennium, in vxore Illustris viri
Domini Conue Angli, gubernatoris Brielani,
quæ cum quadriennio schyrrho Lienis, & quæ ei
subsequa est, quartanâ laborasset, cum ab optimis
medicis Spadam, vt ad AEsculapij missa tem-
plum esset, nec vltra 30. aquæ vncias bibere pos-
set, in febrem primum tertianam, quæ octauo
post die, in quartanam ipsi exitialem mutata est,
incidit, ægriorque ad suos quam huc venerat, me
rogante vt maturè domum se reciperet, redijt.
Qui vero multum, imò plurimum aquæ huius
ingur;

ingurgitant, hi sunt qui magnis se liberant incommodis. vt Carthagenorum ille visitator, qui trisæcli Nestoris annos quinquaginta vncijs superabat, vt iam ingeniosissimus ille Poëtarum, de solo Annæ Perannæ fonte dicere non possit,

Inuenias illic qui Nestoris ebibat annos.

Cum hic à multis eos superari in dies videamus. Itaque optimè si quicquam aliud Frambesarius, quanto quisque plus biberit, eo melius habebit, dummodo aquas bene egerat. Quisque ergo cum ventriculo rationem ineat, quantum aquæ ferre possit, & quam cito illam egerere, hancque semper regulam in animo & ore habeat.

A iuuantibus & nocentibus optimam sumi iudicationem, hoc est quod aliqui dicunt, instissimam harum aquarum mensuram esse tolerantiam, quod qui à medicis discere nolunt, eloquentiæ quam nobis transmissere Romani patrem audiant, qui ita 2. de offic. Sustentatur valetudo notitiâ sui corporis, & observatione earum rerum, quæ res aut prodesse soleant aut obesse, & continentia in victu omni, atque cultu corporis tuendi causa, & prætermittendis voluptatibus, postremo arte eorum quorum ad scientiam hac pertinent. Aut certè quod Hippocrates, de victus ratione sensit, hoc Spadanis hydropotis aptemus. Ita ergo ille in libro de veteri medicina. Modum neque pondus, neque numerum aliquem ad quem referas cognoscas: certitudinem enim exactam non reperies aliam,

quam corporis sensum. Et in libro de locis. Cibus offeramus eâ copiam, quantum corpus cui offertur superare valeat. Itaque omisso vnciarum scruposo numero, qui alias his aquis vñ sunt, earumque vñum commodè tulerunt, cum deinceps huc venient tantum sumant etiam primo die, quantum sine noxa sumere possunt, hoc est, quam diu ventriculum grauari non sentiunt. Cùm enim vel minimum grauitatis aut ponderis, in ventriculo senserint, ab vltiori eo die potu abstineant, domumque redeant. Qui huic aquæ non assueuerunt, aut eam ante non gustarunt, vt ei se assuefaciant, vitrum vñum vel duo, vnciarum decem, vel duodecim capacia hauriant: diebus proximis vñum alterumue cymbium adijcant, dum eo ventum sit, vt ventriculum quidem impleant, non autem grauent. Si quis hanc quantitatem in ipso potationis initio præscribi miratur, consulat Aetium lib. ii. cap. 30. apud quem iubet Archigenes, vt ex aquis medicatis ad vesicæ affectus, prima die tres heminas (Chopinas vocât hodie) hoc est tres nostrates libras medicas sumant, deinde veniant ad sex: Fallopius sane semper & tuto, à quatuor vel quinque libris incipit, quod ego in expertis optimum iudico: nam & Dioscorides verno cum tempore, serum lactis præscribit, à quinque libris initium ducit. Hippocrates autem lib. 4. de victus ratione in morbis acutis textu 29. lac asininum præscribens coctum, non minus præscribit cotylis duodecim, additque

que quod si corporis robore sit insigni, superet
etiam decimam sextam cotylam. Et tamen cotyla
continet uncias nouem præscribit ergo centum
quadraginta quatuor uncias. Quanquam ijs qui
ex facili vomunt, sæpe sæpius autor fuerim, tan-
tum ut ingererent, necessitatem ut egerendi sibi
ipsi imponerent, sic enim saburram ventriculi,
tenaxq; & viscidum flegma villis eius impactum,
optime deplent, & paulo post, horæ dimidio in-
terposito, vel circiter, sumpta vna alteraue tabel-
la, eiusdem fontis aquæ, sed minus, quantum ta-
men sat est, resumant. Hoc ego virginibus, aut
alijs cachecticis primo octiduo, aut etiam diutius
semper suaserim præeunte mihi Galeno in 5. de
vfu partium, vbi ait. Cacochymis vomitionem sa-
luberrimam esse cum facilis & moderata conti-
gerit (talis autem est in vfu huius fontis) & pur-
gationum omnium præstâtissima, noxios quippe
humores ex ipsis fontibus sinceros elicit, & vacuat
omnem, quæ in ventriculi cauitate, eiusue tunicis
hæret illuicem. In primis expurgat è præcordio-
rum membranis, è cauis iecoris & lienis, & ex
pancreate, omnis generis superfluos humores sin-
ceres elicit, quos alioqui nec hiera, nec aliud vehe-
mentissimum in aluum turbare potest. In ventri-
culum enim ex his locis viæ breues ac expeditæ,
magis quàm in aluum directæ sunt, per quas facilis
est vomitio. Quanquàm autem ab interiorib⁹ euel-
lit, consecutione tamen caput, reliquumq; corpus
leuat. Quocirca omnibus opitulatur affectibus,

qui à præcordiorum impuritate ortum acceperunt, languenti appetentiæ, vomitioni crebræ, nausæ à cibi fastidio, ventriculo præcordijsue distentis, ictero ac cachexiæ, febribus intermittentibus, hemicraniæ, vertigini epilepsiæ, omnibusque capitis affectibus, qui præcordiorum sympathia contracti sunt, & quos è præcordijs in reliquum corpus effusa impuritas protulit. Huc usque ad verbum Galenus. Prudentissimè ut pleraque alia monet Ryetius, quantitatem quam sibi quisque præscribit quam minimo potest tempore ut hauriat, hoc est totam potationem semihora absoluat: cum enim hæc aqua facile permeet fieri posset, ut prima egereretur, postremis nondum ingestis. Quod etsi probet Fallopius pag. 267. omnes tamen improbant, quia ultimæ necessario tardius educerentur magno bibentium malo: idque quotidiana probat experientia, cui quotquot Spadæ sæpius fuerint, volentes subscribent. Nec miretur quispiam quod incredulos sæpe Spadam euocem, Empiricum enim medicamentum est, atque ab experientia inuentum, idemque his aquis quod Theriacæ & Mithridatio euenit, quæ cum sine ratione, si vulgares species descriptiones, composita sint & multa superflua secumque pugnancia excipiant, multos tamen & contrarios affectus sanant. Idem de his aquis dicendum, videat, experiatur necesse est, ut supra extremo cap. 9. dixi, qui fiduciam in his aquis certam post Deum ponet; tum crediturus, cum

eum plurimos morbos, qui nullis cesserunt medicamentis, hic profligatos viderit. Angli statim ab aquarum usu, per tubulos ei rei factos, peti-
fumum hauriunt, quod non improbo, magis probaturus, si producto anhelitu, diutius fumum ore premerent, nec tam cito per os, & nares ex-
sufflarent. Nulli enim dubium est quin igneus tabaci fumus cum ad exitum alia porta non pa-
tet, in ventriculum dimissus, aquas calfaciat, at-
que ita mictionem seu aquarum exitum matura-
ret. Potis aquis domum redeundum, vel alia via
corpus exercendum, quod equo gradario, vel rhe-
da citatiore, certa experientia sæpius edoctus,
quam pedibus fieri malim: præterquam enim
quod iter pedibus facienti sudores facile erum-
pant, atque ita ferum alio diuersum per vrinam
parcius exeat; sessio in equo vel curru, muscu-
los abdominis & intestina, ipsumque ventricu-
lum comprimit, validiusque corpus agitat, unde
aquæ citius concalfactæ, promptius eminguntur,
quod cuius experienti clarissimum fiet. Vidi qui
vt aquas sælicius redderent, secundà post illas
sumptas hora lectum petebant, seque optimè co-
operiebant, itaque promptissimè aquas redde-
bant. Hoc inter alias fecit ante septennium, vxor
amplissimi Præsidis Parisiensis Domini de Mes-
nil, & mercator quidam Amsterodamen sis euen-
tu sælicissimo, & post eos eos innumeri alij, vt
iam plurimi in lecto sælicius quam alijs exercitijs
aquas optime egeri, experiantur. De tempore
huius

huius dietæ nihil statui potest; quisque prout iu-
uari se senserit ex consilio præsentis medici, dies
20. 30. 50. continuet, imò si opus sit, toto anno
bibat; idque si morbus mali moris & pertinax
sit, plures annos repetat, ea lege ut semper aquam
fudo cælo haustam bibat, aliasque bibendi re-
gulas obseruet.

Ratio victus has aquas bibentium.

C A P. XIV.

SI vnquam, etsi semper, quando à fide no-
stra non abit, hic sane Seneca audiendus, qui
ita lib. de tranquillit. *Placet cibus quem nec parent
familia, nec spectent, non ante multos paratus dies,
nec multorum manibus ministratus, sed parabilis fa-
cilisque, nil habens accersiti pretiosius, vbilibet non de-
futurus, nec patrimonio grauis nec corpori, nec rediturus
quâ intrauerat.*

Utantur omnes cibus sibi consuetis probi ta-
men succi quique facile digeri, & per venas me-
sentericas hepati distribui possunt: hoc est quod
loquuntur medici, eueymis & eupeptis. Con-
dimenta è multis aromatibus aut pinguedini-
bus, bene rejciunt: Geringus & Ryetius. Hoc
est quod 7. saturnal cap. 4. apud Macrobius
dicit Disarius Medicus doctissimus: *vitandos ci-
bos, qui ultra sitim famemque, appetentiam produ-
cerent.* Hoc sane faciunt condimenta quæ nouo
semper

semper modo gulæ lenocinantur, appetitumque excitando eò famem prouehunt, vt aptam corpori victus rationem, sæpe duplo vel triplo excedant: Cibariorum genera cum ijs laudo Capones, pullos, perdices, columbos, Phasianos, si inueniantur, gallinas syluestres, turdos & alias quas Spadanum forum exhibet auiculas, quando vt vult Galenus lib. de attenuanti victus ratione, vnum diem suspensæ fuerint, nam neque perdicem recentem, neque turturem, edi vult: sic enim ipsarum durities si vno seruetur die, euincitur, fiuntque omnino friabiles atque inculpatæ, verueces item, vitulos, cuniculos. Quæritur an lepores conueniant? Vulgus eos mensa sua arcet; melancolicum animal dicit, timidum vocat: Mihi eorum causam tueri certum est; ne inauditi & indemnati exulent, atque cum Martiali dicere.

Inter aues turdus si quis me iudice certet,

Inter quadrupedes gloria prima Lepus.

Ac ne frustra Poetæ credere videar, hoc constat neminem scèliciter Parnassum concendisse, qui non prius philosophia, omnique rerum naturalium peritia instructissimus fuerit, vt fuit sane hic epigrammatographus. Melancolicus est inquit cibus. Dico esse cibum melancolicum seu melancolicorum, id est curantem melancoliam, quod probò præeunte mihi Galeno qui lib. de alimentis tertio, leporis sanguinem sanguini colum-

columbarum, gallinarum, omnium denique al-
tilium præfert, suauissimum esse dicit. Si san-
guis laudabilior, ergo & caro quæ eius ideam re-
fert, quæque nihil aliud est quam sanguis, muscu-
lis vel eorum fibris annexus & coagulatus, & in
carneam substantiam concretus. Est enim san-
guis si non vltimum alimentum aliti in sangui-
neis, vt docet Aristoteles lib. 2. de part cap. 3. & 4.
de generat animal. cap. 4. lib. de iuuentu cap. 2.
quod idem repetit eodem lib. cap. 7. initio: con-
stat tamen præcipuum esse nutrimentum anima-
lis, vt docet Galenus lib. de curatione per sangui-
nis missionem. Idem Galenus lib. de alimentis
3. sub initium dicit leporis carnem melioris succi
sanguinem gignere, quam faciat caro ouilla vel
bubula. Si hæ quotidie mensis inferuntur etiam
diuitum, cur exulet lepus ijs suauior meliorisque
succus? Sane doctissimus Heurnius leporinam car-
nem inter ea quæ melancoliam in renibus alte-
rant, primo loco recenset: non est eiusdem me-
lancolicum esse, & melancoliâ alios liberare, nam
si quis hic naturæ similitudinem, vel totius sub-
stantiæ opus rimaretur, naturæ scuticâ dignus
esset. Aretæus etiam antiquus & doctus medicus,
epilepticis diætam præscribens, abstinentiam car-
nis ijs indicens: *vescatur tamen inquit leporina*. Ita
ex illo Heurnius lib. de morbis capitis, cap. de
Epilepsiâ pag. 284. Atqui epilepsia vt plurimum
est à melancoliâ, vel certè melancoliam inducit:
& Epileptici timidissimi sunt, quia semper timent
cafum

casum. Timidum dicunt: non capio huius timoris causam, cum & ipse sepe viderim leporem irretorto oculo, venatorem intueri, cum ita prope admittere, ut baculo vel hastula feriri aut transverberari possit, quod & ego ipse aliquando feci. Si quia canes sibi insidiantes fugit, timidus vocari meretur, quid ouibus timidius. quorum totæ greges, vnius melitæi catelli, & abblandientis, aut lusuri, baubatu verius, quam latratu, in fugam aguntur, & tamen eduntur quotidie? Cedo mihi vllum animal, quod multis petitis canibus non fugiat? Apri, Vrsi, Lupi, Tauri, Alces, Leones ipsi, fuga sibi dum possunt consulunt, cum eorum tergo molossi instant, qui sane ipsimet, visa vel baculi umbra, ocyus ventis & agente nymbo ocyus Euro, aufugiunt. Ne firint superi ut fortissimus vestrum ab Ibero victore inermis & nudus (quod in India factum scribunt ipsis Regibus) canibus obijciatur pugnaturus cum ipsis: quanquam tunc certo daturus vos manus scio, fassurosque eum qui canes morsuros & laniaturos timet; nullo suo merito timoris argui, timidumque vocari. Iam si alimentum eorum consideremus, optimo vescuntur, planeque eodem cum perdicibus, quorum tamen esu solo, gallicum morbum, qui eo septies laboravit, ut ipsemet testatur in lib. de capienda utilitate ex aduersis, curari, scribit Cardanus: cui ad stipulatur Ludovicus mercatus libro secundo de sanitate classe secunda, quæstione 164. in principio pag. 31.

Atqui

Atqui gallicus morbus vel inuenit hominem melancolicum, vel eum talem facit, cur ergo eundem effectum negemus lepori, si sanguinem perdice suauiore meliorisque succi habet? Veniat ergo in mensam lepus ætatis mediæ, hoc est semestris, nam effætos, vt in omni alio animalium genere reijcimus, sed elixus, modicoque aspersus pipere: Clunes affari poterunt sine vlllo tamen lardo: aut si quod Gallis familiare, infixo larido distinguendæ, sunt nates, cum mensæ inferentur, lardi frustra eximantur. Esurialibus diebus in mensam veniant Truttæ, quarum magna hic copia, Ombræ, Lucij, Gobij, Perchæ, alijque saxatiles, in craticula assi, aut in vino elixi cum serpillio, origano, hyssopo. Mentham addit Chæringus, sed eâ non vtantur feminae, quæ conceptionis gratiâ huc veniunt, nam vt scripsit Cassius Dionysius lib. 12. Geoponicôn, menthâ conceptionem impedit, & generationi aduersatur; cæteris vtilissima est, & maximè rubra. Abstineant omnes à lardo, pernis, Anseribus, Anatibus, nisi sint syluestres, à porcellis monent alij abstinendum, cæterum quia nondum venales in Spa vidi, non est cur hoc moneam. In piscibus præter Anguillas, Tincas, & Carpiones, non vidi quos reijcerem. Pro bellarijs adferantur cortices citri sicci saccaro obliti, semina anisi, sæniculi, vuæ passæ, nuclei, pini pistachia, & exeunte æstate poma aut pira tosta, cinnamomi tantillo aspersa, vel vino incocta, parca manu sumpta, vt & pruna damalcena,

damascena. Fraga etiam, & vaccinia biliosis egregiè sanguinem temperabunt, vt & mora, quæ etiam alijs, si vino madescant, non nocebunt. Ceterum hæc omnia parcè & auarâ manu sumantur, & quod caput est dietæ, diuersitas maxime ciborum vitetur. Cum enim diuersorum alimentorum natura sit diuersa & temperamētum, imo sæpe pugnax & contrarium, vnde alia citius, alia tardius conquoqui necesse: hinc mala quibus medicinam ab aquis his petimus, procreantur, vt flatus, tormina, colicæ, renum dolores, & calculi, obstructions meseraicarum, totius chyli, & qui ex eo fit sanguinis, cruditas & inquinatio. Optimè Fran. valeriola locorum communium lib. 2. ca. 6. *Ciborum ait varietate & copia in eadem mensa, & productione in longas moras, nil nocentius homini, ad salutem, omnibus ex æquo medicis visum est.* Ipse Plato, varios ciborum ex varietate nasci morbos ait. Et Plinius lib. 2. cap. 5. *Hominiis cibus utilissimus simplex; acernatio ciborum pestifera, condimenta perniciosa.* Hæc de cibo. De potu quid dicam? hæret enim mihi aqua de aqua scribenti. Aliqui qui mihi præscripserunt, vinum rhenarum aqua quæ in plautie scaturit, hoc est Pouhontio dilutum, præscribunt; Parcite mihi virorum optimorum & doctissimorum manes sancti & amicissimi, hanc opinionem vestram probare non possum, Primo quia vultis omnes priusquam prandeant, aquam potam eminxisse, quid hoc opus est, si in prandio nouam bibere debent? hoc sarg
contra-

contradictionem & pugnam sapere mihi videtur,
velle ut pransuri omni aqua vacui sint, & interim
nouam praudentibus ingerere. Sed vinum hac
aqua diluitis. Multi vero, maxime Galli, & magis
Gallæ, non diluunt vinum, sed aquam, ignosce
Cicero, vinant, hoc est minimo vini, duplum
vel triplum aquæ affundunt, sicque miserum
Bacchum, cæteroqui parum generosum (ferè
enim Mosellonica hic vina bibimus) nimis aquis
mersum, suffocant. Secundo; omnia diuretica,
seu vrinas mouentia etiam vos longissimè à pastu
sumi vultis: at vero hæ aquæ fatentibus omnibus
inter diuretica primas tenent: nam scribit Pigræus
se vidisse vna cum doct. Martino & Basino, quen-
dam anisum inter aquas ut sit comedentem, inte-
grum eius granum eminxisse. Oculato testi, &
cui sunt præmia falsi nulla, fidem negare, homi-
nis esset parum vrbani. Si potuit aqua hæc anisi
semen digestu non perdifficile, per gulam & sto-
machum, in miseraicas, hepar, renes, emulgentes
venas, vesicam, penem ipsum perducere, quo-
modo chylum crudum & indigestum secum ra-
piet, maxime Rhenano vino, quod & ipsum diu-
reticum est, iuncta? Malim ergo in prandio bi-
bant merum meracum, vel Belnente, vel d'Aij,
aut sane Mosellanicum, quoduis denique, modo
fumosum non sit, nec caput tentet: hæc enim in
somnos meridianos catharrorumque generatio-
nem procliua sunt, cui qui aquam miscere volet,
ex fonte dulci petat, vel diluat aquâ puteali, cui
cinnamomi

cinnamomi quantum volet incoxerit, puta vñciam vnam, pro libris quatuor. Si hoc coquas ad consumptionem libræ vnius, addasque saccari vncias tres, his per pannum colatis, nihil ad potum quotidianum iucundius. Si quis obiecerit, nil aliud in prandio, cœna, ientaculo ipso, Spadæ incolas præter hanc aquam, & sane innoxie bibere. Dico eos à puero assucuisse, assuetudinem autem secundam esse naturam, quo fit vt nihilo magis ab hac cum cibo pota lædantur, quam Aristotelica illa puella, quæ etiam Napello, quo omnes alij interibant, pinguescebat. Horam prandij dictabat Socrates diuitibus cum vellent, pauperibus cum haberent. Hic prandendum est quando aqua vel omnis, vel maxima ex parte reddita est scaphio seu matulæ. Cæterum quia multi primis saltem diebus, parum aut certe vix dimidiam aquæ reddunt, ne illi nimis dilato prandio sibi noceant, hoc signum temporis sumendi oportune prandij habeant: Si quis haustis aquis, aliquid albæ vrinæ, vt solent omnes, excreuerit: deinde coloratam vrinam minxerit, secure prandeat; certum enim est reliquam in corpore contentam aquam; à natura dispensatrice assumptorum, ad aliquem alium vsum retineri: Aut certe cum duas plus minus horas, vel mixtio, vel ventris exoneratio; si eam aqua causauit, cessauerit, non dubitet se tuto prandere posse. Cænandum cum appetitus vel ratio, prandium concoctum iudicauerit. Exercitium cœnæ

prandioque commodè præmitti monuit; Sexto epidemion Hippocr. lect. 4. apho vlt. ubi ait, Labores cibos antecedant. Exercendi modum si quis ignorat, paucis capiat ex Hippocrate. Ambulet, digladietur, aut manûs gestulatione, pedes leuibus choræis aut saltu exerceat, aut parua pilâ, quæ vtrumque præstat ludat (huic fini sphæristerium in Spa extruendum curauit.) Hinc enim calor natiuus auctior, visceribus robur & firmitudinem afflabit, spiritus augebit, excrementa copiosius reiciet sicque generationi lapidis & arenularum resistet, fæcesque aluinas stimulando; à colicâ immunes reddet, pulsisque ventriculi sordibus, appetitum augebit: sumptumque post cibum melius conficiet. Modus cuiusvis exercitij est quibusdam, dum leuiter mutata respiratione, aut incipiente sudore corpus madescat. Hoc est quod alibi dixi. *Ad Vdorem, non ad Sudorem.* Cæterum cum corpora rara facillime sine lassitudine sudent: compacta autem, etiam laticini balnei vim eludant, si quis exercitium sudore aut anhelitus mutatione metiri nolit; is cum modicè fatigari cæperit, exerceri desinat: ita nec viribus, nec spiritibus resolutis, exercitij vtilitatem percipiet. Pomeridianum tempus fabulis, chartarum & fritilli lusu, plerique, & recte terunt, aut quiduis agunt, vt somnum meridianum, quo nil nocentius, fugent. Nocere dico somnum has aquas bibentibus,
vel

vel quia aquarum operationes impedit, cum naturam cuius est superflua digestionem bene facta expellere, sopiat; humoresque è corpore deturbandos, parti alicui in qua putiscunt, includat. Accedit quod hic somnus, vaporibus potius mineralibus, quam naturæ adscribi debeat; quo fit vt caput grauet, ipsum iusto plus calfaciat, ideoque fluxiones, multorum causas morborum, cieat. Demum cum hic somnus brevis sit, ideoque cæptam ventriculi coctionem mox destituat, cibum quando excitantur, per ventrem fluctuare facit. Bilis etiam, quæ eo tempore foras moueri solet, hoc somno intro reuocatur; vbi collecta, febrem excitare poterit, vel in melancolicum excoqui succum. Denique contrarios ab hoc somno succorum motus causari necesse est; ex luce nimirum foras eos euocante, & somno eisdem intro prouocante. Si quis tamen vt multi Italarum meridiari omnino assueuerit, quia ab assuetis parua vel nulla fit passio; consuetudini suæ aliquid tribuat, sedens in sede erectus, non autem in lecto cubans, dormitet potius, quam dormiat. Sub vesperam ante cænam multi aquam denuo, sed dimidiata tantum quantitate, si ad matutinam conferas, bibendam dicunt. Ego paucis antecænam potationem pro fuisse vidi: Itaque nisi quis stomacho sit validissimo, parum vel nihil, nisi forte sitis leuandæ causâ, ante cænam bibendum censeo. A cæna leuiter ambulandum, aut iocis lusuque

indulgendum, dum somni hora instet Spadani
fontis potores, in prato ambulationi aut choris
vacant, vel scipionibus quibus ad fontem ituri
nituntur, ad palum se exercent. Hic duo mihi
prius non obseruata, serio mouendi sunt hydro-
potæ nostri: primum, vt sub octauam horam,
nondum primis intendentibus se tenebris, non-
dum aurâ nocturnâ aërem afflante, qua plurimos
lædi & catharris affici vidi, diuersorium suum
repetant. Alterum ne nuda in humo, tripudia
spectantes sedeant. Monucriat Galenus 10. de
loc. aff. subfinem, solere interdum resolui sedis
musculum ijs, qui superlapidem frigidum sedis-
sent, aut in aqua frigida supra modum versati es-
sent. Hanc autem resolutionem sequitur inquit
inuoluntaria excrementorum deiection. Hæc Ga-
lenus; quem sane si puellæ quædam Illustres au-
dissent non ea passæ fuissent, quæ ipsas in vitæ des-
perationem adigerent. Ingenue fateor me an-
nis superioribus à quibusdam sub mediam no-
ctem accitum quæ fessione illa prætenfi dysente-
riam, tantum non lethalem, tenesmuinque mo-
lestissimum incurrerant. His ego post rhubarbari
in aqua plantaginis infusionem, cum syr derosis
ficcis, & myrtillosum exhibitum, foru galiopseos
& verbasci, sanitatem breui cum Deo restitui.
Sapient aliz alijque harum exemplo, & si pului-
naribus aut sedilibus vti nolent, saltem pluribus
& fultis vestibus podici suo consulant (supradi-
ctæ enim puellæ, vnâ, eaque tenuissimâ syndone

nates vel velabant, vel quod detestatur sapiens amatoribus suis mirandas præbebant:) aut quod malim, vel in horto non sedeant aut pallium anteambulonis, caculæue sagum sibi substernant.

*Quæstiones quædam in Spa proponi solite
obiter solvuntur.*

C A P. XV.

Q Væritur primò, cur fæces has aquas bibentibus omnibus omnino, exceptis paucissimis, nigrescant. Constat ab assumptis & vrinam, & aluinas fordes colorari: sumpta croco, aut rhabbaro, flauescunt; A Sena virescunt; à pomò Granatorum, aut eius syrupo nigrescunt, imò

*Virgilio, In patris aries iam suaue rubenti
Maurice, iam croceo mutat sua vellera luto,
Sponte sua & sandix pascentes induit agnos.*

Quod vel ex illo, vel ex Plinij lib. 31. cap. 2. descripsit Solinus cap. 35. Varronem huius dicti auctorem citans. In Spa plerique nigroris causam adscribunt vitriolo, delusi forte, quia vitriolum atramentum sutorium vulgo audit. Cæterum à vitriolo nihil nigrescere hinc patet, quod oleum vel spiritus calchanti aquæ iniectus, & potus, nec vrinam nec fæces bibentis vlla nigredine tingit. Imo quod chymistæ, ut sunt miri miriones,

pro mirando miraculo habere soliti sunt, si vino rubro iniiciatur oleum vitrioli, ipsum albe facit momento; quomodo ergo quod vinum rubrum albere facit, fæces flauas nigrefaciet? Adde quod vitriolum aquæ incoctum, vel aquæ colorem non mutat, vel obscura flauedine ipsam tingit. Dico itaque à ferro, aut eius rubrica que plurima his aquis inest, nigredinem induci: cum liquido videamus eos qui vinum chalybeatum, vel chalybem præparatum ad vnum tantum scriptulum in pilis aut bolo sumunt, nigerrimas à prima statim sumptione sordes deijcere. An fieri potest, quod vt parum bilis flauæ, fæces flauæ facit, in Ictericis enim bile alio translata, griseæ vel cineritiæ sunt sordes; ita minimum melancholiæ his aquis lieni eductum, hunc noctis colorem stercoreibus aspergat? Prima solutio verior, quia & sanguineis, & omnibus ab atra bile alienissimis idem accidere, quotidiana docet experientia.

Quæritur 2. cur mulieres è fauenirio aquam aduenis haurientes, pluuiam biduo ante, vel tri-duo præfagiant, dicentes cælo etiam serenissimo: pluet, quia fons cecinit. Fontem esse apud Volaterras ait Leander in Italia sua, ex quo depræhendas futuras pluuias si alte saliat: salit enim ad decem vsque pedes vel eo amplius, at si lenius fluens minus altè saltitet, futuram serenitatem conijcias. Sed hic & præfagij, & cantus vt loquuntur, reddenda ratio. Dico fieri quia cum vt pluat
necessario

necessario vapores à sole in altum trahi debeant: hæc vero aqua quia leuissima, & ob multos quibus turget spiritus maxime aërea, facillime à solaribus rarefacta radijs, magna copia in vaporem resoluitur, altumque in nubem cogenda petit; quare ne detur vacuum, quod naturaliter dari non posse demonstrant Physici, copiosior se aquis à sole eductis immiscens aer, strepitum illum, quem in lagenis angusti oris, liquorem effundentes percipimus, edit. Hunc siue sibilum, siue strepitum miscentis se fonti aeris, rusticæ hæ mulieres cantum vocant. Quia vero coactæ nubes, nisi ventus eas alio rapiat, in pluuium resolvuntur imbrem, ideo prouidum est illis, Aeolo silente, ventosque cohibente, pluuiam præsignificare, quam ut plurimum sequi, experientia rerum magistra ipsas docuit, quæ sit ut sæpissime, imo fere semper, verum venturæ pluuiæ vaticinium edant.

Quæritur 3. cur multis quibus aluus domi steterat, hic laxissimam experiantur; alij vero qui domi minimum in dies semel secedebant in Spato toto octiduo, nec semel ventris onus deponant. Dico hoc fieri, quia illi vesicula fellis obstructa quæ sola fœcum stimulus est, pigrius secessere, qua obstructione per has aquas ablata, bile consueta sibi via in intestinum ieiunum se effundente, eius allapsu stimulari & effundi stercora necesse est.

Alijs vero humoribus, aquarum vi ad renes & vesicam maiori copia delatis, sicciora fieri intestina, atque aluum inde pigrescere necessarium est:

Et hinc est, cur omni diarrhoeæ, dysenterię, hepatico fluxui, periti medici omnibus medicamentis, vrinas mouentia adiungunt, vt scilicet humores ad intestina ituros, ad renes deuocent, sicque fluxum quadantenus sistant.

Quæritur 4. cum aquæ pluuio cælo ad plures prolato dies ferè dulcescant, nihilque aut parum aciditatis habent, ideoque nec iucundè, nec vtiliter bibuntur, qua ratione, vt cum fructu sumantur, emendari possint. Dico quod etsi thermæ aquas nulla pluuia corrumpi credidit mercurialis tom. 3. cons. in consilio pro principe Auria, grauissimum autorem citans Senecam qui ait: *numquam vltra decem pedes in profundo madefit terra*, vt hac ratione fontes profundiores cum sint, pluuijs corrumpi numquam possint: tamen experientia contrarium in dies docet. Etsi reuera fateri cogar ab aere vel pluuio vel in pluuiâ prono magis quam ab ipsa pluuia fontes vitiari. Pluiam enim aquam statim fontes, vt & alias sordes euomunt: & maxima cadente pluuia, vbi primum serenior fit aër, aquæ aciditatem amissam recuperant, secuturamque longam serenitatem spondent: Quicquid est cum supra docuerim maximas à vitriolo, sulphure & ferro his aquis vires communicari, cælo tam diu pluyente, cuiuslibet vitro aliquod olei vitrioli, vel sulphuris guttas iniiciendas: ita enim facilius penetrabunt, minimumque à veris Spadæ aquis abludent: quo tempore etiam faciles aliquæ deglutiendæ erunt pilulæ,

Iulæ, vel tabellæ, quibus chalybis præparati scrupulus vnus, vel dragmasemis si adiiciatur, aut tantundem cremoris tartari, minimum aberit quin aquarum quis vel optimarum, integros fructus percipiat.

Quæritur 5. Si aquæ omnino stagnent seu in corpore maneant, vt aliquibus accidit, quid agendum. Dico varia esse aquæ huius receptacula. Si ergo in intestinis aquæ hæserint, quod ex rugitu, flatu, tensione, grauitate agnosces: illo quidem ipso die clisterem ex eadem aquâ, cum hieræ picræ, vel logadij, vel etiam hieræ colocynthidos vnciâ vna iniicies, sicque aquam omnino educes: si non successerit, statim acriore clystere rem tentabis, & postridie purgationem pituitæ, quæ transitum aquis negauit, institues, idque si opus fuerit, biduo triduoque, omisso interim aquæ vsu, facies. Si vero in venis retinetur aqua, quod ex absentia rugituum, flatus, tensionis patebit, purgetur corpus postridie, nam absentia doloris illa die clisterem non vrget, pillulis de hiera cum agarico, vel elephanginis ad scriptulos tres cum dimidio sumptis, dein cieatur sudor. Si pillulæ hæ aquam non eduxerint, suadet Fallopius & post eum Heurnius, vt vni pillularum elephanginarum scriptulo, elaterij grana aliquot addantur, quod post ipsos Dominus Paddij, cuius supra honoris causâ memini, superioribus annis scilicet tentauit; Ceterum quí modum elaterij præparandi quem ipse me in Spa docuit, sciuerit,

sciuerit, vno grano, aut ad summum grano cum dimidio, in nostratibus contentus erit, summaque felicitate aquas educet: quod ab eo tempore, sæpe me fecisse multi testabuntur.

Quæritur 6. an Geronster tuto potari possit; sunt qui omnino dissuadeant, constat enim etiam me fatente fontem hunc multum habere sulphuris, atqui sulphureæ aquæ, inquit apud Oribasium, Antyllus antiquissimus medicus, os, ventriculi relaxant, ipsum subuertunt & effæminant, quod & ipsum ex eo Aetius transcripsit: adderet Crato trium Imperatorum nostri æui medicus, sulphur tantum esse arsenicum inchoatum; proinde ab eo paulo minora, quam à præsentaneo veneno pericula imminere. Dico iam ante me dixisse empiricum esse medicamentum has aquas, itaque experientiæ quæ cum iam aliquot annos nobilitauit credendum, cum constet, me, infinitosque alios, sæpe centū sexaginta dietim, & plures, idque mane tantum, ad octoginta ultra centum enim ascendi, cum summa vtilitate hausisse aquæ huius vncias. Itaque verissimile est Antyllum de aquis merè sulphureis locutum; Geronster autem & sal, & alamē, & vitriolum, & ferrum & alia effæminationem sulphuris impredientia, ipsumque masculâtia habet. Quod ad Cratonem, dico cum loqui de sulphure perfecto, & chymicorum organis sublimato. Constat autem omnia venena, quo magis sublimantur magis venenari, vt patet in Mercurio crudo, & sublimato,
crudum

erudum etum etiam magna copiâ assumptum, si plumbaginem ei crebro per corium transitu, ademeris, parum vel nihil nocet, sublimati minima quantitas cuius, erosio ventriculi tunicis certam affert mortem. Certissimum tamen est, omnes capitis affectibus obnoxios, sibi à vertigine aut hemicrania metuentes, plus damni ex hoc fonte quam cōmodi referre, ob vaporum nimis caput ferientū ascensum: quod qui omnibus Spa-
Spadanis fontibus attribuit Tabernæmontanus, qui nunquā eos vidit, si de hoc solo dixisset, veritati magis litasset. Nā Sauenirium & Pouhótium, omnib⁹ capitis affectibus cōducere, certissimū est.

Quæritur 7. an pueris hæ aquæ conueniant, cum enim Spadani fontes admodum frigeant, & nisi liberaliter potentur parum profint, puerilis autem calor facile vel lædatur, vel extinguatur, à multum frigidis læsum iri verisimile est: & constat pueros minimum simul bibere posse, vt metuendum sit, parum hinc commodi expectari debere. Dico tuto bibituros, si modo, aquæ proportio respondeat eorū ventriculo; vidimus filiū Illustrissimę Comitissæ vanden Berghe, iam triennio has aquas bibentem aliosque quam plures, qui cum inciperent vix trimi erant & tamen huius aquæ triginta & plures vncias in dies bibebant? Mea sane filiola sesquiteritiū annum agens bibere cæpit, iamque biēnio bibit, multasque arenas pro corpusculi sui modulo excreuit, potis hoc anno dietim triginta duabus, & amplius vncijs.

Idem

Idem de alijs pueris, aut senibus ad secundam pueritiam redeuntibus, dici potest. Sic Fallopius Pisanis ad epidemiam quarto quoque anno, dysenteriam, cum aquas thermales môtis Catini, vtiliter natu grandioribus propinasset: etiam puerulis duorum annorum exhibuisse se scribit, quorum aliqui vnicum cyathum, alij duos, alij tres bibebant, omnesque qui biberant à tali morbo liberatos. Vidi hoc anno puellulam vnus anni, adhuc lactentem, ad multos dies quotidie pota Pouhontij aqua multam eiecisse pituitam, sicque ab anhelitus difficultate quâ maximâ laborabat, liberiolem redditam.

Quæritur 8. an prægnantes his aquis tuto vti possint; cum enim diuretica omnia menses mouere credantur, motis autem mensibus ingens puero alimenti defectus periculum immineat, meritò dubitant multi, tutone grauidis aquæ hæ præscribantur, cum valdè diureticæ sint. Tabernæmontanus non tantum ijs seriò Sv valbacenses suas, & has commendat, sed certò certius, earum picæ, malaciæ, nausæ ipsi ab his aquis remedium pollicetur; & post duas paginas fol. 45. dicit harum aquarum, vsu abortum certo præcaueri. Mihi hic aqua hæret; agimus de vita hominis, de qua, vt optime Saturicus, nulla nimis cunctatio longa est. Dicendum tamen est aliquid, neque, tam difficilis quæstio in medio relinquenda. Dico ergo ea quæ de grauidarum vel incientium pharmacia diuinus scripsit senex, analogiâ ad has
aquis

aquas transferri posse. Vult ergo Hippocrates
sect. 4. aph. 1. Prægnantes in quibus humor effe-
rus, metastaseos aut febrilis incendij, metum fa-
cit, purgandas à quarto mense, ad septimum. Per
quartum mensem, ex mente optimorum inter-
pretum, intelligit tempus, quo moueri fœtus in
vtero incipit, quod si ante quartum mensem, fœ-
tus se mouerit, etiam tunc matres purgabis, vt se-
cit Hippo. 1. Epid. tmemate 3. 12. Primis enim &
vltimis mensibus, vteri vmbilici, ac secundina-
rum vincula, eo se habent modo, quo pedunculũ
fructuum arboreorum, qui vere non adulto, vel
ad lenem Zephyri flatum, & in Autumno ad mi-
nimas Eurorum auras concidunt, ita conceptus
vel tenelluli, vel maturi, nullo negotio excuti-
untur. Dicit item Hipp. sect. 5. aff. 34. gravidam,
cui profusior sit aluus abortire, vel quia scilicet
tetro fœtus, & abominando stercoreum fœtore,
dum per intestina vtero incumbentia feruntur,
grauiter offenditur, vel quia alimēti parte, prius-
quam in chylum, vel sanguinem vertatur, cum
fecibus abducta, de fœtus demenso matrisque de-
cedit: vnde ille genio suo fraudatus. exitum quæ-
rit, cum vterus sufficientia ipsi alimenta neget.
Hinc colligere est, prægnantes huius aquæ indi-
gas, à quarto gestationis suæ mense ad septimum,
tuto his fontibus, vt & pharmacia vti posse. Cæ-
terum obseruent duo quæ ex citatis Hippocratis
Aphorismis, colligere est, vnum vt in septimo,
& sequentibus eum mensibus, mitius purgentur,
quam

quam in sexto , quinto, fine quarti. Alterum ut
quocunque quis mense grauidas purgabit, mitius
cum ijs quam alio agat tempore , ne ipsis accidat
quod vxori Antimachi in 5 epid: cui cum valida
data essent Catapotia, iam vltra quinquaginta dies
grauida, eodem die, animam cum excrementis
egessit sub mediam noctem. Bibant ergo quæ uterum
gerunt di&is mensibus, sed parciori manu
quam alias vel biberant, vel bibiturae essent: me-
mores regularum quas supra praescripti. Si quæ
tamen timidiores, nec ita cautum satis sibi pu-
tant, in primo vitro accipiant species diamarga-
riti, aut corallios praeparatos ad scrupulos duos
vel tres, aut si pauperes sunt, praemandant zedo-
ariam, doricum, Been: vngantque ventrem ab
umbilico pube tenus, renumque regionem, vn-
guento comitissæ, vtanturque cerato hoc renali,
quod Crato in expertis numerat. Rec. mastice
vnciam, ladani dragmas sex, pulueris bistortæ,
nucum cupressi, hypocystidis, acatiæ, sanguinis
draconis, rosarum rubrarum, corallorum præ-
paratorum, ana dragmā, terræ sigillatæ dragmas
duas cui si quid tenacitatis desit, adde tantillum
therebynthinæ, & applica locis vnguento dicto
oblitis. Hoc & ego feliciter in vsum vocavi. Ita
sanè ab abortu tutas fore spero, maxime illas
quæ etiam vltra dimidium gestationis tempus
sanguinem, quo abundant, quot mensibus ef-
fundunt.

Decreueram quærere nono cur aliqui dum has
aguas

aquas bibunt altero statim die, aut tertio, Pri-
pismo aut tentigine tententur, vti exteris aliquot
hoc anno euenisse, omnes qui in Spa fuerunt, sci-
unt. Cum tamen doctissimus Franbesarius his
aquis nocturnas pollutiones impediri, easque
æstum veneris frænare dicat: Sed quia metuo, vt
casti aliquorum vel oculi, vel aures offendantur,
maximè qui hæc in vernaculam traducta lin-
guam legent, supersedebo: verbo, vel missis lit-
teris huius dubij curiosis, responsurus.

Cum hæc scripsissem, manumque de tabula,
hac veluti promulside descriptionis harum aqua-
rum contentus, subduxissem, tantum in me iuris
habuerunt, Nobilium quorundam, & Iureperito-
rum, vel preces, vel iussa, vt huic etiam quæstioni
pro instituti mei ratione, hoc est quâ breuissimè,
respondendum iudicarem. Dico itaque Frambe-
sarium, quæ eius vel eruditio, vel candor, veritati
litasse, cum constet plerosque, cum multa Spada-
ni fontis siccarunt cymbia, tardiores ad vene-
rem reddi, quamquam cum ei indulgent, soli-
diorem magisque masculam experiantur. Nihi-
lominus exteros quos dixi, (qui me valde, hæc vt
scriberem rogarunt) hoc malo quod ipsi grauif-
simum putabant, vt reuera est, cum conuulsioni
affine sit, ideoque citatis equis patriam repe-
bant, tentatos, siue penis non voluntariam ere-
ctione passos: Vel quia aquæ Spadanæ maioribus
vitris ingeltæ, à vegeto illorum calore concalsa-
tæ, per coléexituræ, semen quod forte acrius in
ipsis

ipsis erat, secum rapiebant; Vel quia hi fontes
pituitam, materiamque flatulentam, qua scate-
bant (nec enim corpora purgarant) per vrinam
educebant, quæ calefacta, rarefiebat, partimque
in flatum spiritumque soluebatur, quo ad vrina-
rios ductus in magna copia, & vi quadam solito
maiore, ac sine ordine, perueniente, turgere ar-
terias vicinas, nervosque proximos (& est penis
omnino nerveus) distendi in procliui est, ac ita
tentiginem, quam hic libenter cum priapismo
confundo, cum de patientium voluntate, quæ
solâ hæc Galenus discriminat, mihi non constet,
promoueri. Hoc est quod Galenus 14. meth: li-
bro tertio de symptom. causis: & 9. de comp.
med. sec. locos, dicit: hoc malum ex humoribus
viscosis & crassis, moderato calore in halitum
vel flatum solutis, nasci. Certo enim scio eos nec
Gonorrhæa, quæ ferè hoc malum, vt corpus um-
bram secum trahit, laborasse: nec penis vlcus,
cui acria cum apponuntur, calore suo tensionem
hanc promouent, passos: cum sani, valentesque
quonibus viderentur. Accedit quod dum equi-
tando huc veniunt, atque adeo equis ad fontem
feruntur, lumbi incalescunt, quibus calefactis
arterias calidiores reddi, earumque ora magis
patere, ijsque patentibus extendi & tumere pe-
nem scribit Galenus. Cuius ratio reddi potest,
quod tunc caliditas in illorum, pene, & naturalis,
& adscititia, materiam crudam, & in flatum pro-
pam, & attrahit, & attractam rarefaciendo ex-
tendit.

tendit. Demum cibus utebatur calidioribus, multoque se vino rigabant, hinc materia ab aquis Spadanis citius solito expulsa, in spiritumque resoluta, arterias in pudendum tendentes aperuit ac dilatauit, vnde tumorem tentiginemque, seu malum, cui Hortorum præsidis falx tensa nomen dedit, gigni necesse fuit, vt taceam cantus, tripudia, narrationes, aliasque illecebras, quæ otiosis & talia quærentibus, nusquam desunt, aliquam etiam occasionem dare potuisse & ταῦτα μὲν δὴ ταῦτα.

Questio decima an aqua Spadana vel aliæ acidæ, cibum in prandio cænaue capientibus: salubriter vino misceatur. Iam olim vel Heroum temporibus verita vetustas, ne vino meraco quod auide, & diductis hauriebant rictibus, calorem natium oppressum extinctumque irent, nouum non erat vino aquam miscere. Hæc causa fuit, cur poetæ Bacchum è flammis (hoc est à rapido solis æstu) natum; vel certe flammæ matri exfectum, à nymphis educatum fingant, aquâ diluendum vinum hoc mysterio innuentes. Huic fini Choaspis fluminis aquam circumferre solitos Persarum reges, scribit Herodotus. Melampum autem, ne precordia vino incalescerent, caputque transmissis vaporibus caribarya tentarent, aut vice versa; ne aquæ, si solæ biberentur frigus, interioribus visceribus damno esset, primum aquas vino æquali miscuisse pondere, scribit Athenæus secundo dipnosophisticorum: Quod tamen staphylo

phylo Sitheni filio ipse tribuit; Græcos autem
duos vini cyathos, ad quinos aquæ: vel vnum ad
tres miscere consueuisse. Hesiodus quoque festis
diebus, tres aquæ partes, quartæ vini ad hilari-
tatem miscere iubet. Hoc sæculo ingeniosa sitis
commenta est, acidos fontes ad vini temperiem
accersere; Quod nulla ratione mihi probari iam
antea Spadacrenes capite quarto decimo, adserui.
Numquam satis dici quod numquam satis disci-
tur, monuit sapiens, quæ causa est cur cum eo ca-
pite etiam persuasis nondum persuaferim ne græ-
cari porro pergerent, atque in medicos inciderim
qui magnatibus suaderent, vt meis neglectis ra-
tionibus semel cæptæ consuetudini insisterent, a-
cidasque aquas porro poculis miscerent, cur ite-
rato eandem hic quæstionem proposuerim. Cai
vt ingenue respondeam. Dico aliud esse valetu-
dini, aliud voluptati vacare: Sic aquam nivis &
olim à Nerone Biberio docti, & hoc ævo vinum
refrigerare solent Itali; illique vsui foveas niue
plenas paleis obductas habent: Si voluptati leno-
cineris, recte; quid enim ad Sirij æstuantis furo-
res cohibendos algidius? Sin sanitati vaces, pessi-
me, multis enim periculis; gratissimum hunc pa-
lato potum obnoxium esse, non semel vocifera-
tur Galenus. Aurem mihi velli, & moneri sentio,
multos te causarios senesque edentatos, dubiæ-
que admodum valetudinis viros novisse; qui aci-
das aquas quot æstatibus potioni innoxie miscue-
runt, vegetam tamen ac viridem senectam in
multos

multos annos produxerint. Si exemplis quando rationi nullus locus, certandum: longe plures quibus ea potatio, vel potionis mixtio, damno fuit reperire est, qui longa die huius mixtionis usu, senlim; nec aduertentes ea congegserunt incommoda quibus nec proba victus ratione, nec medicis preliis sero sapientes occurrere potuerunt. Ut enim hæ aquæ mane sumptæ, & qualitatibus suis incidunt, attenuant, abiterguunt & quod caput est quantitate seu mole excretionem sui promouent, totamque viscerum saburram seu peniculo euerrunt: Ita cum super mensam bibuntur, nec quantitate cum exigua sit premunt, nec qualitatibus sat est, ut quod mane efficiunt, præstent. Vnde eas vel corrumpi, ac in prauum succum verti necesse est; aut certe toti chylo cui accurate permiscentur, ipsique sanguini qui inde fit, mineralium qualitatibus impressionem relinquere, quo fit, ut vel subito viscera inflamment, febremque accersant, aut dysenteriam pariât, aut certe vrinarios meatus, ad quos indigestum vehunt chylum, obstruant, sicque calculum qui nondum aderat generent, vel genitum augeant. Aut si quod aliquando accidit, noxam differant, eo maiorem ruinam, & die in ea quæ dixi mala erupturam, accersant. Hoc est quod vult Hippocrates in libro de aëre locis & aquis. *Calida* inquit *aqua* (idem iudicium de frigidis, eoque magis quod frigus adstringat, calor autem laxet) *vbi ferrum nascitur aut æs, aut argentum, aut aurum aut sulfur,*

aut bitumen, aut nitrum, omnes difficulter minguntur, & ad alui egestionem contraria sunt. Hippocratis quoque fidissimus interpretes Galenus, libro primo de sanit. tuenda & 10. de fac. simpl. cap. 5. abstinendum suadet ab aquis quæ turbida visui apparent quæ male olentes olfactum ledunt & quæ salsa gustui minus placent: denique in quibus qualitas aliqua gustu annotari potest, ut adstrictio, acerbitas, aciditas, acrimonia, amaritudo nitrositas, vel etiam dulcedo. Plinius etiam aquæ nullam qualitatem esse debere eleganter significat, cum ait: Aquam salubrem aeri quam simillimam esse oportet, quippe sincerus aer nec visui nec olfactui, nec gustatui ullas qualitates offert. Quæ omnia, ut si de medicâ seu matutina potatione accipias, falsissimum esse experientia convincit ita si de alimentitia, aut de eâ quæ inter cœnandum & prandendum fit, intelligas, verum esse comperies, nec aliâ diuini senis, eiusque interpretum mentem, quicquid est litteratorum Asclepiadarum, confirmaturos certo scio. Vnum pro Colophone addam quod vel repugnantissimos in meam sententiam trahet. Cum aquarum medicatarum, plurimi veterum Græcorum, latinorum, Arabum, meminerint: earum vltum ostenderint, & potando, & balneando, & per embrocham seu stillicidium applicando, cedo mihi vnum qui vino miscendum in mensa censuerit. Strabo lib. 5. medicatorum fontium Albulæ & Iabanæ meminit aliorumque in Cotiscolys & pithæcusis quibus calculos comminutos, arenulas

que

que vesicis eductas testatur: Vitruuius lib. 8. cap. 3. Plinius passim. Aetius, Oribasius, Galenus, & eo antiquior Scribonius largus medicatas aquas ad vesicæ affectus in usum vocant. Paullus ab Aegina lib. 4. cap. 1. Elephantiacis; Alexander Trallianus, & Auicenna colicis aluminosas aquas prescribunt vt pharmacum, sed cum ad potum ordinarium, seu alimentitium ventum est, altum ubique de aquis acidis silentium. Putatis ne eos quorum tanta fuit solertia, vt nihil ignorauerint: is animi candor vt eorum quæ scirent nihil nos celauerint, tantam rem tacituros fuisse, si inde utilitatis quid sanitati nostræ, nasci posse sperassent. Non prohibuerunt inquires. Qui poterant rem suo sæculo inauditam & inusitatam vetare, nisi forte lycurgo minus sapuerūt, qui laconibus suis adulterium ad illam diem ipsis nec nomine notum non prohibuit, ne prohibendo, cum in vetitia proni ruamus, ipsos docuisse videretur. *Hoc ergo trabali clauo figatur in Asclepij lycao decretum: Fontes medicatos nemo indemnus in prandio canane potui misceto: qui aliter faxit: Hygieæ violatæ penas dato; Medæque, quando Iasoni auscultare noluit, curandus vel cruciandus traditor.*

Questio vndecima an nimio rubori faciei, tuberosisque, & vultuosis bibonibus, aquæ Spadanæ vribiles sint. Hæc quotannis sæpius mihi in Spa proposita quæstio est, nuperque admodum è Batavia nobilis quidam per litteras consilium sciscitatus est, vtrum certam sibi ab his aquis affectus

huius polliceri curationem posset. Respondeo cum tubera illa siue pustulæ vt plurimum ab hepatis calore immoderato pendeant; hæ autem aquæ hepar insignitè calfaciant, vt patet in hydropicis, cachecticisque, & menstruorum retentione laborantibus, quorum hepar frigere in confesso est, eoque ab his aquis concalfacto plurimos curari quot æstatibus vidimus; certum est, si diu quis has aquas biberit, rubicundiorum & tuberiorum quam in Spa venerit vultu, abiturum; vti multis accidisse sanctè affirmare possum, qui me reluctante has aquas sesquimensis biberunt. Cæterum quod valde obseruabile, cum tuberoses isti bibaculi vt plurimum, imo fere semper à sanguinis aduisione, hepatis insignem aliquando, alias minorem, meseraicarum, ipsiusque hepatis obstructionem contrahant; ad decem præter propter dies, tuto acidos fontes potabunt, vt nimirum obstructione aperientium horum fontium vsu ablata, frigidorum auxilio, que inceptam prius hepatis obstructionem auxissent, hepar ad temperiem reuocent; sicque fomite extincto, ac ablata causa, à nouo rubore tuberibusque sibi caueant; presentem autem, quam horrent turpitudinem lacte virginali vt loquutur chymilæ, aut alio medicamento ex sale ammonio, & sulfure tartaroque concinnato, expugnent, tubera auferant, læuigatamque faciem rubore inuiso liberent.

FINIS.

Ne

Ne quis hoc scripto imponi sibi queratur, sequentia accuratè præcepta legat.

Primum Præceptum.

CVi stomachi oëconomia omnino fracta est: qui aquas, vel natino, vel adscititio per medicamina calore, calefacere non potest: cui vitales partes pænè sepitæ sunt: qui à longo tempore anhelantem creberrimo spiritu vix ducit animam; Cui pulmonis Hydrops Thoracem distendit, anhelitumque præcludit. Qui multum aquæ, de adultis loquor, puta octoginta plus minus, non fert vncias, Spadanum fontem, nisi in Spa sepeliri, vel ægrior quam eò venit discedere cogitat, ne accedito.

Secundum Præceptum.

QVi in Spa inuocato Dei numine, consultoque medico venerint, curis domi relictis, desæcatoque animo, vni sanitati intenti, multo mane, post ortum tamen solem, cum corpus per omnes meatus à sordibus depurauerint, aquæ quam possunt plurimum, dum non grauetur ventriculus, potanto: potas vel per vrinam, vel per anum emittunt; emissis magnà parte aquis, prandento, à prandio lusu, ambulatione vel fabulis somnum fuganto, parcè cenant, maturè ab ambulatione postcænana redeunt, cubitum eunt: hancque vitæ normam dum abitum suaserit Medicus, tenento.

AD LECTOREM.

Beeneuole lector menda tibi emendanda relinquo, nam qui Typographus maculas emaculandas mittunt, cacabario refarciendum lebetem mittere videntur, qui vt vnā rimā vel biatū obturaturus, plures infligit: ita hi pro vna liturā, alias adlinunt. Si equus es, si optima, non quæ vitijis carent, sed quæ paucioribus obnoxia sunt, censes: facile vel literam literā, puta c pro e, f pro s: i pro r, n pro u, aut vice versam substitutes, aut certè alibi literam geminabis, vel expunges. Iniquo vnā sponsa suffecerit. Vterque à me salue, vale, bibe.

APPROBATIO.

PRæfens Spadani fontis descriptio, docta sane & laboriosa, ad corporalem multorum salutem vtiliter publicabitur.

R. STEVARTI.







